



**Comhad Idirinstitiúideach:
2025/0358(COD)**

**TELECOM 265
COMPET 623
MI 526
DATAPROTECT 172
JAI 660
CODEC 999**

NÓTA

ó:	Ardrúnaíocht na Comhairle
chuig:	An Chomhairle
Ábhar:	Togra le haghaidh RIALACHÁN Ó PHARLAIMINT NA hEORPA AGUS ÓN gCOMHAIRLE maidir le bunú Tiachóg le haghaidh Ghnó na hEorpa – Cur chuige ginearálta

I. CÚLRA

1. Ghlac an Coimisiún an togra le haghaidh Rialachán maidir le bunú Tiachóg le haghaidh Ghnó na hEorpa (TGE) an 19 Samhain 2025.
2. Cuireann an togra leis an éiceachóras a bunaíodh faoin Rialachán maidir leis an gCreat Eorpach um Chéannacht Dhigiteach¹ agus is é is aidhm dó an creat sin a chomhlánú trí chuidiú chun ualaí riaracháin a laghdú agus trí fheidhmiúlachtaí a thairiscint amhail rochtain ar shainnithint dhigiteach shlán iontaofa thar theorainneacha, bainistiú digiteach na gceart agus na n-údaruithe ionadaíochta, agus bealach slán chun doiciméid agus fianuithe oifigiúla a bhfuil eolaire coiteann ag tacú leo a mhalartú.

¹ Rialachán (AE) 910/2014 maidir le ríomh-shainnaitheantas agus seirbhísí iontaoibhe le haghaidh ríomh-idirbheart sa mhargadh inmheánach, arna leasú le Rialachán (AE) 2024/1183 ([EUR-Lex - 02014R0910-20241018 - EN - EUR-Lex](#)).

II. OBAIR IN INSTITIÚIDÍ AGUS COMHLACHTAÍ EILE

3. I bParlaimint na hEorpa, cuireadh an togra faoi bhráid an Choiste um Thionsclaíocht, um Thaighde agus um Fhuinneamh (ITRE), agus thug dhá choiste tuairim uathu, eadhon an Coiste um an Margadh Inmheánach agus um Chosaint an Tomhaltóra (IMCO) agus an Coiste um Ghnóthaí Dlíthiúla (JURI). Is é Eero Heinäluoma (S&D, an Fhionlainn), a d'fhoilsigh a dhréacht-tuarascáil an 20 Márta 2026, an rapóirtéir.
4. An 19 Eanáir 2026, iarradh ar Choiste Eacnamaíoch agus Sóisialta na hEorpa a thuairim a thabhairt maidir leis an togra, agus rinneadh amhlaidh an 18 Márta 2026.
5. D'fhoilsigh an Maoirseoir Eorpach ar Chosaint Sonraí barúlacha foirmiúla maidir leis an togra an 20 Eanáir 2026.

III. AN OBAIR SA CHOMHAIRLE

6. Leis an **gcéad togra comhréitigh** (10 Feabhra) rinne Uachtaránacht na Cipire idirghabháil maidir leis an méid seo a leanas: sainmhínithe; feidhmiúlachtaí Tiachóg le haghaidh Ghnó na hEorpa; oibleagáidí ar sholáthraithe Tiachóg le haghaidh Ghnó na hEorpa, agus maoirseacht ar na soláthraithe sin; síneadh a chur le hamlínte agus iad a nascadh le hinfhaighteacht gníomhartha cur chun feidhme.
7. Cuimsíodh an méid seo a leanas sa **dara togra comhréitigh** (10 Márta): soiléirithe maidir le cur i bhfeidhm dlíthe náisiúnta i ndáil le malartú doiciméad; sainmhínithe athbhreithnithe; ról a bhainistiú agus a chúlghairm; idir-inoibritheacht na loighce údaraithe uile idir Tiachóga le haghaidh Ghnó na hEorpa; tagairtí do eIDAS2 agus do rialacha cibearshlándála a chuíchóiriú; tagairtí soiléire do shonraí aitheantais an úinéara; oibleagáidí *ex-ante* ar sholáthraithe a fheabhsú; sásra maoirseachta níos láidre; solúbthacht iomlán do chomhlachtaí earnála poiblí maidir le glacadh Tiachóg le haghaidh Ghnó na hEorpa; tuilleadh mionsaothraithe ar mheasúnú an Choimisiúin ar réitigh tríú tír.

8. Sa **tríú togra comhréitigh** (14 Aibreán) chuir Uachtaránacht na Cipire an méid seo a leanas san áireamh: díolúine chun críocha na slándála poiblí agus na cosanta; teorainneacha ar phrionsabal na coibhéise agus soiléiriú go bhfuil feidhm fós ag ceanglais náisiúnta riaracháin agus nós imeachta; spriocdháta don Choimisiún chun gníomhartha cur chun feidhme a ghlacadh; comhlachtaí earnála poiblí nach úinéirí Tiachóg le haghaidh Ghnó na hEorpa iad a ionchorprú san Eolaire Digiteach Eorpach; oibleagáid ar an gCoimisiún treoir a eisiúint maidir le conas a chinneadh an bhfuil rioscaí ag baint le soláthraithe Tiachóg le haghaidh Ghnó na hEorpa do shlándáil an Aontais; tairseach níos airde d'iarratasóirí ar mian leo a bheith ina soláthraithe Tiachóg le haghaidh Ghnó na hEorpa – fiú más Soláthraithe Seirbhísí Iontaoibhe Cáilithe iad na soláthraithe sin – agus spriocdhátaí níos faide le haghaidh athbheithnithe ag comhlachtaí maoirseachta; rannpháirtíocht níos láidre ón gcomhlacht maoirseachta agus ón soláthraí lena mbaineann i gcás neamhchomhlíonadh; maoirseacht an Choimisiúin ar eintitis de chuid an Aontais nach institiúidí de chuid an Aontais iad; na hamlínte uile sa togra a chuíchóiriú agus a ghrúpáil.
9. Tar éis di an tríú togra comhréitigh a thíolacadh, rinne Uachtaránacht na Cipire roinnt **leasuithe breise chun aghaidh a thabhairt ar na hábhair inní atá fós ag na Ballstáit**, lena n-áirítear maidir leis an méid seo a leanas: ceanglais náisiúnta; prionsabal na coibhéise; díolúintí maidir le haon chumhacht aturnae agus sainorduithe dlíthiúla dá bhforáiltear faoin dlí náisiúnta nó faoi dhlí an Aontais; inrochtaineacht do dhaoine faoi mhíchumas; malartú sonraí maidir le húdaruithe le cláir náisiúnta; gníomhartha cur chun feidhme maidir le measúnú a dhéanamh ar na rioscaí a d'fhéadfadh a bheith ag baint le soláthraithe Tiachóg le haghaidh Ghnó na hEorpa; solúbthacht maidir le fineálacha riaracháin a fhorchur ar údaráis phoiblí náisiúnta agus ar chomhlachtaí poiblí náisiúnta.
10. An 27 Bealtaine scrúdaigh Coreper an téacs a tíolacadh agus **chomhaontaigh sé é a chur faoi bhráid na Comhairle Iompair, Teileachumarsáide agus Fuinnimh (Teileachumarsáid)**, gan aon athrú, **d'fhonn teacht ar chur chuige ginearálta** ag an gcruinniú a bheidh aici an 9 Meitheamh 2026.

VI. CONCLÚID

11. I bhfianaise an mhéid thuas, iarrtar ar an gComhairle, ag an gcruinniú a bheidh aici an 9 Meitheamh 2026, an méid seo a leanas a dhéanamh:

- scrúdú a dhéanamh ar an téacs comhréitigh mar a leagtar amach é san Iarscríbhinn a ghabhann leis an nóta seo;
- cur chuige ginearálta a dhearbhú i ndáil leis an togra le haghaidh Rialachán maidir le bunú Tiachóg le haghaidh Ghnó na hEorpa.

RIALACHÁN Ó PHARLAIMINT NA hEORPA AGUS ÓN gCOMHAIRLE**maidir le bunú Tiachóg le haghaidh Ghnó na hEorpa**

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 114 de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa⁽²⁾,

Ag gníomhú dóibh i gcomhréir leis an ngnáthnós imeachta reachtach,

De bharr an mhéid seo a leanas:

- (1) Sa Teachtaireacht ón gCoimisiún an 29 Eanáir 2025 dar teideal ‘Compás Iomaíochais don Aontas Eorpach’⁽³⁾ d’fhógair sé go mbeidh Tiachóga le haghaidh Ghnó na hEorpa, ag tógáil ar an gCreat Eorpach um Chéannacht Dhigiteach, mar bhunchloch chun gnó a dhéanamh ar bhealach simplí digiteach laistigh den Aontas, rud a chuirfidh timpeallacht rianúil ar fáil do chuideachtaí ina bhféadfaidh siad idirghníomhú le riaracháin phoiblí agus idirbhearta gnó a dhéanamh.

² IO C 365, 23.9.2022, lch. 18.

³ Teachtaireacht ón gCoimisiún chuig Parlaimint na hEorpa, chuig an gComhairle Eorpach, chuig an gComhairle, chuig Coiste Eacnamaíoch agus Sóisialta na hEorpa agus chuig Coiste na Réigiún, ‘Compás Iomaíochais don Aontas Eorpach’, COM (2025) 30 final.

- (2) Le Rialachán (AE) Uimh. 910/2014 ó Pharlaimint na hEorpa agus ón gComhairle⁴, bunaítear an Creat Eorpach um Chéannacht Dhigiteach agus tugtar isteach Tiachóga Eorpacha Céannachta Digití, rud a chuireann ar chumas úsáideoirí Tiachóige le haghaidh Ghnó na hEorpa a gcéannacht dhigiteach agus a ríomhdhearbhuithe tréithe a stóráil agus a bhainistiú go slán, agus rochtain a fháil ar raon leathan seirbhísí ar líne. Tá seirbhísí nua iontaoibhe sa Chreat Eorpach um Chéannacht Dhigiteach, lena n-áirítear ríomhdhearbhuithe tréithe a eisiúint, rud a fheabhsaíonn slándáil agus iontaofacht idirbheart agus idirghníomhaíochtaí ar líne.
- (3) Chun geilleagar Eorpach iomaíoch agus digiteach a chothú, agus chun gnó trasteorann a éascú, is gá timpeallacht shlán rianúil a bhunú le haghaidh idirghníomhaíocht dhigiteach i measc oibreoirí eacnamaíocha agus idir oibreoirí eacnamaíocha agus comhlachtaí earnála poiblí i bhfoirmíochtaí éagsúla.
- (4) Chun idir-inoibritheacht, iontaofacht agus slándáil Tiachóg le haghaidh Ghnó na hEorpa a áirithiú, ba cheart feidhm a bheith ag na sonraíochtaí teicniúla a bhunaítear i Rialachán (AE) Uimh. 910/2014 agus ag rialacháin cur chun feidhme ina dhiaidh sin a bhunaítear de bhun an Rialacháin sin chomh maith leis na forbairtí teicneolaíochta agus caighdeán agus an obair a dhéantar ar bhonn Mholadh (AE) 2021/946, agus go háirithe an Creat Ailtireachta agus Tagartha, i gcás inarb iomchuí, agus tosaíocht ag na sonraíochtaí a leagtar síos sa Rialachán seo i gcás aon neamhréireachta.

⁴ Rialachán (AE) Uimh. 910/2014 ó Pharlaimint na hEorpa agus ón gComhairle an 23 Iúil 2014 maidir le ríomh-shainitheantas agus seirbhísí iontaoibhe le haghaidh ríomh-idirbheart sa mhargadh inmheánach agus lena n-aisghairtear Treoir 1999/93/CE (IO L 257, 28.8.2014, lch. 73, ELI: <http://data.europa.eu/eli/reg/2014/910/oj>).

- (5) Chun feabhas a chur ar fheidhmiú an mhargaidh aonair dhigitigh, idir-inoibritheacht a áirithiú agus ualaí riaracháin a laghdú, tá sé ríthábhachtach comhoiriúnacht a áirithiú idir Tiachóga le haghaidh Ghnó na hEorpa agus na córais agus na réitigh atá ann cheana ar leibhéal an Aontais agus ar an leibhéal náisiúnta araon. Ba cheart don Ghrúpa Comhair maidir le Céannacht Dhigiteach Eorpach tacú leis an obair sin. Mar a fhorordaítear leis an nGníomh um Eoraip Idir-inoibritheach, agus chun feabhas a chur ar mhalartuithe sonraí slána agus éifeachtúla ar fud an Aontais, ba cheart, le cur chun feidhme na dTiachóg le haghaidh Ghnó na hEorpa, i gcás inarb iomchuí agus tar éis anailís theicniúil a dhéanamh, úsáid a bhaint as bonneagair dhigiteacha agus bloic thógála an Aontais atá ann cheana, lena n-áirítear iad siúd a forbraíodh faoin gCóras Teicniúil Aonuaire, faoi Chóras Idirnasctha na gClár Gnó agus faoin Tiachóg Eorpach Céannachta Digití, agus ar an gcaoi sin comhlántacht, idir-inoibritheacht agus úsáid éifeachtúil acmhainní poiblí a áirithiú.

(6) Is uirlis dhigiteach iad na Tiachóga le haghaidh Ghnó na hEorpa d'oibreoirí eacnamaíocha chun idirghníomhú le comhlachtaí na hearnála poiblí i gcomhthéacs oibleagáidí tuairiscithe a chomhlíonadh agus nósanna imeachta riaracháin a chomhlíonadh, chomh maith le hathúsáid na bhfeidhmiúlachtaí iontaofa céanna a chumasú i suíomhanna gnólacht le gnólacht. Ba cheart feidhm chothrománach a bheith ag prionsabal na coibhéise dlíthiúla a bhunaítear sa Rialachán seo maidir leis an Rialachán ina iomláine. I ndáil leis sin, níor cheart feidhm a bheith ag an bprionsabal ach amháin maidir le gníomhaíochtaí a eascraíonn as úsáid chroífheidhmiúlachtaí na dTiachóg le haghaidh Ghnó na hEorpa atá coibhéiseach ó thaobh feidhme de leo siúd a dhéantar i bpearsa, i bhfoirm páipéir, nó trí mhodhanna eile agus a bhfuil an cuspóir céanna acu agus atá ag a gcontrapháirtithe traidisiúnta. Áirítear leis sin, mar shampla, úsáid ríomhshínithe cáilithe, ríomhshéalaí cáilithe, agus ríomhdhearbhuithe tréithe a bhfuil an stádas dlí céanna acu agus atá ag a gcoibhéisí láimhe nó fisiceacha. Úsáid chroífheidhmiúlachtaí na dTiachóg le haghaidh Ghnó na hEorpa chun ríomhdhearbhuithe tréithe a shainaitheint agus a fhíordheimhniú, a shíniú nó a shéalú, a iarraidh nó a chomhroinnt, doiciméid a chur isteach agus chun fógraí a sheoladh nó a fháil, ba cheart an úsáid sin a bheith gan dochar do cheanglais nós imeachta a d'fhéadfadh a bheith mar chuid de nós imeachta riaracháin agus nach féidir a chomhlíonadh le croífheidhmiúlachtaí na dTiachóg le haghaidh Ghnó na hEorpa. Féadfar a áireamh ar na ceanglais nós imeachta sin aon choimirce nó fíorú breise, amhail seiceálacha chun feasacht nó tuiscint a áirithiú ar ábhar doiciméid nó ar na himpleachtaí a bhaineann le síniú conartha, nó gníomhaíochtaí sonracha a cheanglaítear mar chuid de nós imeachta riaracháin agus nach dtacaíonn croífheidhmiúlachtaí na dTiachóg le haghaidh Ghnó na hEorpa leo. Chuige sin, ba cheart a thuiscint freisin go bhfuil an Rialachán seo gan dochar do cheanglais dhlíthiúla, riaracháin nó nós imeachta lena gcuirtear d'oibleagáid ar oibreoirí eacnamaíocha ceanglas riaracháin a chomhlíonadh nó doiciméid a thíolacadh i bhfoirm leictreonach ar leith. Áirithítear le prionsabal na coibhéise dlíthiúla go mbeidh an éifeacht dhlíthiúil chéanna agus an bhailíocht chéanna ag gníomhaíochtaí a dhéantar trí chroífheidhmiúlachtaí na dTiachóg le haghaidh Ghnó na hEorpa agus atá ag gníomhaíochtaí coibhéiseacha, agus go bhfanfaidh siad faoi réir na gceanglas dlíthiúil, riaracháin nó nós imeachta is infheidhme. Níor cheart na ceanglais sin a chur i bhfeidhm ar bhealach a bhfuil sé d'éifeacht aige úsáid chroífheidhmiúlachtaí na dTiachóg le haghaidh Ghnó na hEorpa a eisiamh ar bhonn a gcineáil dhigitigh amháin. Dá bhrí sin, ba cheart do chomhlachtaí earnála poiblí a áirithiú go gcomhlíonfar na ceanglais nós imeachta ábhartha uile, lena n-áirítear aon ghníomhaíocht nó próiseas sonracha is gá a chomhlíonadh mar chuid de nós imeachta riaracháin agus nach féidir a dhéanamh trí Thiachóga le haghaidh Ghnó na hEorpa.

- (7) Tá an tsolúbthacht ag comhlachtaí earnála poiblí cinneadh a dhéanamh maidir le conas a áirithiú gur féidir leo glacadh le Tiachóga le haghaidh Ghnó na hEorpa i bhfianaise éagsúlacht a mbonneagair TF, na gcomhéadan atá ann cheana, agus a riachtanas le haghaidh idir-inoibritheachta. Leis an gcur chuige sin, is féidir le comhlachtaí na hearnála poiblí na creataí oibríochtúla atá acu cheana a choinneáil ar bun, lena n-áirítear i gcás ina bhfuil nósanna imeachta riaracháin á gcomhlíonadh go leictreonach faoi láthair le huirlisí agus seirbhísí digiteacha eile atá ann cheana. Leis an gcur chuige sin, ba cheart do chomhlachtaí earnála poiblí a bheith in ann na comhéadain atá ann cheana a choinneáil ar bun agus tairbhe á baint acu ag an tráth céanna as na buntáistí a bhaineann leis na Tiachóga le haghaidh Ghnó na hEorpa. Mar sin féin, ba cheart an tsolúbthacht sin a fheidhmiú agus aird chuí á tabhairt ar phrionsabal na comhréireachta agus ar an ngá atá ann gan ualaí díreireacha teicniúla nó riaracháin a fhorchur, go háirithe ar mhicrifhiontair agus ar fhiontair bheaga agus mheánmhéide.
- (8) Tá an Rialachán seo gan dochar don neamhspleáchas nós imeachta, do na ceanglais bhunreachtúla agus don neamhspleáchas breithiúnach lena rialaítear eagrú agus feidhmiú chórais cheartais náisiúnta na mBallstát, agus do chreat, sláine agus coimircí nós imeachta imeachtaí breithiúnacha.
- (9) Tá an Rialachán seo gan dochar do fhreagracht na mBallstát an tslandáil náisiúnta a choimirciú agus gan dochar dá gcumhacht feidhmeanna fíor-riachtanacha eile Stáit a choimirciú, lena n-áirítear iomláine chríochach an Stáit a áirithiú agus an t-ord poiblí agus cosc na coireachta a choinneáil ar bun.
- (10) Ba cheart an Rialachán seo a bheith gan dochar do cheart daoine dlítheanacha gan faisnéis a chur faoi bhráid comhlachtaí earnála poiblí ach aon uair amháin agus do cheart na mBallstát leanúint de chórais eile a úsáid chun doiciméid agus sonraí a chur isteach idir údaráis inniúla mar a bhunaítear faoi dhlí an Aontais, amhail i Rialachán 2018/1724⁽⁵⁾ agus i dTreoir (AE) 2017/1132 maidir le gnéithe áirithe de dhlí na gcuideachtaí.

⁵ Rialachán (AE) Uimh. 2018/1724 ó Pharlaimint na hEorpa agus ón gComhairle an 2 Deireadh Fómhair 2018 maidir le pointe rochtana aonair digiteach a bhunú chun rochtain ar fhaisnéis, nósanna imeachta agus seirbhísí cúnamh agus réitigh fadhbanna a sholáthar agus lena leasaítear Rialachán (AE) Uimh. 1024/2012 (IO L 295, 21.11.2018, lch. 1. ELI: <https://eur-lex.europa.eu/eli/reg/2018/1724/oj/gae>)

- (11) Chun an t-ualach riaracháin a laghdú agus feabhas a chur ar an iomaíochas, maidir leis na heintitis uile a dhéanann gníomhaíochtaí eacnamaíocha, chun críocha a bhaineann lena dtrádáil, lena ngnó, lena gceird nó lena ngairm, agus gan beann ar a modh maoiniúcháin nó ar a bhfoirm dhlíthiúil, amhail cuideachtaí, eagraíochtaí, daoine féinfhostaithe, trádálaithe aonair agus aon chineál eile gnó, gan beann ar mhéid, earnáil nó foirm dhlíthiúil, ba cheart dóibh a bheith in ann Tiachóga le haghaidh Ghnó na hEorpa a úsáid. Is féidir leis na hoibreoirí eacnamaíocha sin a bheith ina n-úinéirí ar Thiachóg le haghaidh Ghnó na hEorpa trí mhodhanna éagsúla, mar shampla trí úinéireacht, ceadúnas, síntiús nó aon chomhaontú eile lena ndeonaítear ceart úsáide na Tiachóige le haghaidh Ghnó na hEorpa sin.
- (11a) Chun a áirithiú gur féidir fógraí atá bailí ó thaobh an dlí de agus doiciméid a mhalartú, agus oibleagáidí tuairiscithe a chomhlíonadh trí bhíthin na dTiachóg le haghaidh Ghnó na hEorpa, is gá bealach cumarsáide iontaofa agus slán a bhunú is féidir le húinéirí Tiachóige le haghaidh Ghnó na hEorpa a úsáid ar fud an Aontais. Dá bhrí sin, ba cheart ríomhsheirbhís seachadta chláráithe cháilithe a chomhtháthú mar bhealach cumarsáide slán i dTiachóga le haghaidh Ghnó na hEorpa, agus ba cheart malartú slán faisnéise atá bailí ó thaobh an dlí de idir páirtithe a chumasú léi, dá bhforáiltear in Airteagal 43 de Rialachán (AE) Uimh. 910/2014.
- (12) Chun réiteach saincheaptha a chur ar fáil do dhaoine féinfhostaithe agus do thrádálaithe aonair, tá sé ríthábhachtach a áirithiú go ndéanfar Tiachóga Eorpacha Céannachta Digití a chomhtháthú go rianúil le Tiachóga le haghaidh Ghnó na hEorpa. Leis an gcomhtháthú sin, ba cheart é a chur ar a gcumas do na daoine sin fíordheimhniú a dhéanamh trí úsáid a bhaint as a dTiachóg Eorpach Céannachta Digití agus rochtain a fháil ar sheirbhísí iontaoibhe a thairgtear do Thiachóga le haghaidh Ghnó na hEorpa, lena n-áirítear an ríomhsheirbhís seachadta chláráithe cháilithe a bhunaítear mar bhealach cumarsáide slán leis an Rialachán seo, trí úsáid a bhaint as na Tiachóga sin, gan gá le céannacht ghnó ar leithligh a chruthú. Dá bhrí sin, ba cheart cead a bheith ag soláthraithe Tiachóg le haghaidh Ghnó na hEorpa an bealach cumarsáide slán a thairiscint mar sheirbhís neamhspleách do dhaoine féinfhostaithe agus do thrádálaithe aonair a úsáideann Tiachóga Eorpacha Céannachta Digití i gcáil ghnó, agus idir-inoibritheacht á háirithiú chun malartú aipeanna a éascú, chomh maith le seirbhísí iontaoibhe amhail ríomhshínithe agus seirbhísí stampála ama cáilithe agus neamhcháilithe. Ba cheart rochtain den sórt sin ar an mbealach cumarsáide slán do dhaoine féinfhostaithe agus do thrádálaithe aonair a chur chun cinn trí thairiscint a áirithiú, ar phraghsanna réasúnta agus inacmhainne, atá i gcomhréir leis na riachtanais úsáide agus lena ngabhann téarmaí úsáide nach gcuireann ualach míchuí ar na daoine sin.

- (13) Ba cheart do Thiachóga le haghaidh Ghnó na hEorpa, i gcomhar le Rialachán (AE) 2018/1724, tacú leis an 28^ú Córas⁽⁶⁾ atá ar na bacáin tríd an mbonneagar digiteach a sholáthar le haghaidh nósanna imeachta atá go hiomlán digiteach, rud a chuirfeadh ar chumas gnólachtaí nuathionscanta agus gnólachtaí atá ag méadú oibríochtaí uile-Aontais a dhéanamh ar bhealach tapa agus éifeachtúil. Ba cheart do Thiachóga le haghaidh Ghnó na hEorpa an bonneagar digiteach a sholáthar do straitéis ‘tús áite don digitiú’ an 28^ú Córas, rud lena gcuíchóireofar idirghníomhaíochtaí trasteorann agus lena laghdófar an t-ualach riaracháin, amhail stóráil agus síniú slán conarthaí agus deimhnithe a éascú nó iarratais agus doiciméid leictreonacha a chur isteach, a fháil agus a chomhroinnt. Tríd an mbonneagar sin a sholáthar, ba cheart go gcuideodh na Tiachóga le haghaidh Ghnó na hEorpa leis an bprionsabal ‘digiteach mar réamhshocrú’ a fhíorú, rud a d’éascódh fás agus forbairt chuideachtaí an Aontais agus a chuirfeadh feabhas ar a n-iomaíochas.
- (14) I bhfianaise an chuspóra maidir le héiceachóras digiteach aontaithe a chruthú le haghaidh ríomh-shainaitheantais, ríomh-fhíordheimhnithe agus malartú doiciméad leictreonach, fógraí agus ríomhdhearbhuithe tréithe, is gá eintitis de chuid an Aontais a chuimsiú i measc na gcomhlachtaí earnála poiblí a chumhdaítear faoin Rialachán seo. Leis an gcuimsiú sin, ba cheart creat comhleanúnach a chruthú d’úinéirí Tiachóg le haghaidh Ghnó na hEorpa chun dul i dteagmháil le gach leibhéal riaracháin phoiblí agus, ar an gcaoi sin, castachtaí riaracháin a laghdú agus glacadh na dTiachóg le haghaidh Ghnó na hEorpa a spreagadh.
- (15) Chun eisiúint agus comhtháthú cuí na dTiachóg le haghaidh Ghnó na hEorpa a áirithiú ar fud oibríochtaí agus chórais eintitis an Aontais, ba cheart aird chuí a thabhairt sa Rialachán seo ar chineál agus ar struchtúr sonracha na n-institiúidí, na gcomhlachtaí, na n-oifigí agus na ngníomhaireachtaí sin. Chun urraim d’uathriail riaracháin agus do shlándáil eintiteas de chuid an Aontais a áirithiú, ba cheart go gceadófaí dóibh Tiachóga le haghaidh Ghnó na hEorpa a fháil ó sholáthraithe Tiachóg le haghaidh Ghnó na hEorpa atá bunaithe cheana féin, nó a dTiachóga le haghaidh Ghnó na hEorpa féin a fhorbairt nó gníomhú iad féin mar sholáthraí d’eintitis an Aontais. Sna cásanna sin, ba cheart a chur de chúram ar an gCoimisiún maoirseacht a dhéanamh ar Thiachóga le haghaidh Ghnó na hEorpa a bheith á soláthar ag eintitis an Aontais nach institiúidí an Aontais iad.

⁶ An Coimisiún Eorpach, Glao ar Fhianaise: *An 28^ú córas – tacar aonair comhchuibhithe rialacha do chuideachtaí nuálacha ar fud an Aontais*, an 8 Iúil 2025, le fáil ar https://ec.europa.eu/info/law/better-regulation/have-your-say/initiatives/14674-28th-regime-a-single-harmonized-set-of-rules-for-innovative-companies-throughout-the-EU_ga

- (16) Le Rialachán (AE) Uimh. 910/2014, bunaítear creat le haghaidh ríomh-shainaitheantais agus seirbhísí iontaoibhe sa mhargadh inmheánach. Ag tógáil ar an éiceachóras a bunaíodh le Rialachán (AE) Uimh. 910/2014, le Tiachóga le haghaidh Ghnó na hEorpa ba cheart réiteach slán iontaofa a thairiscint d'oibreoírí eacnamaíocha agus do chomhlachtaí earnála poiblí maidir le sainaitheint dhigiteach agus fiordheimhniú digiteach, comhroinnt sonraí, agus seachadadh fógraí atá bailí ó thaobh an dlí de. Leis an gcreat iontaoibhe do Thiachóga le haghaidh Ghnó na hEorpa, lena n-áirítear liostaí iontaofa a úsáid, ba cheart cur leis na struchtúir a bunaíodh faoi Rialachán (AE) Uimh. 910/2014. Ba cheart an tsainaitheint agus an fiordheimhniú laistigh den chreat um Thiachóga le haghaidh Ghnó na hEorpa a bheith ag brath ar ríomhdhearbhuithe, arna n-eisiúint ag eintitis iontaofa, lena bhfianaítear céannacht, tréithe nó róil shonracha duine nádúrtha nó dhlítheanaigh a úsáideann na réitigh seo agus lena féidir iad a fhíorú i gcomhréir le ceanglais an Rialacháin seo.
- (17) Le Tiachóga le haghaidh Ghnó na hEorpa, ba cheart a chur ar a gcumas do dhaoine aonair dá ndeonaítear an chumhacht chun gníomhú thar ceann eintitis in ábhair dhlí, airgeadais agus riaracháin a bhfeidhmeanna a fheidhmiú trí aon fhianú, dearbhú, nó doiciméad a shíniú arna bhforghníomhú trí ríomhshíniú atá bailí de réir dlí de réir bhrí Rialachán (AE) Uimh. 910/2014, lena mbunaítear go mbeidh éifeacht dhlíthiúil choibhéiseach ag ríomhshínithe cáilithe agus atá ag síniú lámhscríofa.

(18) Chun tacú le tarmligean cumhachtaí laistigh de chomhthéacs gairmiúil, ba cheart údarú agus córas rólbhunaithe a chuimsiú le Tiachóga le haghaidh Ghnó na hEorpa lena rialaítear rochtain ar sheirbhísí agus idirbhearta laistigh den Tiachóg le haghaidh Ghnó na hEorpa ar bhealach a chaomhnóidh sláine chéannacht úinéir na Tiachóige le haghaidh Ghnó na hEorpa sin. Leis an gcóras sin, ba cheart é a chur ar a gcumas d'oibreoírí eacnamaíocha agus do chomhlachtaí earnála poiblí cearta a shannadh d'úsáideoírí Tiachóige le haghaidh Ghnó na hEorpa trí údaruithe teicniúla atá sainithe go soiléir lena gceadófar d'úinéirí Tiachóige le haghaidh Ghnó na hEorpa ar leith cearta iomlána a dheonú chun an réiteach a úsáid go ginearálta agus gníomhú thar a cheann, agus trí údarú riaracháin lena gceadófar d'úinéirí Tiachóige Ghnó róil agus freagrachtaí a shannadh d'úsáideoírí éagsúla Tiachóige le haghaidh Ghnó na hEorpa laistigh dá n-eagraíocht. Leis an gcóras údaraithe sin, ba cheart comhoiriúnacht le cumhacht aturnae dhigiteach an Aontais a áirithiú, mar a bhunaítear le Treoir (AE) 2025/25 ó Pharlaimint na hEorpa agus ón gComhairle⁷. Ba cheart an córas údaraithe sin a bheith láidir agus inscálaithe, chun a áirithiú gur féidir le hoibreoírí eacnamaíocha agus comhlachtaí earnála poiblí, mar úsáideoírí Tiachóg le haghaidh Ghnó na hEorpa, údarás a tharmligean chuig úsáideoírí iomadúla na Tiachóige le haghaidh Ghnó na hEorpa, lena n-áirítear fostaithe nó daoine nádúrtha nó dlítheanacha údaraithe eile, agus ar an gcaoi sin, déanfar bainistiú éifeachtúil agus slán gníomhaíochtaí inmheánacha a éascú agus a áiritheofar go ndéanfar rochtain ar Thiachóga le haghaidh Ghnó na hEorpa agus ar a bhfeidhmeanna a rialú agus go mbeidh siad in-iniúchta. Leis an gcóras sin, ba cheart rochtain ar sheirbhísí agus ar idirbhearta laistigh den Tiachóg le haghaidh Ghnó na hEorpa a rialú, agus sláine chéannacht na n-úinéirí á caomhnú. Ba cheart a thuiscint gur de chineál teicniúil iad na húdaruithe sin a dheonaítear trí na córais agus nach ndéanann siad cumhacht aturnae ná sainordú dlíthiúil, dá bhforáiltear faoin dlí agus nósanna imeachta náisiúnta nó faoi dhlí agus nósanna imeachta an Aontais is infheidhme, a chruthú, a theorannú ná nach ndéanann siad difear dóibh ar bhealach eile.

⁷ Treoir (AE) 2025/25 ó Pharlaimint na hEorpa agus ón gComhairle an 19 Nollaig 2024 lena leasaítear Treoracha 2009/102/CE agus (AE) 2017/1132 a mhéid a bhaineann le húsáid uirlisí agus próiseas digiteach i ndlí na gcuideachtaí a leathnú agus a uasghrádú tuilleadh (IO L, 2025/25, 10.1.2025, ELI: <http://data.europa.eu/eli/dir/2025/25/oj>).

- (19) Chun idirbhearta gnó trasteorann a éascú, ualaí riaracháin a laghdú, agus fás eacnamaíoch a chur chun cinn, is gá creat dlíthiúil soiléir intuartha a bhunú lena n-aithnítear an choibhéis dhlíthiúil idir úsáid na dTiachóg le haghaidh Ghnó na hEorpa, nó a gcroífhaidhmiúlachtaí, agus an bhealaigh cumarsáide slán i gcás ina n-úsáideann daoine féinfhostaithe agus trádálaithe aonair an bealach cumarsáide slán sin, agus modhanna eile a nglactar leo i gcás oibreoirí eacnamaíocha chun doiciméid a shainaithe, a fhíordheimhniú agus a chur isteach agus fógraí a fháil agus iad ag idirghníomhú le comhlachtaí earnála poiblí san Aontas. Chuige sin, ba cheart an éifeacht dhlíthiúil chéanna a bheith ag úsáid croífhaidhmiúlachtaí Tiachóige le haghaidh Ghnó na hEorpa, nó ag an mbealach cumarsáide slán i gcás ina n-úsáideann daoine féinfhostaithe agus trádálaithe aonair é, amhail is dá ndéanfaí go dleathach é i bpearsa, ar pháipéar, nó ar aon mhodh nó trí aon phróiseas eile a mheasfaí a bheith i gcomhréir leis na ceanglais dlí, riaracháin nó nós imeachta is infheidhme ar shlí eile.
- (20) Chun eispéireas comhsheasmhach úsáideora Tiachóige le haghaidh Ghnó na hEorpa a áirithiú agus chun fóntas, iontaofacht agus idir-inoibritheacht Tiachóg le haghaidh Ghnó na hEorpa a ráthú ar fud an Aontais, ba cheart do sholáthraithe Tiachóg le haghaidh Ghnó na hEorpa croí-thacar feidhmiúlachtaí a chur chun feidhme. Ba cheart dóibh an tsaoirse a choinneáil chun gnéithe breise a thairiscint mar chuid dá dtairiscint tráchtála, chun nuálaíocht a chothú agus chun freagairt do riachtanais an mhargaidh. Ba cheart do sholáthraithe Tiachóg le haghaidh Ghnó na hEorpa inrochtaineacht a chur ar fáil freisin do dhaoine faoi mhíchumas, lena n-áirítear i gcomhréir le hIarscríbhinn I a ghabhann le Treoir (AE) 2019/882, a mhéid is ábhartha. Chun coinníollacha aonfhoirmeacha a áirithiú maidir le forbairt agus úsáid na gcroífhaidhmiúlachtaí, ba cheart cumhachtaí cur chun feidhme a thabhairt don Choimisiún chun na ceanglais agus na sonraíochtaí teicniúla is gá a leagan amach chun idir-inoibritheacht agus feidhmiú rianúil ar fud an Aontais a áirithiú. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle⁽⁸⁾ agus ba cheart a áireamh iontu na cumhachtaí chun na caighdeáin agus na prótacail is gá a shainiú don bhealach cumarsáide slán, agus na forbairtí teicneolaíocha is déanaí a gcur san áireamh.

⁸ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13, ELI: <http://data.europa.eu/eli/reg/2011/182/oj>).

- (21) Le Tiachóga le haghaidh Ghnó na hEorpa, ba cheart na hidirghníomhaíochtaí casta idir oibreoirí eacnamaíocha agus comhlachtaí earnála poiblí a shimpliú, agus d'fhéadfaí idirghníomhaíochtaí idir oibreoirí eacnamaíocha iad féin a éascú freisin, rud a laghdódh an t-ualach riaracháin ar oibreoirí eacnamaíocha i raon leathan earnálacha eacnamaíocha. Chun an nuálaíocht agus an t-iomaíochas a chothú, le Tiachóga le haghaidh Ghnó na hEorpa ba cheart cásanna úsáide earnáilsonracha a chumasú agus éifeachtúlachtaí oibríochtúla a fheabhsú, agus solúbthacht agus inoiriúnaitheacht á n-áirithiú an tráth céanna chun tacú le ceanglais uathúla earnálacha éagsúla, lena n-áirítear an talmhaíocht, an fuinneamh, an comhshaol, comhordú na slándála sóisialta, ach gan a bheith teoranta dóibh sin amháin.
- (22) Le húsáid na dTiachóg le haghaidh Ghnó na hEorpa sna comhthéacsanna sin, is féidir cabhrú le costais a laghdú agus raon leathan feidhmeanna agus cásanna úsáide a chur chun cinn ar fud an Aontais, amhail dearbhuithe a chur isteach, iarratais ar chistiú poiblí, rochtain ar sheirbhísí poiblí agus comhroinnt shlán sonraí agus rochtain shlán laistigh de spásanna sonraí a éascú, amhail deimhnithe A1 a chur isteach maidir le hoibrithe ar postú dá bhforáiltear faoi Rialachán (AE) 883/2004.
- (23) Le bunú na dTiachóg le haghaidh Ghnó na hEorpa in éineacht leis an gCóras Teicniúil Aonuaire, meastar go gcruthófar sineirgí cumhachtacha lena n-uasmhéadófar éifeachtúlacht agus éascaíocht oibríochtúil. Go háirithe, ba cheart d'oibreoirí eacnamaíocha a bheith in ann Tiachóga le haghaidh Ghnó na hEorpa a úsáid chun fianaise arna haisghabháil ó údaráis phoiblí inniúla a choinneáil agus a tharchur agus úsáid á baint as comhpháirteanna an Chórais Theicniúil Aonuaire. I gcás inarb iomchuí, ba cheart d'oibreoirí eacnamaíocha a bheith in ann fianaise atá sna Tiachóga le haghaidh Ghnó na hEorpa a chomhcheangal le fianaise a aisghabhtar tríd an gCóras Teicniúil Aonuaire i gcomhthéacs nósanna imeachta poiblí. Dá bhrí sin, ach ardán digiteach slán a sholáthar chun doiciméid ghnó a stóráil agus a mhalartú, ba cheart do Thiachóga le haghaidh Ghnó na hEorpa malartú na ndoiciméad sin a aisghabhtar tríd an gCóras Teicniúil Aonuaire idir comhlachtaí earnála poiblí a éascú.

- (24) Chun comhordú a áirithiú idir digitiú leanúnach an Aontais ar an gcomhar breithiúnach, nuachóiriú ar mhalartú slán faisnéise trasteorann, agus an gá atá le huirlisí digiteacha éifeachtúla a sholáthar d'oibreoírí eacnamaíocha chun idirghníomhú leis na húdaráis, is gá creat comhleanúnach a bhunú lena gcumasófar idirghníomhaíocht rianúil idir na córais ábhartha sin. Trí chomhordú den sórt sin a fheabhsú, laghdófar an t-ualach riaracháin, cuirfear feabhas ar dheimhneacht dhlíthiúil, agus neartófar éifeachtacht an chomhair trasteorann, trína áirithiú go bhfeidhmeoidh na bealaí cumarsáide a úsáideann oibreoírí eacnamaíocha go rianúil laistigh de mhargadh digiteach na hEorpa. Sa chomhthéacs sin, le Tiachóga le haghaidh Ghnó na hEorpa ba cheart na córais a leagtar amach i Rialachán (AE) 2023/2844 agus i Rialachán (AE) 2023/969 a chomhlánú, agus ba cheart idirghníomhaíocht rianúil idir na córais sin agus na Tiachóga le haghaidh Ghnó na hEorpa a choinneáil ar bun trí thairseach na dTiachóg le haghaidh Ghnó na hEorpa, rud a chuirfeadh ar chumas na n-údarás ábhartha na córais sin a choinneáil ar bun agus simpliú do chuideachtaí Eorpacha á chur chun cinn an tráth céanna.
- (25) Chun malartú solúbtha éifeachtúil faisnéise agus seirbhísí a éascú agus Tiachóga le haghaidh Ghnó na hEorpa á n-úsáid, agus chun comhtháthú rianúil na dTiachóg le haghaidh Ghnó na hEorpa le réitigh chéannachta digití atá ann cheana a áirithiú, ba cheart é a bheith indéanta Tiachóga Eorpacha Céannachta Digití, modhanna ríomh-shainaitheantais ar tugadh fógra ina leith agus ríomhdhearbhuithe tréithe a úsáid le haghaidh an phróisis ionductaithe a bhaineann le Tiachóga le haghaidh Ghnó na hEorpa agus chun rochtain ar na Tiachóga sin a bhainistiú. Leis sin, ba cheart é a chur ar a gcumas d'úsáideoirí Tiachóige le haghaidh Ghnó na hEorpa céannachtaí digiteacha agus ríomhdhearbhuithe tréithe atá ann cheana a ghíaráil chun rochtain a fháil ar Thiachóga le haghaidh Ghnó na hEorpa, agus ar an gcaoi sin an próiseas ionductaithe a chuíchóiriú agus eispéireas foriomlán úsáideora Tiachóige le haghaidh Ghnó na hEorpa a fheabhsú. Le húsáid ríomhdhearbhuithe tréithe i gcomhthéacs na dTiachóg le haghaidh Ghnó na hEorpa, ba cheart freastal ar riachtanais éagsúla úinéirí Tiachóige le haghaidh Ghnó na hEorpa agus féadfar iad a úsáid chun fíorú slán iontaofa príomh-shaintréithe a eisiúint agus a chumasú, amhail seoladh reatha úinéara, uimhir chlárúcháin CBL, uimhir thagartha cánach, Aitheantóir Eintitis Dhlítheanaigh (LEI), uimhir Chláráithe agus Aitheantais Oibreoírí Eacnamaíocha (EORI) agus uimhir mháil. Le Tiachóga le haghaidh Ghnó na hEorpa ba cheart tacú le raon leathan cásanna úsáide, idir fhíordheimhniú agus sainaitheint shimplí agus idirbhearta agus idirghníomhaíochtaí níos casta.

- (26) Chun oibriú slán iontaofa na dTiachóg le haghaidh Ghnó na hEorpa a áirithiú, ba cheart do sholáthraithe Tiachóg le haghaidh Ghnó na hEorpa a áirithiú go bhfuil gach Tiachóg le haghaidh Ghnó na hEorpa a sholáthraíonn siad réamhchumraithe chun idirghníomhú le seirbhísí iontaoibhe áirithe, a bhfuil gá leo chun croífheidhmiúlachtaí na dTiachóg le haghaidh Ghnó na hEorpa a chumasú, lena n-áirítear ríomhshínithe cáilithe a chruthú, ríomhshéalaí cáilithe a chruthú, agus ríomhdhearbhuithe tréithe cáilithe agus neamhcháilithe a eisiúint agus a bhailíochtú. Chun tacú leis na feidhmiúlachtaí sin, trí bhíthin na Tiachóige le haghaidh Ghnó na hEorpa ba cheart a bheith in ann faisnéis shonrach agus doiciméid shonracha a bhaineann leis an úinéir a chomhroinnt, a stóráil agus a fhíorú, amhail teachtaireachtaí agus doiciméid don bhealach cumarsáide slán, doiciméid shínithe agus shéalaithe, agus tacair tréithe le haghaidh seirbhísí a bhaineann le fianú.
- (27) Chun gur féidir aitheantas dlíthiúil a thabhairt do ríomhdhearbhuithe tréithe a chuirtear i láthair trí Thiachóga le haghaidh Ghnó na hEorpa, is gá foráil a dhéanamh maidir le fianuithe nasctha a chruthú agus a bhailíochtú, lena mbeidh fianú amháin nasctha go cripteagrafach le ceann eile ar bhealach lena féidir barántúlacht agus sláine gach fianaithe aonair, agus na bhfianuithe uile nasctha i dteannta a chéile, a fhíorú. Chuige sin, le bonneagar na dTiachóg le haghaidh Ghnó na hEorpa, trí úsáid a bhaint as an slabhra fianuithe, ba cheart a bheith in ann aon ásc amháin d'fhianú a chur isteach agus a athúsáid ina dhiaidh sin thar nósanna imeachta ábhartha a éascú. Leis an bhfeidhmiúlacht sin, ba cheart úinéirí Tiachóige le haghaidh Ghnó na hEorpa a bheith in ann tagairt do dhoiciméad a tharchur i gcás inarb iomchuí le heilimint chripteagrafach, amhail hais-eochair d'fhianú séalaithe arna eisiúint ag Tiachóg le haghaidh Ghnó na hEorpa, agus ar an gcaoi sin sláine agus barántúlacht an taiscthe bunaidh a fhianú.

- (28) Chun a áirithiú go n-áiritheofar leis na caighdeáin agus na sonraíochtaí teicniúla le haghaidh Tiachóga le haghaidh Ghnó na hEorpa idir-inoibritheacht agus slándáil ar fud réitigh éagsúla, is gá na caighdeáin agus na prótacail le haghaidh na gcroífheidhmiúlachtaí agus na ceanglais theicniúla do Thiachóga le haghaidh Ghnó na hEorpa a shainiú in Iarscríbhinn a ghabhann leis an Rialachán seo. Ba cheart na ceanglais maidir le cur chun feidhme na dTiachóg le haghaidh Ghnó na hEorpa a leagan amach san Iarscríbhinn. Chun inmharthanacht agus éifeachtacht fhadtéarmach na dTiachóg le haghaidh Ghnó na hEorpa a áirithiú, ba cheart cumhachtaí cur chun feidhme a thabhairt don Choimisiún chun na nósanna imeachta agus na sonraíochtaí teicniúla maidir le cur chun feidhme na gcroífheidhmiúlachtaí a bhunú agus a thabhairt cothrom le dáta, rud a d'fhágfadh go bhféadfaí gnéithe breise agus teicneolaíochtaí nua a chomhtháthú lena gcumasófaí cásanna úsáide nua, amhail intleacht shaorga ghníomhach nó céannacht dhigiteach a sholáthar do shócmhainn úinéara, agus rud a chuirfeadh ar chumas na dTiachóg le haghaidh Ghnó na hEorpa leanúint de thacaíocht a thabhairt do riachtanais athraitheacha na n-oibreoirí eacnamaíocha ar bhealach slán iontaofa. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle. A mhéid is féidir, ba cheart a chur san áireamh i gcaighdeáin agus sonraíochtaí teicniúla na Tiachóige le haghaidh Ghnó na hEorpa réitigh agus caighdeáin theicniúla ábhartha a úsáideann oibreoirí eacnamaíocha sna córais TFC atá ann cheana, rud a d'éascódh ailíniú na gcóras sin leis an Tiachóg le haghaidh Ghnó na hEorpa agus a d'fhágfadh go mbeidís idir-inoibritheach léi. Moltar do sholáthraithe cód foinseach bhogearraí feidhmchláir Thiachóga le haghaidh Ghnó na hEorpa a scaoileadh faoi cheadúnas foinse oscailte.
- (29) Chun tacú le forbairt thráthúil an mhargaidh do Thiachóga le haghaidh Ghnó na hEorpa, ba cheart tosaíocht a thabhairt do ghlacadh na ngníomhartha cur chun feidhme maidir le croífheidhmiúlachtaí agus na sonraíochtaí teicniúla a ghabhann leo. I gcás inarb iomchuí, ba cheart dóibh sin cur leis na caighdeáin atá ann cheana, lena n-áirítear na caighdeáin a leagtar amach sa Chreat Ailtireachta agus Tagartha dá bhforáiltear i gcomhthéacs Rialachán (AE) Uimh. 910/2014, chun tacú le hathúsáid caighdeán teicniúil seanbhunaithe agus le glacadh na dTiachóg le haghaidh Ghnó na hEorpa. Ba cheart na gníomhartha cur chun feidhme sin a bheith ina dtreoir maidir leis na bearta eagraíochtúla agus teicniúla iomchuí ba cheart do na Ballstáit a dhéanamh chun úsáid chroífheidhmiúlachtaí na dTiachóg le haghaidh Ghnó na hEorpa a chumasú agus chun a n-oibleagáidí faoin Rialachán seo a chomhlíonadh.

(30) Chun an leibhéal iomchuí iontaoibhe, feidhmiúlachta agus slándála a áirithiú do Thiachóga le haghaidh Ghnó na hEorpa chun a seirbhísí a sholáthar ar bhonn trasteorann, lena n-áirítear chun an riosca calaoise a mhaolú, ba cheart soláthraithe Tiachóg le haghaidh Ghnó na hEorpa a bheith faoi réir ceanglais agus oibleagáidí soiléire comhréireacha gan bheith faoi réir ceanglais náisiúnta bhreise. Chuige sin, ba cheart an chumhacht a thabhairt don Choimisiún Eorpach gníomhartha cur chun feidhme a ghlacadh chun liosta de chaighdeáin tagartha agus, i gcás inar gá, sonraíochtaí agus nósanna imeachta a bhunú do sholáthraithe Tiachóg le haghaidh Ghnó na hEorpa. Ba cheart go gcumhdófaí leis na gníomhartha cur chun feidhme sin, go háirithe, cur chun feidhme na dTiachóg le haghaidh Ghnó na hEorpa, bainistiú rioscaí díreacha nó indíreacha a bhaineann le soláthar na dTiachóg le haghaidh Ghnó na hEorpa, nósanna imeachta clárúcháin agus ionductaithe maidir le Tiachóga le haghaidh Ghnó na hEorpa. Chun a áirithiú go ndéanfar measúnú comhsheasmhach ar rioscaí ar fud an Aontais agus go ndéanfaidh soláthraithe bearta saincheaptha bunaithe ar an earnáil, ar chás úsáide, ar shlándáil comhéadain agus ar infhaighteacht seirbhíse a dTiachóg le haghaidh Ghnó na hEorpa, ba cheart an chumhacht a thabhairt don Choimisiún gníomhartha cur chun feidhme a ghlacadh lena leagfar síos nósanna imeachta comhchoiteanna, clár rioscaí agus critéir le haghaidh measúnuithe riosca agus féinmheasúnuithe. Chun dúbailt agus ualach riaracháin nach bhfuil gá leo a sheachaint, ba cheart d'iarratasóirí a bheith in ann brath ar dheimhnithe, féinmheasúnuithe agus doiciméadacht a rinneadh cheana faoi dhlí eile is infheidhme de chuid an Aontais, amhail Rialachán (AE) Uimh. 910/2014 agus Rialachán (AE) 2024/2847, i gcás ina gcumhdaítear leo ceanglais nó rioscaí a chomhfhreagraíonn do na ceanglais a leagtar amach sa Rialachán seo. Ba cheart d'iarratasóirí an comhthéacs praiticiúil ina n-úsáidfear Tiachóga le haghaidh Ghnó na hEorpa a chur san áireamh, lena n-áirítear aon cheanglas slándála ábhartha a bhfuil feidhm aige faoin dlí náisiúnta maidir leis an tseirbhís shonrach nó leis an nós imeachta sonrach lena mbaineann.

- (31) Chun maoirseacht chuí a áirithiú i gcomhréir leis an Rialachán seo, ba cheart a cheangal ar eintitis ar mhaith leo a bheith ina soláthraithe Tiachóg le haghaidh Ghnó na hEorpa iarratas ar údarú a chur isteach chun Tiachóga le haghaidh Ghnó na hEorpa den sórt sin a sholáthar do na comhlachtaí maoirseachta sula dtáirgfídh siad a gcuid seirbhísí. Chun sláine agus cuntasacht sholáthraithe Tiachóg le haghaidh Ghnó na hEorpa a choimirciú agus chun slándáil na sonraí a stóráiltear nó a mhalartaítear in éiceachóras na dTiachóg le haghaidh Ghnó na hEorpa a áirithiú, ba cheart soláthraithe a bheith bunaithe laistigh den Aontas agus ba cheart a bpríomháit ghnó agus a bpríomhoibríochtaí a bheith acu san Aontas. Ba cheart a áirithiú leis sin go dtagann na soláthraithe sin faoi dhlínse agus faoi mhaoirseacht comhlachta inniúil i mBallstát, rud a fhágann gur féidir an Rialachán seo a fhorfheidhmiú go héifeachtach agus cearta agus sonraí úsáideoirí Tiachóg le haghaidh Ghnó na hEorpa a chosaint. Thairis sin, níor cheart riosca do shlándáil an Aontais a bheith ag baint le soláthraithe Tiachóg le haghaidh Ghnó na hEorpa, is é sin trí gan a bheith faoi réir rialú ag tríú tír nó ag eintiteas tríú tír, chun a áirithiú go leanfaidh bonneagar digiteach criticiúil an Aontais de bheith slán agus athléimneach. I gcomhréir leis na ceanglais a leagtar amach sa Rialachán seo, féadfaidh an Coimisiún gníomhartha cur chun feidhme a ghlacadh chun comhar agus idir-inoibritheacht a áirithiú le réitigh arna mbunú nó arna bhformhuiniú ag comhpháirtithe an Aontais atá ar aon intinn leis.
- (32) Ní mór don Aontas a leas slándála a chosaint ar sholáthraithe a d'fhéadfadh a bheith ina riosca slándála leanúnach nó géar mar gheall ar an gcur isteach a d'fhéadfadh a bheith ann ó thríú tíortha. Chuige sin, is gá laghdú a dhéanamh ar an riosca a bhaineann le spleáchais straitéiseacha ar sholáthróirí ardriosca sa mhargadh inmheánach, lena n-áirítear sa slabhra soláthair TFC, toisc go bhféadfadh tionchair dhiúltacha thromchúiseacha a bheith acu ar shlándáil oibreoirí eacnamaíocha agus comhlachtaí earnála poiblí ar fud an Aontais agus ar bhonneagar criticiúil an Aontais, go háirithe maidir le sláine, rúndacht agus infhaighteacht sonraí agus seirbhísí. Ba cheart aon srian a bheith bunaithe ar mheasúnú riosca comhréireach agus ar bhearta maolaithe comhfhreagracha mar a shainítear i mbeartais agus i ndlíthe an Aontais. D'fhéadfadh feidhm a bheith ag na srianta sin, mar shampla, maidir le soláthróirí ardriosca, mar a shainithnítear faoi dhlí an Aontais.

- (33) Chun céannacht oibreoirí eacnamaíocha a shuí ar bhealach slán iontaofa, ba cheart a cheadú leis an Rialachán seo ríomhdhearbhuithe tréithe cáilithe a úsáid chun sonraí aitheantais úinéara Tiachóige le haghaidh Ghnó na hEorpa a eisiúint. Is féidir ríomhdhearbhuithe tréithe cáilithe a thabhairt cothrom le dáta nó a chúlghairm go héasca. Trí ríomhdhearbhuithe tréithe cáilithe a úsáid chun céannacht oibreoirí eacnamaíocha a eisiúint, soláthraítear réiteach éifeachtúil slán atá oiriúnach do riachtanais an gheilleagair dhigitigh. Soláthraithe seirbhísí iontaoibhe cáilithe a eisíonn na fianuithe sin, rialaítear iad faoi Rialachán (AE) Uimh. 910/2014 agus tá siad faoi réir ceanglais dhochta agus grinnscrúdú dian, rud a áiríthíonn ardleibhéal slándála agus iontaoibhe sa phróiseas eisiúna. Is éard atá sna foinsí barántúla a úsáidtear chun na sonraí atá sna ríomhdhearbhuithe tréithe cáilithe a fhíorú cláir ghnó agus cláir eile, agus ba cheart úsáid Chóras Idirnasctha na gClár Gnó agus Chóras Idirnasctha na gClár Úinéireachta Tairbhiúla a chur chun cinn chun fíorú na sonraí sin a éascú, agus ar an gcaoi sin cruinneas agus iontaofacht na sonraí aitheantais a áirithiú.
- (34) Níor cheart don Rialachán seo difear a dhéanamh d'fheidmiú ná do ról na gclár gnó mar fhoinsí barántúla agus níor cheart dó an bealach a n-oibríonn siad ná na sonraí a chomhdaítear iontu a athrú ach ba cheart dó cur leis an mbonneagar atá ann cheana agus é a chomhlánú. I ndáil leis sin, i gcás ina n-eisíonn foinse bharántúil ríomhdhearbhuithe tréithe nó ina n-eisítear iad thar a ceann, amhail clár gnó, d'fhéadfaí na sonraí ábhartha a eisiúint go díreach ón gclár, rud a chuirfeadh tuilleadh feabhais ar shlándáil agus ar iontaofacht an phróisis sainaitheantais.
- (35) Le Rialachán (AE) Uimh. 910/2014, ceanglaítear ar na Ballstáit a áirithiú go ndéanfar bearta chun é a chur ar a gcumas do sholáthraithe seirbhísí iontaoibhe cáilithe barántúlacht na dtréithe a liostaítear in Iarscríbhinn VI a ghabhann le Rialachán (AE) Uimh. 910/2014 a fhíorú trí mheán leictreonach, arna iarraidh sin d'úsáideoir na Tiachóige le haghaidh Ghnó na hEorpa, amhail cáilíochtaí oideachais agus gairmiúla, teidil agus ceadúnais, cumhachtaí agus sainorduithe chun ionadaíocht a dhéanamh do dhaoine nádúrtha nó dlítheanacha, ceadanna agus ceadúnais phoiblí agus sonraí airgeadais agus cuideachta. Leis an gcreat um Thiachóga le haghaidh Ghnó na hEorpa, ba cheart cur leis an gceanglas sin atá ann cheana gur cheart na sonraí oifigiúla uile atá ábhartha d'oibreoirí eacnamaíocha i gcomhthéacs na dTiachóg le haghaidh Ghnó na hEorpa a chumhdach agus fíorú leictreonach tréithe a chumasú chun eisiúint sonraí aitheantais úinéara Tiachóige le haghaidh Ghnó na hEorpa agus ríomhdhearbhuithe tréithe eile a éascú.

(36) Ós rud é gur cheart do gach oibreoir eacnamaíoch agus eintiteas a dhéanann gníomhaíochtaí eacnamaíocha a bheith in ann Tiachóga le haghaidh Ghnó na hEorpa a úsáid, lena n-áirítear daoine féinfhostaithe agus trádálaithe aonair, ba cheart sonraí aitheantais úinéara Tiachóige le haghaidh Ghnó na hEorpa a sholáthar ar bhealach atá deartha go sonrach chun a gcéannacht agus a dtréithe dearbhaithe a fhíorú laistigh de chomhthéacs gnó. Chun comhsheasmhacht le creataí an Aontais atá ann cheana a áirithiú agus chun idir-inoibritheacht trasteorann a éascú, leis an gcreat um Thiachóga le haghaidh Ghnó na hEorpa ba cheart úsáid a bhaint as an Aitheantóir Uathúil Eorpach dá bhforáiltear leis an Treoir chódaithe maidir le Dlí na gCuideachtaí (AE) 2017/1132⁽⁹⁾ agus le Rialachán Cur Chun Feidhme (AE) 2021/369⁽¹⁰⁾ ón gCoimisiún chomh maith le Rialachán (AE) 2024/1624⁽¹¹⁾ agus Rialachán Cur Chun Feidhme (AE) 2021/369 ón gCoimisiún⁽¹²⁾. Sanntar Aitheantóir Uathúil Eorpach do chuideachtaí agus d'eintitis dhlíthiúla eile chomh maith le socrúithe amhail iontaobhais chun gur féidir iad a shainaithint go haonchiallach i gcásanna trasteorann. Cuirtear an tAitheantóir Uathúil Eorpach ar fáil go poiblí faoi láthair trí Chóras Idirnasctha na gClár Gnó agus úsáideann Córas Idirnasctha na gClár Úinéireachta Tairbhiúla é. Dá réir sin, ba cheart an creat um Thiachóga le haghaidh Ghnó na hEorpa a bheith ag brath ar phróiseas eisiúna agus taifeadta Aitheantóirí Uathúla Eorpacha mar mhodh chun fíorú a dhéanamh ar chéannacht na n-oibreoirí eacnamaíocha dá soláthraítear Aitheantóirí Uathúla Eorpacha i gcomhréir le Treoir (AE) 2017/1132. Ba cheart an creat um Thiachóga le haghaidh Ghnó na hEorpa a bheith ag brath ar phróiseas eisiúna agus taifeadta Aitheantóirí Uathúla Eorpacha i gcás oibreoirí eacnamaíocha eile a thagann faoi Threoir (AE) 2015/849.

⁹ Treoir (AE) 2017/1132 ó Pharlaimint na hEorpa agus ón gComhairle an 14 Meitheamh 2017 maidir le gnéithe áirithe de dhlí na gcuideachtaí (códú) (IO L 169, 30.6.2017, lgh. 46–127, ELI: <https://eur-lex.europa.eu/eli/dir/2017/1132/oj>)

¹⁰ Rialachán (AE) 2024/1624 ó Pharlaimint na hEorpa agus ón gComhairle an 31 Bealtaine 2024 maidir le cosc a chur ar úsáid an chórais airgeadais chun críocha an sciúrtha airgid nó mhaoiniú na sceimhlitheoireachta (IO L, 2024/1624, 19.6.2024, ELI: <https://eur-lex.europa.eu/eli/reg/2024/1624/oj>)

¹¹ Rialachán (AE) 2024/1624 ó Pharlaimint na hEorpa agus ón gComhairle an 31 Bealtaine 2024 maidir le cosc a chur le húsáid an chórais airgeadais chun críocha sciúrtha airgid nó mhaoiniú na sceimhlitheoireachta, agus lena leasaítear Rialacháin (AE) Uimh. 1093/2010, (AE) Uimh. 1094/2010 agus (AE) Uimh. 1095/2010 (IO L ..., 19.6.2024, ELI: <https://eur-lex.europa.eu/eli/reg/2024/1624/oj>)

¹² Rialachán Cur Chun Feidhme (AE) 2021/369 ón gCoimisiún an 1 Márta 2021 lena mbunaítear na sonraíochtaí teicniúla agus na nósanna imeachta teicniúla le haghaidh an chórais um idirnasctha na gelár lárnach dá dtagraítear i dTreoir (AE) 2015/849 ó Pharlaimint na hEorpa agus ón gComhairle (IO L 71, 2.3.2021, lgh. 11–17, ELI: https://eur-lex.europa.eu/eli/reg_impl/2021/369/oj)

(37) Chun a áirithiú gur féidir na húinéirí uile a bhfuil Tiachóg le haghaidh Ghnó na hEorpa acu a shainnint go hiontaofa agus go mbaineann a ríomhdhearbhú tréithe le heintiteas uathúil, is gá freisin aitheantóir uathúil a shannadh d'oibreoírí eacnamaíocha eile agus do chomhlachtaí eanála poiblí. Chun coinníollacha aonfhoirmeacha a áirithiú maidir le haitheantóirí uathúla a chur chun feidhme, go háirithe a n-éifeachtacht agus a gcomhsheasmhacht, ba cheart cumhachtaí cur chun feidhme a thabhairt don Choimisiún chun na ceanglais mhionsonraithe le haghaidh na n-aitheantóirí uathúla a shonrú. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011. I bhfianaise na gcur chuige éagsúil i measc na mBallstát maidir le roinnt oibreoírí eacnamaíocha agus comhlachtaí eanála poiblí a chlárú, tá sé tábhachtach trédhearcacht agus inrochtaineacht a áirithiú do sholáthraithe sonraí aitheantais úinéara Tiachóige le haghaidh Ghnó na hEorpa. Chuige sin, ba cheart do na Ballstáit fógra a thabhairt don Choimisiún faoi na foinsí barántúla atá ábhartha maidir le sonraí aitheantais úinéara Tiachóige le haghaidh Ghnó na hEorpa a eisiúint.

- (38) Chun feidhmiú éifeachtúil, slán agus trédhearcach an chreata um Thiachóga le haghaidh Ghnó na hEorpa a áirithiú, is gá Eolaire Digiteach Eorpach a bhunú, ina bhfuil sonraí pearsanta oibreoirí eacnamaíocha. Ba cheart an chumhacht a thabhairt don Choimisiún an tEolaire Digiteach Eorpach sin a chur ar bun agus a choinneáil ar bun, mar fhoinse iontaofa faisnéise faoi oibreoirí eacnamaíocha agus faoi chomhlachtaí earnála poiblí a úsáideann Tiachóga le haghaidh Ghnó na hEorpa. Leis an Eolaire Digiteach Eorpach, ba cheart a bheith in ann teagmháil a dhéanamh go héasca le húinéirí Tiachóige le haghaidh Ghnó na hEorpa chun deimhneacht dhlíthiúil a chur chun cinn i ndáil le déileálacha idir gnólachtaí agus i ndáil le hidirghníomhaíochtaí le comhlachtaí earnála poiblí, go háirithe d'fhonn trádáil idir na Ballstáit a chur chun cinn. Ba cheart do Sholáthraithe Tiachóige le haghaidh Ghnó na hEorpa, agus iad i gcomhar leis an gCoimisiún, an fhaisnéis is gá a chur isteach chun tacú le feidhmiú an Eolaire Dhigitigh Eorpaigh agus dul i gcomhar leis na soláthraithe seirbhísí iontaoibhe cáilithe ábhartha, le soláthraithe ríomhdhearbhuithe tréithe arna n-eisiúint ag comhlacht earnála poiblí atá freagrach as foinse bharántúil nó thar a cheann, agus foinsí barántúla, chun a áirithiú go leanfaidh na sonraí a chuirtear isteach de bheith cruinn. Leis na gníomhaíochtaí sin, níor cheart ceanglas a chruthú go hindíreach ar oibreoirí eacnamaíocha an fhaisnéis sin a thabhairt cothrom le dáta. I ndáil leis an méid sin, beidh an tEolaire Digiteach Eorpach ag brath ar an bhfaisnéis a chuirfidh cláir ghnó ar fáil, lena n-áirítear iad siúd a bhfuil rochtain orthu trí BRIS, ach gan a bheith teoranta dóibh, agus é á áirithiú ag an am céanna nach ndéanfar an fhaisnéis sin a dhúbailt. Chun a áirithiú gur féidir le comhlachtaí earnála poiblí úsáid Tiachóg le haghaidh Ghnó na hEorpa a chumasú agus a n-oibleagáidí faoin Rialachán seo a chomhlíonadh, ceanglaítear ar oibreoirí eacnamaíocha iad a shainaitheint agus go rachaidh siad i dteagmháil leo trí úsáid a bhaint as príomhfheidhmeanna éiceachóras na Tiachóige le haghaidh Ghnó na hEorpa. Chuige sin, ba cheart aitheantóir uathúil agus seoladh digiteach a eisiúint do chomhlachtaí earnála poiblí nach úinéirí Tiachóg le haghaidh Ghnó na hEorpa iad agus ba cheart iad a liostú san Eolaire Digiteach Eorpach.
- (39) Tá feidhm ag Rialachán (AE) 2016/679 ó Pharlaimint na hEorpa agus ón gComhairle maidir le gach gníomhaíocht próiseála sonraí pearsanta faoin Rialachán seo. I gcás ina n-áirítear próiseáil sonraí pearsanta in oibriú an Eolaire Dhigitigh Eorpaigh, déanfar é sin i gcomhréir leis na prionsabail ábhartha maidir le cosaint sonraí, amhail prionsabal an íoslaghdaíthe sonraí agus an teorannaithe de réir cuspóra, oibleagáidí, amhail cosaint sonraí trí dheardh agus mar réamhshocrú, agus áireofar leis, i gcás inarb iomchuí, gnéithe d'ainm bréige a chur i bhfeidhm.

- (40) Chun cothromaíocht a bhaint amach idir ualáí rialála agus slándáil, ba cheart foráil a dhéanamh maidir le maoirseacht ar sholáthraithe Tiachóg le haghaidh Ghnó na hEorpa agus maidir le faireachán a dhéanamh ar a ngníomhaíochtaí, agus measúnú roimh ré ar a n-oibríochtaí á éileamh ag an am céanna. Leis an gcur chuige sin, ba cheart timpeallacht rialála níos solúbtha agus níos éifeachtúla a bheith ann, agus na coimircí is gá á gcoinneáil ar bun an tráth céanna chun úsáideoirí Tiachóige le haghaidh Ghnó na hEorpa a chosaint agus chun comhlíonadh cheanglais an chreata um Thiachóga le haghaidh Ghnó na hEorpa a áirithiú. Ba cheart an próiseas údaraithe do sholáthraithe Tiachóg le haghaidh Ghnó na hEorpa a chúchóiriú agus a dhéanamh éifeachtúil, agus ba cheart ceanglais agus amlínte soiléire a bheith ann d'iarratasóirí. Mar chuid den phróiseas údaraithe sin, ba cheart d'iarratasóirí a bhfuil sé beartaithe acu Tiachóga le haghaidh Ghnó na hEorpa a sholáthar a léiriú go bhfuil na ceanglais a leagtar amach in Airteagail 5, 6 agus 7 á gcomhlíonadh trí thuarascáil féinmheasúnaithe agus ba cheart do chomhlachtaí maoirseachta a mheas an bhfuil ceanglais an Rialacháin seo á gcomhlíonadh. Ba cheart don Choimisiún treoir a sholáthar maidir leis an tuarascáil féinmheasúnaithe chun comhsheasmhacht a áirithiú agus chun measúnú ar chur i bhfeidhm ag maoirseoirí a éascú. Ba cheart do sholáthraithe seirbhísí iontaoibhe cáilithe, atá faoi réir creat rialála láidir cheana féin faoi Rialachán (AE) Uimh. 910/2014, tairbhe a bhaint as próiseas an-éadrom chun bheith in ann Tiachóga le haghaidh Ghnó na hEorpa a sholáthar.
- (41) Chun trédhearcacht agus cuntasacht a áirithiú in éiceachóras na Tiachóige le haghaidh Ghnó na hEorpa, ba cheart don Choimisiún liosta a bheidh ar fáil go poiblí de sholáthraithe údaraithe Tiachóg le haghaidh Ghnó na hEorpa a bhunú agus a choinneáil ar bun. Ba cheart a áireamh ar an liosta sin faisnéis arna tarchur ag na comhlachtaí maoirseachta náisiúnta maidir le soláthraithe, lena n-áirítear soláthraithe seirbhísí iontaoibhe cáilithe, a bhfuil an próiseas údarúcháin curtha i gcrích acu. Tríd an bhfaisnéis sin a chur ar fáil go poiblí, ba cheart go gcuirfí ar a gcumas d'úsáideoirí Tiachóige le haghaidh Ghnó na hEorpa barántúlacht agus iontaofacht soláthraithe a fhíorú, agus ar an gcaoi sin ardleibhéal slándála agus iontaoibhe in éiceachóras na Tiachóige le haghaidh Ghnó na hEorpa a chur chun cinn.

- (42) Tá maoirseacht éifeachtach arna déanamh ag comhlachtaí maoirseachta, a bhfuil cumhachtaí leordhóthanacha acu agus a gcuirtear acmhainní leordhóthanacha ar fáil dóibh, fíor-riachtanach chun a áirithiú go gcomhlíonfaidh Tiachóga le haghaidh Ghnó na hEorpa a chuirtear ar fáil san Aontas na ceanglais a leagtar síos sa Rialachán seo. Chun an fhormhaoirseacht agus an saineolas ábhartha sin a áirithiú ar an mbealach is fearr, agus chun cur i bhfeidhm agus forfheidhmiú an Rialacháin seo i ndáil le soláthraithe Tiachóg le haghaidh Ghnó na hEorpa, seachas eintitis den Aontas a áirithiú, ba cheart do na Ballstáit údarás inniúil a ainmniú chun gníomhú mar an comhlacht maoirseachta chun an Rialachán seo a chur i bhfeidhm agus a fhorfheidhmiú. I ndáil leis sin, féadfaidh na Ballstáit údaráis nua a bhunú nó brath ar údaráis atá ann cheana agus atá bunaithe ina gcríoch nó, ar chomhaontú frithpháirteach le Ballstát eile, comhlacht maoirseachta atá bunaithe sa Bhallstát eile sin a ainmniú.
- (43) Ba cheart aird chuí a thabhairt ar chomhar éifeachtach a áirithiú idir comhlachtaí maoirseachta arna n-ainmniú faoin Rialachán seo, Airteagal 46b de Rialachán (AE) Uimh. 910/2014 agus na húdaráis inniúla arna n-ainmniú nó arna mbunú de bhun Airteagal 8(1) de Threoir (AE) 2022/2555 ó Pharlaimint na hEorpa agus ón gComhairle¹³). Ós rud é gur eintitis ar leith iad na húdaráis inniúla, ba cheart dóibh oibriú i ndlúthchomhar agus go tráthúil, lena n-áirítear trí fhaisnéis ábhartha a mhalartú chun a áirithiú go ndéanfar maoirseacht éifeachtach ar sholáthraithe Tiachóige le haghaidh Ghnó na hEorpa agus go gcomhlíonfaidh siad na hoibleagáidí is infheidhme faoi Rialachán (AE) Uimh. 910/2014 agus faoi Threoir (AE) 2022/2555.

¹³ Treoir (AE) 2022/2555 ó Pharlaimint na hEorpa agus ón gComhairle an 14 Nollaig 2022 maidir le bearta le haghaidh ardleibhéal comhchoiteann cibearshlándála ar fud an Aontais, lena leasaítear Rialachán (AE) Uimh. 910/2014 agus Treoir (AE) 2018/1972 agus lena n-aisghairtear Treoir (AE) 2016/1148 (IO L 333, 27.12.2022, lch. 80–152, ELI: <https://eur-lex.europa.eu/eli/dir/2022/2555/oj>)

(44) Chun forfheidhmiú an Rialacháin seo a áirithiú, ba cheart an chumhacht a thabhairt do chomhlachtaí maoirseachta náisiúnta fineálacha riaracháin a fhorchur. Is gá uasteorainn na bhfineálacha riaracháin agus na critéir maidir lena gcinneadh a shonrú chun cóir chomhionann do sholáthraithe Tiachóg le haghaidh Ghnó na hEorpa a chur chun cinn ar fud an Aontais gan beann ar a mBallstát bunaíochta. Ba cheart don údarás maoirseachta inniúil measúnú a dhéanamh ar gach cás ar bhonn aonair, agus na himthosca ábhartha uile á gcur san áireamh, lena n-áirítear cineál, tromchúis agus fad an tsáraithe, a iarmhairtí agus aon bheart a rinneadh chun comhlíonadh a áirithiú agus díobháil a mhaolú. I ndáil leis sin, ba cheart do na Ballstáit fógra a thabhairt don Choimisiún faoi na rialacha a leagtar síos sa dlí náisiúnta lena gceadaítear don chomhlacht maoirseachta pionóis a fhorchur faoin [Oifig na bhFoilseachán, cuir isteach an dáta 24 mhí tar éis theacht i bhfeidhm an Rialacháin seo] agus ba cheart dóibh fógra a thabhairt don Choimisiún gan mhoill faoi aon leasuithe a dhéanfar ina dhiaidh sin ar na rialacha sin.

- (45) Chun feidhmiú cuí an mhargaidh inmheánaigh a áirithiú agus chun cearta úinéirí Tiachóige le haghaidh Ghnó na hEorpa a chosaint, is gá sásra a bhunú lena gcuirfear ar chumas an Choimisiúin idirghabháil a dhéanamh i gcásanna nach gcomhlíonann soláthraí Tiachóg le haghaidh Ghnó na hEorpa ceanglais an Rialacháin seo go córasach agus i gcás inar mhainnigh na húdaráis inniúla ábhartha gníomhaíochtaí feabhais éifeachtacha, tráthúla agus comhréireacha a dhéanamh. Sna himthosca sin, agus i gcás ina bhféadfadh cineál nó marthanacht an neamhchomhlíonta dochar a dhéanamh don mhargadh inmheánach, ba cheart údar a bheith le hidirghabháil ar leibhéal an Aontais chun cur i bhfeidhm aonfhoirmeach agus éifeachtach an Rialacháin seo a áirithiú. Chuige sin, ba cheart an chumhacht a thabhairt don Choimisiún meastóireacht a dhéanamh ar chomhlíonadh i gcomhar leis na húdaráis náisiúnta ábhartha agus leis an soláthraí lena mbaineann. Sa mheastóireacht sin, ba cheart aird chúí a thabhairt ar chineál, tromchúis agus fad an neamhchomhlíonta, ar an tionchar iarbhir agus féideartha atá aige ar an margadh inmheánach chomh maith le cearta úinéirí Tiachóige le haghaidh Ghnó na hEorpa a ndéantar difear dóibh, i gcomhréir le prionsabail na comhréireachta agus na próise cuí. I gcás ina ndeimhnítear leis an meastóireacht go bhfuil na coinníollacha maidir le hidirghabháil an Aontais á gcomhlíonadh, ba cheart don Choimisiún, tar éis dul i gcomhairle leis na Ballstáit agus leis an soláthraí agus tar éis an deis a bheith ag an soláthraí an neamhchomhlíonadh a leigheas, a bheith in ann cinneadh a ghlacadh an soláthraí a chur ar fionraí go sealadach ó liosta na soláthraithe iontaofa arna bhunú faoi Airteagal 12. Ar bhonn cinneadh den sórt sin, ba cheart do na húdaráis mhaoirseachta ábhartha na bearta is gá a dhéanamh chun a áirithiú go gcomhlíonann an soláthraí an Rialachán seo agus ba cheart dóibh tuairisciú go tráthúil don Choimisiún maidir leis na bearta a rinneadh agus maidir le toradh na mbeart sin. I gcás ina gcruthófar go bhfuil gníomhaíochtaí feabhais éifeachtach, ba cheart don Choimisiún deireadh a chur le fionraí an tsoláthraí ón liosta laistigh de 2 lá oibre ón gcruthúnas ar chomhlíonadh a fháil.
- (46) Ba cheart an fhreagracht bhreise a thabhairt don Ghrúpa Comhair arna bhunú de bhun Rialachán (AE) Uimh. 910/2014 as comhordú na gcleachtas agus na mbeartas náisiúnta a bhaineann leis an Rialachán seo agus ba cheart dó plé a éascú idir na húdaráis inniúla maidir le cur i bhfeidhm agus forfheidhmiú an Rialacháin, agus ar an gcaoi sin cuspóirí bhunú an Ghrúpa Comhair[...] a bhaint amach agus saineolas a choinneáil ar mhaithe leis an gcreat um Thiachóga le haghaidh Ghnó na hEorpa a chur chun feidhme.

- (47) Chun tacú le glacadh agus idir-inoibritheacht éifeachtach, ba cheart a cheangal ar gach comhlacht earnála poiblí úsáid Tiachóige le haghaidh Ghnó na hEorpa a chumasú i ngach nós imeachta riaracháin ábhartha chun críoch sainaitheantais agus fiordheimhnithe, chun doiciméid a shíniú nó a shéalú, chun doiciméid a chur isteach agus chun fógraí a sheoladh nó a fháil. I ndáil leis sin, ba cheart do chomhlachtaí earnála poiblí a áirithiú gur féidir le hoibreoirí eacnamaíocha Tiachóga le haghaidh Ghnó na hEorpa a úsáid agus, i gcás ina bhfuil fáil nó cur in iúl doiciméad nó fógraí i gceist, go mbeidh siad in ann rochtain a fháil ar bhealach cumarsáide slán na dTiachóg Gnó. Chun cur i bhfeidhm rianúil agus idir-inoibritheach an Rialacháin seo a áirithiú i ndáil leis sin, ba cheart do chomhlachtaí earnála poiblí úsáid Tiachóige le haghaidh Ghnó na hEorpa a chumasú chun doiciméid agus fógraí a fháil nó a sheoladh. An oibleagáid atá ar chomhlachtaí earnála poiblí glacadh le Tiachóga le haghaidh Ghnó na hEorpa ó oibreoirí eacnamaíocha, níor cheart dó difear a dhéanamh do chórais a úsáidtear chun doiciméid nó sonraí a mhalartú nó a chur isteach idir údarais inniúla.
- (48) *scriosta*
- (49) Rannchuidíonn Tiachóga le haghaidh Ghnó na hEorpa le seirbhís phoiblí dhigiteach trasteorann a sholáthar de réir bhrí an Ghnímh um Eoraip Idir-inoibritheach (AE) 2024/903. Rinneadh an measúnú a cheanglaítear faoin Rialachán sin, agus foilseofar an tuarascáil a thiocfaidh as sin ar an Tairseach um Eoraip Idir-inoibritheach.
- (50) Chun a áirithiú go leanfaidh éiceachóras na dTiachóg le haghaidh Ghnó na hEorpa de bheith ag freastal ar riachtanais oibreoirí eacnamaíocha agus comhlachtaí earnála poiblí, is gá measúnú a dhéanamh ar a chur chun feidhme agus ar a thionchar i bhfianaise chuspóir an Rialacháin seo. Ba cheart a chur san áireamh sa mheastóireacht, go háirithe, an riosca a bhaineann le hilroinnt dhlíthiúil laistigh den mhargadh inmheánach maidir le doiciméid agus dearbhuithe tréithe a chur isteach go leictreonach chomh maith le forbairtí teicneolaíocha agus dul chun cinn an mhargaidh le haghaidh na dTiachóg le haghaidh Ghnó na hEorpa agus seirbhísí iontaoibhe gaolmhara.

- (51) Chun dúbláil a sheachaint agus chun an t-ualach riaracháin a laghdú, níor cheart do chomhlachtaí eanála poiblí a cheangal go gcuirfí an fhaisnéis nó na doiciméid céanna isteach arís trí mhodhanna fisiceacha nó trí mhodhanna digiteacha malartacha, nó a mhalairt, nuair a bheidh siad tarchurtha go bailí tríd an Tiachóg le haghaidh Ghnó na hEorpa i gcomhréir leis an Rialachán seo. Dá réir sin, níor cheart do na Ballstáit ceanglais náisiúnta bhreise a ghlacadh nó a choinneáil ar bun maidir leis na hábhair a thagann faoi raon feidhme an Rialacháin seo, mura ndéantar foráil go sainráite maidir leis sin sa Rialachán seo, ós rud é go ndéanfaidh sé sin difear do chur i bhfeidhm díreach agus aonfhoirmeach an Rialacháin.
- (52) Chun rochtain éifeachtach ar nósanna imeachta agus ar mhargaí an Aontais a chumasú agus chun rannpháirtíocht oibreoirí eacnamaíocha atá bunaithe lasmuigh den Aontas a éascú sa chreat um Thiachóga le haghaidh Ghnó na hEorpa, is gá a chur ar chumas sholáthraithe Tiachóg le haghaidh Ghnó na hEorpa Tiachóga le haghaidh Ghnó na hEorpa a eisiúint do na hoibreoirí sin, ar choinníoll gur féidir a gcéannacht a fhíorú le hardleibhéal cinnteachta. Chun clárúcháin dhúblacha a chosc agus chun sláine an mhargaidh inmheánaigh a chosaint, níor cheart cead a bheith ag na hoibreoirí sin níos mó ná tacar amháin sonraí aitheantais úinéara Tiachóige le haghaidh Ghnó na hEorpa agus aitheantóir uathúil amháin a fháil. Ba cheart do na Ballstáit oibriú i gcomhar le chéile chun an riosca a bhaineann le clárúcháin dhúblacha a mhaolú agus chun uathúlacht clárúcháin oibreoirí eacnamaíocha atá bunaithe lasmuigh den Aontas a áirithiú.
- (53) Leis an ngníomh cur chun feidhme a bhaineann leis na ceanglais agus na nósanna imeachta le haghaidh an aitheantóra uathúil, ba cheart na coinníollacha maidir lena n-eisiúint d'oibreoirí eacnamaíocha tríú tír a chuimsiú. Go háirithe, ba cheart na coinníollacha a leagan síos lena gcuirtear comhordú chun cinn idir soláthraithe sonraí aitheantais úinéara Tiachóige le haghaidh Ghnó na hEorpa, chun a áirithiú nach sannfar ach aitheantóir uathúil amháin do gach oibreoir eacnamaíoch tríú tír chun críche sonraí aitheantais úinéara Tiachóige le haghaidh Ghnó na hEorpa. Sula soláthrófar Tiachóg le haghaidh Ghnó na hEorpa d'oibreoir eacnamaíoch atá bunaithe lasmuigh den Aontas, ba cheart don soláthraí ábhartha a dheimhniú gur comhlíonadh na coinníollacha chun céannacht an oibreora eacnamaíoch a fhíorú. Ba cheart go gcuirfeadh sé sin ar chumas oibreoirí eacnamaíocha ó thríú tíortha Tiachóga le haghaidh Ghnó na hEorpa a úsáid, agus slándáil agus iontaofacht an éiceachórais á gcaomhnú an tráth céanna.

- (54) Chun coinníollacha aonfhoirmeacha a áirithiú maidir le cur chun feidhme aitheantais agus idir-inoibritheachta tiachóg gnó nó córas agus creataí comhchosúil ó thríú tíortha chun tacú le comhpháirtíochtaí agus comhar agus chun iad a chur chun cinn, ba cheart cumhachtaí cur chun feidhme a thabhairt don Choimisiún chun na coinníollacha a leagan síos faoina dtairbhíonn córais nó creat comhchosúil den sórt sin d'fhorálacha an Rialacháin seo. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle¹⁴.
- (55) Le Rialachán (AE) Uimh. 910/2014, cuirtear modh slán áisiúil ar fáil do shaoránaigh an Aontais agus do chónaitheoirí san Aontas mar a shainmhínítear sa dlí náisiúnta, chun iad féin a shainaithint agus chun rochtain a fháil ar sheirbhísí ar líne. Ceanglaítear ar na Ballstáit a áirithiú go soláthrófar Tiachóga Eorpacha Céannachta Digití do dhaoine dlítheanacha, in ainneoin easpa soiléireachta maidir le cur chun feidhme teicniúil sonrath na dTiachóg Eorpach Céannachta Digití do dhaoine dlítheanacha. Leis an éiginnteacht sin maidir le cuspóir agus feidhmiú na dTiachóg Eorpach Céannachta Digití do dhaoine dlítheanacha, méadaítear an chastacht dhlíthiúil agus theicniúil do na Ballstáit. Is gá, dá bhrí sin, Airteagal 5a de Rialachán (AE) Uimh. 910/2014 a leasú chun a áirithiú nach mbainfidh eisiúint éigeantach na dTiachóg Eorpach Céannachta Digití ach le daoine nádúrtha.
- (56) Leis an gcreat a bhunaítear leis an Rialachán seo, ba cheart bonneagar digiteach slán uile-Aontais a sholáthar agus, dá bhrí sin, ba cheart é a bheith ina phríomhionstraim chun na gearróch sin. Chun tairbhí an chreata um Thiachóga le haghaidh Ghnó na hEorpa a bhaint amach go hiomlán d'oibreoirí eacnamaíocha agus do chomhlachtaí earnála poiblí araon, is gá úsáid na Tiachóige sin a chur chun cinn mar an uirlis réamhshocraithe le haghaidh sainaitheint dhigiteach shlán, fíordheimhniú, agus malartú doiciméad leictreonach agus ríomhdhearbhuithe tréithe.

¹⁴ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13, ELI: <http://data.europa.eu/eli/reg/2011/182/oj>).

- (57) Chun cur i bhfeidhm comhleanúnach agus cothrománach reachtaíocht an Aontais a áirithiú ar fud earnálacha, chun costas riaracháin ar oibreoirí eacnamaíocha a laghdú, agus chun éifeachtúlacht bhuiséadach a fheabhsú, ba cheart dlí an Aontais maidir le ríomh-shainaitheantas, ríomh-fhíordheimhniú, nó malartú doiciméad leictreonach, fógraí, nó ríomhdhearbhuithe tréithe, go háirithe i gcás ina mbunaítear ceanglais theicniúla shonracha, córais theicniúla shonracha, nó prótacail theicniúla shonracha, a chur i bhfeidhm ar bhealach atá comhsheasmhach leis an Rialachán seo. Dá réir sin, ba cheart aon tionscnamh reachtach nó neamhreachtach a bheidh ann amach anseo sna réimsí sin a bheith i gcomhréir leis an bprionsabal ‘Tiachóg Ghnó mar réamhshocrú’ agus ba cheart iad a dhearadh agus a fhorbairt chun cur le húsáid na dTiachóg le haghaidh Ghnó na hEorpa agus chun an úsáid sin a chumasú. I gcás nach féidir ailíniú den sórt sin a dhéanamh, ba cheart don Choimisiún bonn cirt i scríbhinn a sholáthar trí Mheasúnú Tionchair a ghabhann leis an tionscnamh ábhartha, ina leagfar amach na cúiseanna gan úsáid na dTiachóg le haghaidh Ghnó na hEorpa a chumasú. Ba cheart don Choimisiún meastóireacht agus athbhreithniú a dhéanamh ar an Rialachán seo faoin [Oifig na bhFoilseachán, cuir isteach an dáta 5 bliana tar éis theacht i bhfeidhm an Rialacháin seo] agus gach 4 bliana ina dhiaidh sin agus tuairisciú do Pharlaimint na hEorpa agus don Chomhairle. Tá an t-athbhreithniú sin fíor-riachtanach chun measúnú a dhéanamh ar ábharthacht leanúnach na gceoifheidhmeanna agus na sonraíochtaí teicniúla forordaithe, go háirithe iad siúd a bhaineann leis an ríomhsheirbhís seachadta chláraithe cháilithe mar bhealach cumarsáide slán, i gcomhthéacs an dul chun cinn teicneolaíoch is déanaí. Thairis sin, ba cheart don Choimisiún meastóireacht a dhéanamh ar na nósanna imeachta um fhógra a thabhairt i gcás soláthraithe Tiachóg le haghaidh Ghnó na hEorpa, chomh maith le cur chun feidhme agus éifeachtacht na rialacha maidir le pionóis arna mbunú ag na Ballstáit, chun meastóireacht a dhéanamh ar fhorbairtí sa mhargadh agus ar leibhéal chomhlíontachta.
- (58) Ós rud é nach féidir leis na Ballstáit cuspóirí an Rialacháin seo a ghnóthú go leordhóthanach agus, de bharr fhairsinge nó éifeachtaí na gníomhaíochta, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun na cuspóirí sin a ghnóthú.

- (59) Chuathas i gcomhairle leis an Mairseoir Eorpach ar Chosaint Sonraí i gcomhréir le hAirteagal 42(1) de Rialachán (AE) 2018/1725 ó Pharlaimint na hEorpa agus ón gComhairle⁽¹⁵⁾, agus thug an Mairseoir tuairim an 20 Eanáir 2026.

Caibidil I - Ábhar, raon feidhme agus sainmhíthe

Airteagal 1

Ábhar

Leis an Rialachán seo, cumasaítear sainaithint agus fíordheimhniú digiteach slán, comhroinnt sonraí agus fógraí atá bailí ó thaobh an dlí de, laghdaítear ualaí riaracháin agus costais chomhlíontachta, agus tacaítear le gnó agus iomaíochas trasteorann. Déanann sé an méid seo a leanas, go háirithe:

- (1) creat a bhunú chun Tiachóga le haghaidh Ghnó na hEorpa a sholáthar;
- (2) bunaítear prionsabal na coibhéise, lena bhforáiltear go mbeidh éifeacht dhlíthiúil gníomhaíochtaí agus idirbheart a dhéantar trí Thiachóg le haghaidh Ghnó na hEorpa coibhéiseach le gníomhaíochtaí agus idirbhearta a dhéantar go dleathach i bpearsa, i bhfoirm páipéir, nó trí aon mhodh nó próiseas eile a mheasfaí a bheith i gcomhréir leis na ceanglais dhlíthiúla, riaracháin nó nós imeachta is infheidhme;
- (3) rialacha a bhunú maidir le sonraí aitheantais úinéara Tiachóige le haghaidh Ghnó na hEorpa a eisiúint chun oibreoirí eacnamaíocha agus comhlachtaí earnála poiblí a shainaithint;
- (4) an tEolaire Digiteach Eorpach a bhunú;
- (5) an t-aitheantóir uathúil Eorpach, arna bhunú agus arna rialú le Treoir (AE) 2017/1132, a ainmniú mar an aitheantóir uathúil d'úinéirí Tiachóige le haghaidh Ghnó na hEorpa, agus aitheantóir uathúil comhchosúil a bhunú d'úinéirí Tiachóg le haghaidh Ghnó na hEorpa nach bhfuil an t-aitheantóir uathúil Eorpach ar fáil dóibh;

¹⁵ Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39, ELI: <https://eur-lex.europa.eu/eli/reg/2018/1725/oj>).

- (6) leagtar síos an sásra údarúcháin faoina gceadófar do sholáthraithe Tiachóg le haghaidh Ghnó na hEorpa na tiachóga sin a thairiscint;
- (7) oibleagáidí a leagan síos do chomhlachtaí earnála poiblí maidir le Tiachóga le haghaidh Ghnó na hEorpa;
- (8) creat a sholáthar chun maoirseacht a dhéanamh ar eintitis an Aontais, i gcás ina soláthraíonn na comhlachtaí earnála poiblí sin Tiachóga le haghaidh Ghnó na hEorpa d'eintitis eile de chuid an Aontais;
- (9) creat a chur ar fáil chun aitheantas a thabhairt do chórais tríú tír atá cosúil le Tiachóga le haghaidh Ghnó na hEorpa agus chun Tiachóga le haghaidh Ghnó na hEorpa a eisiúint d'oibreoirí eacnamaíocha tríú tír.

Airteagal 2

Raon feidhme

1. Tá feidhm ag an Rialachán seo maidir le soláthar agus glacadh Tiachóg le haghaidh Ghnó na hEorpa agus maidir le heisiúint agus glacadh sonraí aitheantais úinéara Tiachóige le haghaidh Ghnó na hEorpa, agus maidir le húsáid Tiachóg le haghaidh Ghnó na hEorpa ag oibreoirí eacnamaíocha agus comhlachtaí earnála.
2. Tá an Rialachán seo gan dochar do na córais agus do na nósanna imeachta atá ann cheana agus atá sainordaithe le dlí an Aontais nó an dlí náisiúnta lena rialaítear malartú doiciméad agus sonraí idir údaráis inniúla.
- 2a. Tá an Rialachán seo gan dochar do ghníomhaíochtaí arna ndéanamh ag na Ballstáit chun críoch oird phoiblí agus slándála poiblí agus cosanta.

Sainmhínte

Chun críocha an Rialacháin seo, tá feidhm ag na sainmhínte seo a leanas:

- (1) ciallaíonn ‘Tiachóg le haghaidh Ghnó na hEorpa’ réiteach digiteach lenar féidir le húinéirí Tiachóige le haghaidh Ghnó na hEorpa sonraí sainaitheantais úinéara Tiachóige le haghaidh Ghnó na hEorpa agus ríomhdhearbhuithe tréithe a fháil, a stóráil, a bhainistiú, a chomhcheangal agus a chur i láthair go slán do pháirtithe is úsáideoirí Tiachóige le haghaidh Ghnó na hEorpa chun na gcríoch seo a leanas:
 - (a) sonraí sainaitheantais úinéir na Tiachóige le haghaidh Ghnó na hEorpa a theastaíonn ó pháirtí is úsáideoir Tiachóige le haghaidh Ghnó na hEorpa a fhíordheimhniú agus a sholáthar;
 - (b) rochtain a fháil ar ríomhdhearbhuithe tréithe, ríomhshínte, ríomhshéalaí, ríomhsheirbhísí seachadta cláraithe, agus ríomhstampaí ama agus iad a úsáid;
 - (c) údaruithe a chruthú, a bhainistiú agus a tharmligean chuig úsáideoirí Tiachóige le haghaidh Ghnó na hEorpa;

agus a d’fhéadfadh tacú le feidhmiúlachtaí breise i gcomhréir leis an Rialachán seo;

- (2) ciallaíonn ‘sonraí aitheantais úinéara Tiachóige le haghaidh Ghnó na hEorpa’ tacar sonraí lenar féidir céannacht úinéara Tiachóige le haghaidh Ghnó na hEorpa a bhunú agus a eisiú soláthraí sonraí aitheantais úinéara Tiachóige le haghaidh Ghnó na hEorpa;
- (3) ciallaíonn ‘soláthraí sonraí aitheantais úinéara Tiachóige le haghaidh Ghnó na hEorpa’ soláthraí seirbhísí iontaoibhe cáilithe nó comhlacht earnála poiblí a eisiú sonraí aitheantais úinéara Tiachóige le haghaidh Ghnó na hEorpa;
- (4) ciallaíonn ‘oibreoir eacnamaíoch’ aon duine nádúrtha nó dlítheanach, lena n-áirítear cuideachtaí, comhpháirtíochtaí, fondúireachtaí, comhlachais chomh maith le trádálaithe aonair agus daoine féinfhostaithe nó grúpa daoine den sórt sin, ach gan a bheith teoranta dóibh, ag gníomhú i gcáil tráchtála nó ghairmiúil;

- (5) ciallaíonn ‘comhlacht earnála poiblí’ eintiteas de chuid an Aontais, údarás náisiúnta, stáit, réigiúnach nó áitiúil, comhlacht faoi rialú an dlí phoiblí nó comhlachas arna bhunú ag eintiteas nó ag comhlacht amháin nó ag roinnt eintiteas nó comhlachtaí den sórt sin, nó eintiteas príobháideach arna shainordú ag eintiteas, údarás, comhlacht nó comhlachas den sórt sin chun seirbhísí poiblí a sholáthar, agus é ag gníomhú faoin sainordú sin;
- (6) ciallaíonn ‘eintiteas de chuid an Aontais’ institiúid, comhlacht, oifig agus gníomhaireacht de chuid an Aontais arna gcur ar bun leis an gConradh ar an Aontas Eorpach, leis an gConradh ar Fheidhmiú an Aontais Eorpaigh nó leis an gConradh ag bunú an Chomhphobail Eorpaigh do Fhuinneamh Adamhach, nó arna gcur ar bun dá mbun;
- (7) ciallaíonn ‘úinéir Tiachóige le haghaidh Ghnó na hEorpa’ oibreoir eacnamaíoch nó comhlacht earnála poiblí ar leis Tiachóg le haghaidh Ghnó na hEorpa;
- (8) ciallaíonn ‘seirbhís iontaoibhe’ seirbhís iontaoibhe mar a shainmhínítear in Airteagal 3, pointe (16), de Rialachán (AE) Uimh. 910/2014;
- (9) ciallaíonn ‘tréith’ tréith mar a shainmhínítear in Airteagal 3, pointe (43), de Rialachán (AE) Uimh. 910/2014;
- (10) ciallaíonn ‘ríomhdhearbhuithe tréithe’ ríomhdhearbhuithe tréithe mar a shainmhínítear in Airteagal 3, pointe (44) de Rialachán (AE) Uimh. 910/2014;
- (11) ciallaíonn ‘ríomhdhearbhú tréithe cáilithe’ ríomhdhearbhú tréithe cáilithe mar a shainmhínítear in Airteagal 3, pointe (45) de Rialachán (AE) Uimh. 910/2014;
- (12) ciallaíonn ‘Tiachóg Eorpach Céannachta Digítí’ Tiachóg Eorpach Céannachta Digítí mar a shainmhínítear in Airteagal 3, pointe (42) de Rialachán (AE) Uimh. 910/2014;
- (13) ciallaíonn ‘ríomhshíniú’ ríomhshíniú mar a shainmhínítear in Airteagal 3, pointe (10) de Rialachán (AE) Uimh. 910/2014;
- (14) ciallaíonn ‘ríomhshíniú cáilithe’ ríomhshíniú cáilithe mar a shainmhínítear in Airteagal 3, pointe (12), de Rialachán (AE) Uimh. 910/2014;
- (15) ciallaíonn ‘ríomhshéala’ ríomhshéala mar a shainmhínítear in Airteagal 3, pointe (25) de Rialachán (AE) Uimh. 910/2014;

- (16) ciallaíonn ‘ríomhshéala cáilithe’ ríomhshéala cáilithe mar a shainmhínítear in Airteagal 3, pointe (27), de Rialachán (AE) Uimh. 910/2014;
- (17) ciallaíonn ‘ríomhstampa ama cáilithe’ ríomhstampa ama cáilithe mar a shainmhínítear in Airteagal 3, pointe (34), de Rialachán (AE) Uimh. 910/2014;
- (18) *scriosta*
- (19) ciallaíonn ‘údarú’ ceart nó cead a dheonú nó a aithint ag úinéir Tiachóige le haghaidh Ghnó na hEorpa d’úsáideoir Tiachóige le haghaidh Ghnó na hEorpa chun gníomhaíochtaí sonraithe a dhéanamh maidir le hacmhainní nó feidhmiúlachtaí sonraithe, agus an cinneadh comhfhreagrach maidir le rialú rochtana lena gceadaítear gach iarraidh nithiúil i gcomhréir leis an mbeartas rialaithe rochtana is infheidhme agus le haon choinníoll is gá maidir le Tiachóg le haghaidh Ghnó na hEorpa ainmnithe;
- (20) ciallaíonn ‘ríomhdhoiciméad’ ríomhdhoiciméad mar a shainmhínítear in Airteagal 3, pointe (35) de Rialachán (AE) Uimh. 910/2014;
- (21) ciallaíonn ‘ríomhsheirbhís seachadta chláraithe cháilithe’ ríomhsheirbhís seachadta chláraithe cháilithe mar a shainmhínítear in Airteagal 3, pointe (37) de Rialachán (AE) Uimh. 910/2014;
- (22) ciallaíonn ‘úsáideoir Tiachóige le haghaidh Ghnó na hEorpa’ duine nádúrtha nó dlítheanach, nó duine nádúrtha a dhéanann ionadaíocht do dhuine nádúrtha eile nó do dhuine dlítheanach, a úsáideann Tiachóga le haghaidh Ghnó na hEorpa arna soláthar i gcomhréir leis an Rialachán seo;
- (23) ciallaíonn ‘páirtí is úsáideoir Tiachóige le haghaidh Ghnó na hEorpa’ duine nádúrtha, oibreoir eacnamaíoch nó comhlacht earnála poiblí a úsáideann Tiachóga le haghaidh Ghnó na hEorpa;
- (24) ciallaíonn ‘fianú aonaid Tiachóige le haghaidh Ghnó na hEorpa’ oibiacht sonraí lena dtugtar tuairisc ar chomhpháirteanna an aonaid Tiachóige le haghaidh Ghnó na hEorpa nó lenar féidir na comhpháirteanna sin a fhíordheimhniú agus a bhailíochtú;

- (25) ciallaíonn ‘aonad Tiachóige le haghaidh Ghnó na hEorpa’ cumraíocht uathúil de réiteach Tiachóige le haghaidh Ghnó na hEorpa, lena n-áirítear tosach Tiachóige le haghaidh Ghnó na hEorpa, agus cúl Tiachóige le haghaidh Ghnó na hEorpa, arna soláthar ag soláthraí Tiachóga le haghaidh Ghnó na hEorpa d’úinéir sonrach Tiachóige le haghaidh Ghnó na hEorpa;
- (26) ciallaíonn ‘réiteach Tiachóige le haghaidh Ghnó na hEorpa’ meascán de bhogearraí, cruá-earraí, seirbhísí, socruithe, agus cumraíochtaí, lena n-áirítear tosach agus cúl Tiachóige le haghaidh Ghnó na hEorpa;
- (27) ciallaíonn ‘sócmhainní criticiúla’ sócmhainní laistigh d’aonad Tiachóige le haghaidh Ghnó na hEorpa, nó i ndáil leis, a bhfuil tábhacht chomh hollmhór sin ag baint leo go mbeadh tionchar an-tromchúiseach díblithe ar an gcumas brath ar an aonad Tiachóige le haghaidh Ghnó na hEorpa dá gcuirfí infhaighteacht, rúndacht nó sláine na sócmhainní sin i mbaol;
- (28) *scriosta*
- (29) *scriosta*
- (30) ciallaíonn ‘soláthraí seirbhísí iontaoibhe’ soláthraí seirbhísí iontaoibhe mar a shainmhínítear in Airteagal 3, pointe (19), de Rialachán (AE) Uimh. 910/2014;
- (31) ciallaíonn ‘soláthraí seirbhísí iontaoibhe cáilithe’ soláthraí seirbhísí iontaoibhe cáilithe mar a shainmhínítear in Airteagal 3, pointe (20), de Rialachán (AE) Uimh. 910/2014;
- (32) ciallaíonn ‘ríomhdhearbhú tréithe arna n-eisiúint ag comhlacht earnála poiblí atá freagrach as foinse bharántúil nó thar a cheann’ ríomhdhearbhú tréithe arna eisiúint ag comhlacht earnála poiblí atá freagrach as foinse bharántúil, nó thar a cheann, mar a shainmhínítear in Airteagal 3, pointe (46) de Rialachán (AE) Uimh. 910/2014;
- (33) ciallaíonn ‘foinse bharántúil’ foinse bharántúil mar a shainmhínítear in Airteagal 3, pointe (47) de Rialachán (AE) Uimh. 910/2014;

- (33a) ciallaíonn ‘teagmhas suntasach’ teagmhas de réir bhrí Airteagal 23(3) de Threoir (AE) 2022/2555;
- (34) ciallaíonn ‘scéim dearbhaithe’ tacar rialacha is infheidhme maidir le cineál ríomhdhearbhaithe tréithe amháin nó níos mó ná sin;
- (35) ciallaíonn ‘catalóg scéimeanna’ stór digiteach ina liostaítear scéimeanna um ríomhdhearbhuithe tréithe atá cláraithe i gcomhréir leis an Rialachán seo agus a dhéanann an Coimisiún é a choinneáil ar bun agus a fhoilsiú ar líne;
- (36) ciallaíonn ‘Aitheantóir Uathúil Eorpach’ an tAitheantóir Uathúil Eorpach dá dtagraítear i dTreoir (AE) 2017/1132;
- (37) ciallaíonn ‘clár náisiúnta’ bunachar sonraí oifigiúil nó córas oifigiúil arna bhunú agus arna chothabháil ag rialtas náisiúnta nó ag a údarás ainmnithe, nó thar a cheann, a dhéanann faisnéis a bhaineann le comhlachtaí earnála poiblí agus le hoibreoírí eacnamaíocha a thairfeadh, a stóráil agus a bhainistiú;
- (38) ciallaíonn ‘Comhéadan Feidhmchláir’ tacar sainmhínithe agus prótacal chun feidhmchlár bogearraí a thógáil agus a chomhtháthú le sonraí a chomhroinnt;
- (39) ciallaíonn ‘taisceadh’ aon tarchur sonraí, comhad, foirmeacha nó taifead struchtúrtha nó neamhstruchtúrtha idir comhlacht earnála poiblí agus oibreoir eacnamaíoch, idir oibreoírí eacnamaíocha nó idir comhlachtaí earnála poiblí, i gcás ina gceanglaítear, ina n-iarrtar nó ina gceadaítear an tarchur sin faoi dhlí an Aontais nó faoin dlí náisiúnta agus ina bhfuil sé beartaithe chun tacú le críoch dhlíthiúil, riaracháin nó nós imeachta;

- (40) ciallaíonn ‘fógra’ aon tarchur faisnéise, cinntí, iarrataí nó admhálacha idir comhlacht earnála poiblí agus oibreoir eacnamaíoch, idir oibreoirí eacnamaíocha nó idir comhlachtaí earnála poiblí, a cheanglaítear, a iarrtar nó a cheadaítear faoi dlí an Aontais nó faoin dlí náisiúnta, agus atá beartaithe chun éifeachtaí dlíthiúla a bheith aige nó chun an faighteoir a chur ar an eolas faoi chearta, faoi oibleagáidí nó faoi fhorbairtí nós imeachta;
- (41) ciallaíonn ‘nós imeachta riaracháin’ seicheamh gníomhaíochtaí, arna shainiú le dlí an Aontais nó leis an dlí náisiúnta, nach mór d’oibreoirí eacnamaíocha nó do chomhlachtaí earnála poiblí a dhéanamh chun oibleagáidí a chomhlíonadh, faisnéis a sholáthar, nó cinneadh, údarú, seirbhís nó sochar a fháil ó chomhlacht earnála poiblí i bhfeidhmiú feidhmeanna riaracháin;
- (42) ciallaíonn ‘tosach Tiachóige le haghaidh Ghnó na hEorpa’ comhpháirt chomhéadan úsáideora na Tiachóige le haghaidh Ghnó na hEorpa, gan beann ar ardán ná ar fhachtóir foirme, a idirghníomhaíonn le húsáideoirí na Tiachóige le haghaidh Ghnó na hEorpa agus atá mar chuid d’aonad na Tiachóige le haghaidh Ghnó na hEorpa;
- (43) ciallaíonn ‘cúl Tiachóige le haghaidh Ghnó na hEorpa’ na comhphárteanna ar thaobh an fhreastalaí, lena n-áirítear bogearraí, seirbhísí agus bonneagar, lena soláthraítear an fheidhmiúlacht agus an tacaíocht is gá don tosach Tiachóige le haghaidh Ghnó na hEorpa, agus atá mar chuid d’aonad Tiachóige le haghaidh Ghnó na hEorpa.

Caibidil II – Tiachóga le haghaidh Ghnó na hEorpa

Airteagal 4

Prionsabal na coibhéise

I gcás ina mbainfidh úinéir Tiachóige le haghaidh Ghnó na hEorpa nó úsáideoir údaraithe Tiachóige le haghaidh Ghnó na hEorpa úsáid as aon cheann de na seirbhísí iontaoibhe cáilithe ar chuid díobh de chroífheidhmiúlachtaí Tiachóige le haghaidh Ghnó na hEorpa dá dtagraítear in Airteagal 5(1), beidh an éifeacht dhlíthiúil chéanna ag an gníomhaíocht agus a bheadh ann dá ndéanfaí an gníomhaíocht go dleathach i bpearsa, i bhfoirm páipéir, nó ar aon mhodh eile nó trí aon phróiseas eile a mheasfaí a bheith i gcomhréir leis na ceanglais dlí, riaracháin nó nós imeachta is infheidhme.

I gcás ina mbaineann duine féinfhostaithe nó trádálaí aonair úsáid as an ríomhsheirbhís seachadta chláraithe cáilithe sna himthosca a leagtar amach in Airteagal 5(3), beidh an éifeacht dhlíthiúil chéanna ag an ngníomhaíocht a eascraíonn as sin agus a bheadh ann dá ndéanfaí an ghníomhaíocht sin go dleathach i bpearsa, i bhfoirm páipéir, nó ar aon mhodh eile nó trí aon phróiseas eile a mheasfaí a bheith i gcomhréir leis na ceanglais dlí, riaracháin nó nós imeachta is infheidhme.

I gcás ina n-áirítear i ndlí an Aontais nó sa dlí náisiúnta atá ann cheana ceanglais a bhaineann le formáidí leictreonacha mar chuid de nós imeachta riaracháin, leanfaidh na ceanglais sin de bheith infheidhme agus comhlíonfar iad.

Airteagal 5

Croífheidhmiúlachtaí na dTiachóg le haghaidh Ghnó na hEorpa

1. Áiritheoidh soláthraithe Tiachóg le haghaidh Ghnó na hEorpa go gcuirfidh na Tiachóga le haghaidh Ghnó na hEorpa a sholáthraíonn siad ar a gcumas d'úinéirí Tiachóige le haghaidh Ghnó na hEorpa úsáid a bhaint as na croífheidhmiúlachtaí seo a leanas:
 - (a) ríomhdhearbhuithe tréithe a iarraidh, a fháil, a roghnú, a chomhcheangal, a stóráil, a scriosadh, a chomhroinnt agus a chur i láthair go slán;
 - (b) sonraí aitheantais agus tréithe úinéara Tiachóige le haghaidh Ghnó na hEorpa atá i ríomhdhearbhuithe tréithe a nochtadh go roghnaitheach, i gcomhthéacs na bhfeidhmiúlachtaí a liostaítear i bpointe (a);
 - (c) sonraí aitheantais úinéara Tiachóige le haghaidh Ghnó na hEorpa agus ríomhdhearbhuithe tréithe a iarraidh agus a chomhroinnt go slán idir Tiachóga le haghaidh Ghnó na hEorpa, Tiachóga Eorpacha Céannachta Digití agus le páirtithe is úsáideoirí Tiachóige le haghaidh Ghnó na hEorpa;
 - (d) síniú trí bhíthin ríomhshínithe cáilithe agus séalú trí bhíthin ríomhshéalaí cáilithe, de réir mar is infheidhme;
 - (e) sonraí i bhfoirm leictreonach a cheangal d'am ar leith trí bhíthin ríomhstampaí ama cáilithe;

- (f) ríomhdhearbhuithe tréithe a fháil arna n-eisiúint go slán ag an soláthraí thar ceann úinéara Tiachóige le haghaidh Ghnó na hEorpa. Bainfidh na tréithe sin le sonraí arb é úinéir na Tiachóige le haghaidh Ghnó na hEorpa an phríomhfhoinsé ina leith do Thiachóga le haghaidh Ghnó na hEorpa agus do Thiachóga Eorpacha Céannachta Digití;
- (g) ríomhdhearbhuithe tréithe a eisíodh de bhun phointe (f) a nascadh le ríomhdhearbhuithe tréithe eile ar cuid de shlabhra iad;
- (h) úsáid ríomhdhearbhuithe tréithe cáilithe agus neamhcháilithe a chumasú chun go mbeidh úinéirí Tiachóige le haghaidh Ghnó na hEorpa agus a n-úsáideoirí údaraithe Tiachóige le haghaidh Ghnó na hEorpa in ann iad féin a fhíordheimhniú;
- (i) doiciméid agus sonraí leictreonacha a tharchur agus a fháil trí ríomhsheirbhís seachadta chláraithe cháilithe a leagtar amach san Iarscríbhinn;
- (j) úsáideoirí iomadúla Tiachóige le haghaidh Ghnó na hEorpa a údarú chun rochtain a fháil ar Thiachóg le haghaidh Ghnó na hEorpa de chuid an úinéara agus í a oibriú, agus úinéir na Tiachóige le haghaidh Ghnó na hEorpa a bheith in ann údaruithe a bhainistiú agus a chúlghairm, lena n-áirítear údaruithe a bhaineann le róil chun an Thiachóg le haghaidh Ghnó na hEorpa a rochtain agus a oibriú agus gan dochar d'aon chumhacht aturnae ná d'aon sainordú dlíthiúil;
- (k) údarú a thabhairt do pháirtithe is úsáideoirí Tiachóige le haghaidh Ghnó na hEorpa ríomhdhearbhuithe tréithe arna n-eisiúint d'úinéir na Tiachóige le haghaidh Ghnó na hEorpa a iarraidh, agus úinéir na Tiachóige le haghaidh Ghnó na hEorpa a bheith in ann na húdaruithe sin a bhainistiú agus a chúlghairm;
- (l) a gcuid sonraí a onnmhairiú, lena n-áirítear sonraí aitheantais eisithe úinéara Tiachóige le haghaidh Ghnó na hEorpa, ríomhdhearbhuithe tréithe, logaí cumarsáide, agus taifid idirbhirt, i bhformáid struchtúrtha, a úsáidtear go coitianta agus atá inléite ag meaisín, i gcás ina ndéanfar seirbhís a fhoirceannadh nó fógra soláthraí Tiachóige le haghaidh Ghnó na hEorpa a chúlghairm;

- (la) a gcuid sonraí a allmhairiú mar a liostaítear faoi phointe (l) chun tairbhiú d'iniomparthacht sonraí i measc soláthraithe Tiachóige le haghaidh Ghnó na hEorpa;
 - (m) rochtain a fháil ar loga na gcumarsáidí agus na n-idirbheart uile;
 - (n) rochtain a fháil ar dheais chun rochtain a fháil ar chumarsáid a mhalartaítear tríd an ríomhsheirbhís seachadta chláraithe cháilithe dá dtagraítear i bpointe (i), agus chun an chumarsáid sin a stóráil agus a fhíorú.
2. Féadfaidh soláthraithe Tiachóg le haghaidh Ghnó na hEorpa feidhmiúlachtaí breise a thairiscint thar na cinn a liostaítear i mír 1 ar choinníoll nach gcuirfidh na feidhmiúlachtaí sin isteach ar rúndacht, infhaighteacht ná sláine na gcroífeidhmiúlachtaí íosta ná ar iontaofacht agus idir-inoibritheacht na dTiachóg le haghaidh Ghnó na hEorpa a sholáthraíonn siad ná nach gcuirfidh siad na gnéithe sin i mbaol.
 3. Cumasóidh soláthraithe Tiachóg le haghaidh Ghnó na hEorpa soláthar na ríomhsheirbhíse seachadta cláraithe cáilithe dá dtagraítear i mír 1, pointe (i) mar sheirbhís neamhspleách d'úsáideoirí Tiachóg Eorpach Céannachta Digití.
 4. Cuirfidh soláthraithe Tiachóg le haghaidh Ghnó na hEorpa na feidhmiúlachtaí dá dtagraítear i mír 1 chun feidhme i gcomhréir leis na ceanglais a leagtar amach san Iarscríbhinn.
 5. Faoin [Oifig na bhFoilseachán, cuir isteach an dáta – bliain amháin tar éis theacht i bhfeidhm an Rialacháin seo], bunóidh an Coimisiún, trí bhíthin gníomhartha cur chun feidhme, liosta de chaighdeáin tagartha agus, i gcás inar gá, sonraíochtaí agus nósanna imeachta le haghaidh phríomhfheidhmiúlachtaí Tiachóg le haghaidh Ghnó na hEorpa, lena n-áirítear iad siúd atá ríthábhachtach don idir-inoibritheacht agus don tslándáil agus iad siúd atá ábhartha chun go gcomhlíonfaidh na Ballstáit Airteagal 16, dá dtagraítear i mír 1 den Airteagal seo. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.

Gnéithe teicniúla na dTiachóg le haghaidh Ghnó na hEorpa

1. Áiritheoidh soláthraithe Tiachóg le haghaidh Ghnó na hEorpa go dtacóidh na Tiachóga le haghaidh Ghnó na hEorpa a sholáthraíonn siad le prótacail agus comhéadain choiteanna:
 - (a) chun sonraí sainaitheantais úinéir Tiachóige le haghaidh Ghnó na hEorpa, ríomhdhearbhuithe tréithe cáilithe agus neamhcháilithe, ríomhdhearbhú tréithe eisithe ag comhlacht earnála poiblí atá freagrach as foinse bharántúil nó thar a cheann agus deimhnithe cáilithe agus neamhcháilithe a eisiúint do Thiachóga le haghaidh Ghnó na hEorpa;
 - (b) chun go bhféadfaidh páirtithe is úsáideoirí Tiachóige le haghaidh Ghnó na hEorpa sonraí aitheantais úinéara Tiachóige le haghaidh Ghnó na hEorpa agus ríomhdhearbhuithe tréithe a iarraidh agus a bhailíochtú;
 - (c) chun sonraí aitheantais úinéara Tiachóige le haghaidh Ghnó na hEorpa, ríomhdhearbhú tréithe agus sonraí arna nochtadh go roghnaitheach a chomhroinnt agus a chur i láthair na bpáirtithe is úsáideoirí Tiachóige le haghaidh Ghnó na hEorpa;
 - (d) chun idirghníomhaíocht le Tiachóga le haghaidh Ghnó na hEorpa a cheadú go huathoibríoch gan idirghabháil láimhe nó trí ghníomhaíocht dhíreach úsáideoirí Tiachóige le haghaidh Ghnó na hEorpa;
 - (e) chun úinéir Tiachóige le haghaidh Ghnó na hEorpa a ionductú go slán ó chian trí ionadaí dlíthiúil nó trí dhaoine eile a chumhachtaítear go dleathach chun an próiseas ionductaithe a dhéanamh trí bhíthin modh ríomh-shainaitheantais, mar a shainmhínítear in Airteagal 3, pointe (2) de Rialachán (AE) Uimh. 910/2014, agus a chomhlíonann ceanglais Rialachán (AE) Uimh. 910/2014 a mhéid a bhaineann leis an leibhéal dearbhaithe ‘ard’;
 - (f) i gcás idirghníomhaíocht idir Tiachóga le haghaidh Ghnó na hEorpa, agus idir Tiachóga le haghaidh Ghnó na hEorpa agus Tiachóga Eorpacha Céannachta Digití chun sonraí aitheantais úinéara Tiachóige le haghaidh Ghnó na hEorpa agus ríomhdhearbhuithe tréithe a fháil, a bhailíochtú agus a chomhroinnt ar bhealach slán;

- (g) chun páirtithe is úsáideoirí Tiachóige le haghaidh Ghnó na hEorpa a fhíordheimhniú trí shásraí fíordheimhnithe a chur chun feidhme, i gcás ina bhfuil gá le fíordheimhniú;
 - (h) chun barántúlacht agus bailíocht Tiachóg le haghaidh Ghnó na hEorpa a fhíorú;
 - (i) chun an ríomhsheirbhís seachadta chláráithe cháilithe dá dtagraítear in Airteagal 5(1), pointe (i), a sholáthar, lena n-áirítear comhéadan leis an Eolaire Digiteach Eorpach arna bhunú de bhun Airteagal 10;
 - (j) chun seoladh digiteach uathúil amháin ar a laghad a shannadh do gach úinéir Tiachóige le haghaidh Ghnó na hEorpa, chun críocha na ríomhsheirbhíse seachadta cláráithe cáilithe dá dtagraítear in Airteagal 5(1), pointe (i) agus an Eolaire Dhigitigh Eorpaigh dá dtagraítear in Airteagal 10;
 - (k) chun fianuithe aonaid Tiachóige le haghaidh Ghnó na hEorpa a sholáthar do gach aonad Tiachóige le haghaidh Ghnó na hEorpa;
- 1a. Soláthróidh soláthraithe Tiachóg le haghaidh Ghnó na hEorpa, mar sheirbhís neamhspleách, seoladh digiteach uathúil do chomhlachtaí iarrthacha san earnáil phoiblí nach úinéirí Tiachóg le haghaidh Ghnó na hEorpa iad chun iad a liostú san Eolaire Digiteach Eorpach agus chun an tseirbhís seachadta chláráithe leictreonach cháilithe dá dtagraítear in Airteagal 5(1), pointe (i), a chumasú.
2. Déanfaidh soláthraithe Tiachóg le haghaidh Ghnó na hEorpa an méid seo a leanas freisin:
- (a) a áirithiú go mbeidh sonraí aitheantais úinéara Tiachóige le haghaidh Ghnó na hEorpa ceangailte go cripteagrafach le Tiachóg le haghaidh Ghnó na hEorpa de chuid an úinéara;
 - (b) a áirithiú, chun críocha na feidhmiúlachta dá dtagraítear in Airteagal 5(1), pointe (j):
 - go mbeidh mapálacha idir ról agus tréithe infhíoraithe, in-íniúchta, in-chúlghairthe agus inrianaithe chuig a n-eisitheoirí dlisteanacha;
 - go ndéanfar coinbhleachtaí ról, ró-tharmligean, nó údaruithe atá imithe in éag a bhrath agus a chosc go huathoibríoch i bhfíor-am;
 - go bhfuil an loighic údaráithe uile idir-inoibritheach idir Tiachóga le haghaidh Ghnó na hEorpa.

- (c) slándáil trí dhearadh a áirithiú;
- (d) sásra a sholáthar lena gcuirfear ar chumas úinéirí Tiachóige le haghaidh Ghnó na hEorpa tacaíocht theicniúil a iarraidh go héasca agus fadhbanna teicniúla a bhfuil tionchar diúltach acu ar úsáid Tiachóg le haghaidh Ghnó na hEorpa a thuairisciú;
- (e) sásraí bailíochtaithe a sholáthar, chun a áirithiú gur féidir barántúlacht agus bailíocht Tiachóg le haghaidh Ghnó na hEorpa a fhíorú;
- (ea) na Tiachóga le haghaidh Ghnó na hEorpa arna soláthar acu a dhéanamh inrochtana lena n-úsáid, ag daoine faoi mhíchumas ar bhonn comhionann le húsáideoirí eile.
- (f) a áirithiú gur féidir bailíocht Tiachóg le haghaidh Ghnó na hEorpa a chúlghairm sna himthosca seo a leanas:
 - arna iarraidh sin go sainráite d’úinéir Tiachóige le haghaidh Ghnó na hEorpa;
 - i gcás inar cuireadh slándáil na Tiachóige le haghaidh Ghnó na hEorpa i mbaol;
 - ar scor buan nó sealadach de ghníomhaíocht úinéara Tiachóige le haghaidh Ghnó na hEorpa;
 - i gcás nach n-áirítear soláthraí Tiachóige le haghaidh Ghnó na hEorpa ar an liosta dá dtagraítear in Airteagal 12(3).
- (g) fógra a thabhairt don Choimisiún gan moill mhíchuí maidir leis an méid seo a leanas:
 - an sásra lena féidir sonraí aitheantais úinéara Tiachóige le haghaidh Ghnó na hEorpa a bhailíochtú;
 - an sásra trínar féidir barántúlacht agus bailíocht Tiachóg le haghaidh Ghnó na hEorpa a fhíorú.

3. An fhaisnéis ar tugadh fógra ina leith de bhun mhír 2, pointe (g) den Airteagal seo, cuirfidh an Coimisiún í ar fáil go poiblí trí bhealach slán, i bhfoirm ríomhshínithe nó ríomhshéalaithe a bheidh oiriúnach don phróiseáil uathoibríoch.
4. Cuirfidh soláthraithe Tiachóg le haghaidh Ghnó na hEorpa na gnéithe teicniúla dá bhforáiltear i míreanna 1 agus 2 chun feidhme i gcomhréir leis na ceanglais a leagtar amach san Iarscríbhinn agus sna gníomhartha cur chun feidhme ábhartha a leagtar amach sa Rialachán seo iad.
5. Faoin [Oifig na bhFoilseachán, cuir isteach an dáta – bliain amháin tar éis theacht i bhfeidhm an Rialacháin seo], bunóidh an Coimisiún, trí bhíthin gníomhartha cur chun feidhme, liosta de chaighdeáin tagartha agus, i gcás inar gá, sonraíochtaí agus nósanna imeachta le haghaidh ghnéithe teicniúla na dTiachóg le haghaidh Ghnó na hEorpa, lena n-áirítear iad siúd atá ríthábhachtach don idir-inoibritheacht agus don tslándáil, le haghaidh malartú sonraí maidir le húdaruithe le cláir náisiúnta, cuir i gcás, agus iad siúd atá ábhartha chun go gcomhlíonfaidh na Ballstáit Airteagal 16, dá bhforáiltear i míreanna 1, 2 agus 3 den Airteagal seo. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.

Airteagal 7

Ceanglais agus oibleagáidí ar sholáthraithe Tiachóg le haghaidh Ghnó na hEorpa

1. Is iad soláthraithe Tiachóg le haghaidh Ghnó na hEorpa a áirítear sa liosta arna bhunú de bhun Airteagal 12(3) a sholáthróidh Tiachóga le haghaidh Ghnó na hEorpa.
2. Beidh soláthraithe Tiachóg le haghaidh Ghnó na hEorpa bunaithe san Aontas, beidh a bpríomháit ghnó agus a bpríomhoibríochtaí acu san Aontas agus ní bheidh riosca ag baint leo do shlándáil an Aontais. Ní bheidh siad faoi réir rialú ag tríú tír ná ag eintiteas tríú tír go háirithe.

- 2a. Faoin [Oifig na bhFoilseachán, cuir isteach an dáta – 8 mí tar éis theacht i bhfeidhm an Rialacháin seo], sonródh an Coimisiún, trí bhíthin gnímh cur chun feidhme, na huirlisí, na táscairí agus na creataí measúnaithe atá oiriúnach chun a chinneadh an bhfuil rioscaí ag baint le soláthraithe Tiachóg le haghaidh Ghnó na hEorpa maidir le slándáil an Aontais de réir bhrí an Airteagail seo, lena n-áirítear le measúnú a dhéanamh cé acu an bhfuil na soláthraithe sin faoi réir rialú ag tríú tír nó ag eintiteas tríú tír. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.
3. Comhlíonfaidh soláthraithe Tiachóg le haghaidh Ghnó na hEorpa na ceanglais a leagtar amach in Airteagal 19a de Rialachán (AE) 910/2014.
4. *scriosta*
5. Comhlíonfaidh soláthraithe Tiachóg le haghaidh Ghnó na hEorpa na [ceanglais chibearshlándála is infheidhme / an Gníomh um Chibearshlándáil] a leagtar síos i ndlí an Aontais agus sa dlí náisiúnta, lena n-áirítear na ceanglais sin a bhaineann le soláthróirí ardriosca a shainaitint. Áiritheoidh soláthraithe freisin go gcomhlíonfaidh a soláthróirí bogearraí agus réiteach slándála na ceanglais sin agus go mbeidh siad i gcomhréir leis na caighdeáin agus na ceanglais slándála ábhartha.
6. Déanfaidh soláthraithe Tiachóg le haghaidh Ghnó na hEorpa an méid seo a leanas:
 - (a) bearta teicniúla agus eagraíochtúla iomchuí a chur chun feidhme chun rúndacht, sláine, barántúlacht agus infhaighteacht na dTiachóg le haghaidh Ghnó na hEorpa a sholáthraíonn siad a áirithiú, chomh maith lena n-idir-inoibritheacht le Tiachóga le haghaidh Ghnó na hEorpa eile agus le Tiachóga Eorpacha Céannachta Digití a áirithiú;
 - (b) a áirithiú go gcuirfear úinéirí Tiachóige le haghaidh Ghnó na hEorpa ar an eolas go soiléir ar bhealach soláimhsithe, gonta agus inrochtana, faoi théarmaí agus coinníollacha úsáide na Tiachóige le haghaidh Ghnó na hEorpa, lena n-áirítear raon feidhme agus teorainneacha na gcroifheidhmiúlachtaí agus na bhfeidhmiúlachtaí breise, caighdeáin chibearshlándála, agus cearta úinéir na Tiachóige le haghaidh Ghnó na hEorpa maidir le hiniomparthacht sonraí, sásamh agus foirceannadh seirbhíse;

- (c) a áirithiú go gcuirfear úinéirí Tiachóige le haghaidh Ghnó na hEorpa agus a n-úsáideoirí údaraithe Tiachóige le haghaidh Ghnó na hEorpa ar an eolas go soiléir, ar bhealach soláimhsithe, gonta agus inrochtana, faoina gcearta agus faoina n-oibleagáidí i ndáil lena n-aonad Tiachóige le haghaidh Ghnó na hEorpa, go háirithe an ceart cúlghairm a bhfianaithe aonaid Tiachóige le haghaidh Ghnó na hEorpa a iarraidh, trí úsáid a bhaint as an sásra fíordheimhnithe dá bhforáiltear i bpointe 1 den Iarscríbhinn;
- (d) oibriú i gcomhar leis na comhlachtaí inniúla maoirseachta dá dtagraítear in Airteagal 13(1), nó leis an gCoimisiún sna cásanna dá dtagraítear in Airteagail 13(10) agus 15(1) agus freagra a thabhairt gan moill mhíchuí ar aon iarraidh ar fhaisnéis nó ar dhoiciméadacht is gá chun comhlíonadh an Rialacháin seo a fhíorú;
- (e) fógra a thabhairt do na comhlachtaí maoirseachta náisiúnta ábhartha, nó don Choimisiún sna cásanna dá dtagraítear in Airteagal 15(1), faoi aon athrú substainteach ar a seirbhísí, lena n-áirítear an rún deireadh a chur leis na gníomhaíochtaí, nó ar a struchtúr foriomlán a d'fhéadfadh tionchar a bheith aige ar chomhlíonadh an Rialacháin seo ag an soláthraí;
- (f) fógra a thabhairt d'úinéirí Tiachóige le haghaidh Ghnó na hEorpa i gcás ina ndéanfar seirbhísí a chuireann soláthraithe Tiachóg le haghaidh Ghnó na hEorpa ar fáil a chur ar fionraí, a chúlghairm nó a fhoirceannadh go deonach agus i gcás ina mbainfear soláthraithe Tiachóg le haghaidh Ghnó na hEorpa den liosta arna bhunú de bhun Airteagal 12(3) agus a áirithiú go ndéanfar sonraí úinéara Tiachóige le haghaidh Ghnó na hEorpa a aistriú nó a scriosadh i gcomhréir leis na treoracha d'úinéirí Tiachóige le haghaidh Ghnó na hEorpa, lena n-áirítear sonraí aitheantais úinéara Tiachóige le haghaidh Ghnó na hEorpa;
- (g) a áirithiú go dtabharfar fógra don Choimisiún faoin bhfaisnéis maidir le húinéirí Tiachóige le haghaidh Ghnó na hEorpa, de bhun Airteagal 10(2), agus go gcoimeádfaidh soláthraithe na sonraí aitheantais úinéara Tiachóige le haghaidh Ghnó na hEorpa an fhaisnéis a cuireadh faoi bhráid an Choimisiúin ar dtús cothrom le dáta agus go gcomhthacóidh siad léi trí na haitheantóirí uathúla dá dtagraítear in Airteagal 8(5), pointe (b) a eisiúint;

- 6a. Coinneoidh soláthraithe Tiachóg le haghaidh Ghnó na hEorpa leagan doiciméadaithe cothrom le dáta den mheasúnú riosca dá dtagraítear in Airteagal 11(2a), de réir na nósanna imeachta agus na gcritéar a leagtar amach sna gníomhartha cur chun feidhme dá dtagraítear in Airteagal 11(2c).
- 6b. Déanfaidh soláthraithe Tiachóg le haghaidh Ghnó na hEorpa, de réir na nósanna imeachta agus na gcritéar a leagtar amach sna gníomhartha cur chun feidhme dá dtagraítear in Airteagal 11(2c), an féinmheasúnú dá dtagraítear in Airteagal 11(2aa) a thabhairt cothrom le dáta gach 24 mhí nó láithreach bonn i gcás inarb amhlaidh an méid seo a leanas:
- (a) tharla teagmhas suntasach;
 - (b) déantar athrú substaintiúil d'ailtireacht, feidhmeanna slándála, comhpháirteanna cripteagrafacha, soláthróirí criticiúla nó croífheidhmiúlachtaí na Tiachóige le haghaidh Ghnó na hEorpa;
 - (c) déantar feidhm a dhéanann difear do shlándáil, bailíocht, barántúlacht nó iniomparthacht Tiachóige le haghaidh Ghnó na hEorpa a chur ar fionraí, a chúlghairm nó a mhodhnú go hábhartha;
 - (d) sainaitnítear riosca nua sa mheasúnú riosca dá dtagraítear i mír 6a.
- 6c. Faoin [Oifig na bhFoilseachán, cuir isteach an dáta – bliain amháin tar éis theacht i bhfeidhm an Rialacháin seo], bunóidh an Coimisiún, trí bhíthin gníomhartha cur chun feidhme, liosta de chaighdeáin tagartha agus, i gcás inar gá, sonraíochtaí agus nósanna imeachta le haghaidh mhír 3. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.

Sonraí aitheantais úinéara Tiachóige le haghaidh Ghnó na hEorpa

1. Soláthraithe sonraí aitheantais úinéara Tiachóige le haghaidh Ghnó na hEorpa a eiseoidh sonraí aitheantais úinéara Tiachóige le haghaidh Ghnó na hEorpa do Thiachóga le haghaidh Ghnó na hEorpa de chuid úinéirí Tiachóige le haghaidh Ghnó na hEorpa.
 - 1a. I gcás inar eintitis de chuid an Aontais iad úinéirí Tiachóige le haghaidh Ghnó na hEorpa, eiseoidh an Coimisiún sonraí aitheantais úinéara Tiachóige le haghaidh Ghnó na hEorpa do Thiachóga le haghaidh Ghnó na hEorpa na n-eintiteas sin de chuid an Aontais.
2. Tabharfaidh na Ballstáit fógra don Choimisiún faoi na foinsí barántúla ábhartha nó faoin ardán idirmheánach atá ag gníomhú thar a gceann le haghaidh fhíorú na dtréithe is gá chun sonraí aitheantais úinéara Tiachóige le haghaidh Ghnó na hEorpa a eisiúint. Ar bhonn na faisnéise a gheofar de bhun na míre seo, cuirfidh an Coimisiún liosta de na foinsí barántúla ábhartha ar tugadh fógra ina leith ar fáil ar shuíomh gréasáin an Choimisiúin, i bhformáid mheaisín-inléite.
3. Eiseofar sonraí aitheantais úinéara Tiachóige le haghaidh Ghnó na hEorpa i bhformáid atá i gcomhréir le ceann de na caighdeáin a liostaítear in Iarscríbhinn II a ghabhann le Rialachán Cur Chun Feidhme (AE) 2024/2979 ón gCoimisiún agus mar seo a leanas:
 - (a) ríomhdhearbhuithe tréithe cáilithe, i gcás ina soláthraíonn soláthraithe seirbhísí iontaoibhe cáilithe iad;
 - (b) ríomhdhearbhuithe tréithe a eisiúint comhlacht earnála poiblí atá freagrach as foinse bharántúil nó a eisiúint thar a cheann, i gcás ina soláthraíonn comhlacht earnála poiblí atá freagrach ar an gcaoi sin iad;
 - (c) ríomhdhearbhuithe tréithe, nuair a sholáthraíonn an Coimisiún iad.

4. Beidh an éifeacht dhlíthiúil chéanna ag sonraí aitheantais úinéara Tiachóige le haghaidh Ghnó na hEorpa a eisiónn an Coimisiún agus atá ag ríomhdhearbhuithe tréithe cáilithe agus ag ríomhdhearbhuithe tréithe a eisiónn comhlacht earnála poiblí atá freagrach as foinse bharántúil, nó a eisiítear thar a cheann.
5. Beidh na tréithe seo a leanas ar a laghad i sonraí aitheantais úinéara Tiachóige le haghaidh Ghnó na hEorpa:
 - (a) ainm oifigiúil an oibreora eacnamaíoch nó an chomhlachta earnála poiblí, mar a thairfeadtar sa chlár ábhartha nó sa taifead oifigiúil ábhartha;
 - (b) an t-aitheantóir uathúil ábhartha a shanntar i gcomhréir le hAirteagal 9.
6. Déanfaidh an Coimisiún scéim fianaithe a bhunú agus a choinneáil ar bun le haghaidh sonraí aitheantais úinéara Tiachóige le haghaidh Ghnó na hEorpa. Liostófar an scéim sin i gcatálog na scéimeanna um dhearbhu tréithe dá dtagraítear in Airteagal 8 de Rialachán Cur Chun Feidhme (AE) 2025/1569.
7. Faoin [Oifig na bhFoilseachán, cuir isteach an dáta – bliain amháin tar éis theacht i bhfeidhm an Rialacháin seo] déanfaidh an Coimisiún, trí bhíthin gníomhartha cur chun feidhme, ceanglais a leagan amach maidir le sonraí aitheantais úinéara Tiachóige le haghaidh Ghnó na hEorpa a eisiítear de bhun an Airteagail seo, lena n-áirítear nósanna imeachta do na Ballstáit chun fógra a thabhairt don Choimisiún faoi na foinsí barántúla ábhartha. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.

Airteagal 9

Aitheantóirí uathúla

1. I gcás inar sannadh Aitheantóir Uathúil Eorpach d'oibreoir eacnamaíoch, úsáidfear an t-aitheantóir sin mar an t-aitheantóir uathúil dá dtagraítear in Airteagal 8(5), pointe (b), den Rialachán seo.
2. I gcás nár sannadh Aitheantóir Uathúil Eorpach d'oibreoir eacnamaíoch nó do chomhlacht earnála poiblí, cruthófar aitheantóir uathúil chun críocha sonraí sainaitheantais úinéara Tiachóige le haghaidh Ghnó na hEorpa, arna iarraidh sin don oibreoir eacnamaíoch nó don chomhlacht earnála poiblí nó ar Thiachóg le haghaidh Ghnó na hEorpa a sholáthar don eintiteas sin, i gcomhréir le mír 4.
3. I gcás inar eintiteas de chuid an Aontais é comhlacht earnála poiblí, cruthóidh an Coimisiún aitheantóir uathúil chun críocha sonraí sainaitheantais úinéara Tiachóige le haghaidh Ghnó na hEorpa agus sannfaidh sé don eintiteas sin de chuid an Aontais é i gcomhréir le mír 4.
4. Faoin [Oifig na bhFoilseachán, cuir isteach an dáta – bliain amháin tar éis theacht i bhfeidhm an Rialacháin seo] bunóidh an Coimisiún, trí bhíthin gníomhartha cur chun feidhme, sonraíochtaí, ceanglais agus nósanna imeachta a bhaineann leis an aitheantóir uathúil dá dtagraítear i mír 2 agus 3 den Airteagal seo, lena n-áirítear bearta chun a áirithiú nach sannfar níos mó ná aitheantóir uathúil amháin d'úinéirí Tiachóige le haghaidh Ghnó na hEorpa. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.

Eolaire Digiteach Eorpach

1. Déanfaidh an Coimisiún Eolaire Digiteach Eorpach a bhunú, a oibriú agus a choinneáil ar bun a ghníomhóidh mar an fhoinsé iontaofa faisnéise d'úinéirí Tiachóige le haghaidh Ghnó na hEorpa agus a bheidh i bhfoirm feidhmchláir gréasáin ina mbeidh dhá chomhéadan:
 - (a) comhéadan meaisín-inléite a nochtar trí Chomhéadan Feidhmchláir le haghaidh cumarsáid uathoibrithe córas le córas;
 - (b) ardán slán gréasánbhunaithe lena soláthraítear rochtain d'úsáideoirí fiordheimhnithe agus údaraithe Tiachóige le haghaidh Ghnó na hEorpa trí thairseach ar líne d'úsáideoirí Tiachóige le haghaidh Ghnó na hEorpa.
2. Chun an tEolaire Digiteach Eorpach a choinneáil ar bun, déanfaidh soláthraithe Tiachóg le haghaidh Ghnó na hEorpa, ar Thiachóg le haghaidh Ghnó na hEorpa a sholáthar, na catagóirí faisnéise a leagtar amach i mír 3a agus sna gníomhartha cur chun feidhme dá dtagraítear i mír 6 a sholáthar don Choimisiún.
3. Áiritheoidh an Coimisiún go n-áireofar an fhaisnéis ábhartha san Eolaire Digiteach Eorpach.
 - 3a. Soláthróidh soláthraithe Tiachóg le haghaidh Ghnó na hEorpa an fhaisnéis seo a leanas, ar a laghad, don Choimisiún nuair a eiseofar Tiachóg le haghaidh Ghnó na hEorpa d'úinéir Tiachóige le haghaidh Ghnó na hEorpa:
 - (a) ainm oifigiúil úinéara Tiachóige le haghaidh Ghnó na hEorpa mar a luaitear i gclár náisiúnta thír bhunaíochta nó ghnátháit chónaithe an úinéara;
 - (b) an t-aitheantóir uathúil dá dtagraítear in Airteagal 9;

- (c) an seoladh nó na seoltaí digiteacha uathúla dá dtagraítear i bpointe (j) de mhír 1 d’Airteagal 6;
 - (d) tír bhunaíochta úinéara Tiachóige le haghaidh Ghnó na hEorpa.
- 3b. Chun a áirithiú go gcomhlíonfar na hoibleagáidí a leagtar síos in Airteagal 16, i gcás nach úinéir Tiachóige le haghaidh Ghnó na hEorpa é comhlacht earnála poiblí, soláthróidh sé an fhaisnéis seo a leanas don Choimisiún chun é a áireamh san Eolaire Digiteach Eorpach:
- (a) ainm oifigiúil an chomhlachta earnála poiblí;
 - (b) an t-aitheantóir uathúil dá dtagraítear in Airteagal 9;
 - (c) an seoladh nó na seoltaí digiteacha uathúla dá dtagraítear i mír 1a d’Airteagal 6;
 - (d) tír bhunaíochta an chomhlachta earnála poiblí.
4. Cuirfidh an Coimisiún an tEolaire Digiteach Eorpach ar fáil d’úinéirí Tiachóige le haghaidh Ghnó na hEorpa, dá n-úsáideoirí údaraithe Tiachóige le haghaidh Ghnó na hEorpa, do sholáthraithe Tiachóg le haghaidh Ghnó na hEorpa agus d’údaráis na mBallstát.
- 4a. Déanfaidh soláthraithe Tiachóige le haghaidh Ghnó na hEorpa, uair amháin gach 72 uair an chloig ar a laghad, faisnéis úinéir na Tiachóige le haghaidh Ghnó na hEorpa dá dtagraítear i mír 3a a fhíorú, i gcás inarb infheidhme trí úsáid a bhaint as sásraí fíorúcháin nó as fógraí arna gcur ar fáil ag na foinsí barántúla ábhartha.
5. Déanfaidh soláthraithe Tiachóige le haghaidh Ghnó na hEorpa aon mhodhnú nó aon chúlghairm a bhaineann leis an bhfaisnéis dá dtagraítear i mír 2 a chur in iúl go díreach don Choimisiún chun an tEolaire Digiteach Eorpach a choinneáil ar bun, gan moill mhíchuí agus, in aon chás, aon lá oibre amháin tar éis an fhaisnéis sin a fháil de bhun mhír 4a.

6. Faoin [Oifig na bhFoilseachán, cuir isteach an dáta – bliain amháin tar éis theacht i bhfeidhm an Rialacháin seo], bunóidh an Coimisiún, trí bhíthin gníomhartha cur chun feidhme, caighdeáin agus sonraíochtaí teicniúla le haghaidh na seoltaí digiteacha uathúla agus na gcatagóirí faisnéise atá le cur in iúl don Choimisiún chun críoch an Eolaire Dhigitigh Eorpaigh. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.

Airteagal 11

Údarú soláthraithe Tiachóg le haghaidh Ghnó na hEorpa

1. Eintitis a bhfuil sé beartaithe acu Tiachóga le haghaidh Ghnó na hEorpa a sholáthar, cuirfidh siad iarratas ar údarú isteach don chomhlacht maoirseachta inniúil in éineacht leis an bhfaisnéis a liostaítear i mír 2.
2. Beidh an fhaisnéis seo a leanas san fhógra dá dtagraítear i mír 1:
 - (a) ainm dlíthiúil an eintitis, aon ainm tráchtála a úsáidtear, URL an tsuímh gréasáin, ríomhphost teagmhála, uimhir theileafóin, agus seoladh fisiceach;
 - (b) uimhir chláir an eintitis arna heisiúint ag clár náisiúnta, i gcás ina mbeidh sí ar fáil;
 - (c) tuairisc ar an gcaoi a dtairgfidh na Tiachóga le haghaidh Ghnó na hEorpa a bhfuil sé beartaithe ag an eintiteas a sholáthar na croífheidhmiúlachtaí, a leagtar amach in Airteagal 5(1);
 - (d) tuairisc ar aon fheidhmiúlacht bhreise, a dtacaíonn Tiachóga le haghaidh Ghnó na hEorpa leo, a bhfuil sé beartaithe ag an eintiteas iad a sholáthar;

- (e) an tuarascáil féinmheasúnaithe dá dtagraítear i mír 2aa, lena n-áireofar:
- (i) tuairisc ar phleananna foirceanta i gcásanna ina gcuireann soláthraí Tiachóg le haghaidh Ghnó na hEorpa deireadh lena ghníomhaíochtaí, lena n-áirítear an chaoi a gcoinnítear rochtain ar fhaisnéis;
 - (ii) na beartais agus na bearta comhfhreagracha chun bainistiú a dhéanamh ar na rioscaí a bhaineann le Tiachóga le haghaidh Ghnó na hEorpa dá dtagraítear in Airteagal 7(3) a sholáthar.
 - (iii) na beartais agus na bearta comhfhreagracha a cuireadh chun feidhme chun aghaidh a thabhairt ar na rioscaí a sainithníodh sa mheasúnú riosca dá dtagraítear i mír 2a;

2a. Déanfaidh iarratasóirí, agus na nósanna imeachta agus na critéir a leagtar amach sna gníomhartha cur chun feidhme dá dtagraítear i mír 2c den Airteagal seo á leanúint acu, measúnú riosca lena gcumhdófar an réiteach maidir le Tiachóg le haghaidh Ghnó na hEorpa a bhfuil sé beartaithe acu é a sholáthar ina iomláine, lena n-áirítear rioscaí a eascraíonn as a dhearadh, a fhorbairt, a imscaradh, a oibriú, a chothabháil, a idir-inoibritheacht, a spleáchais agus a fhoirceannadh. I gcás ina ndearna iarratasóirí measúnuithe riosca de bhun dlí infheidhme eile de chuid an Aontais lena gcumhdaítear rioscaí a chomhfhreagraíonn do na rioscaí sin dá dtagraítear sa Rialachán seo nó sna gníomhartha cur chun feidhme dá dtagraítear in Airteagal 11, ní cheanglófar orthu measúnú riosca breise a dhéanamh chun na héifeachta céanna agus féadfaidh siad an measúnú riosca sin a thíolacadh mar chuid den tuarascáil féinmheasúnaithe.

2aa. Léireoidh iarratasóirí comhréireacht leis na ceanglais in Airteagail 5, 6, 7 agus san Iarscríbhinn trí thuarascáil féinmheasúnaithe a eascraíonn as féinmheasúnú comhréireachta leis na ceanglais sin, lena n-áirítear, i gcás inarb infheidhme, tuarascáil féinmheasúnaithe arna soláthar ag tríú páirtithe óna bhfaigheann an t-iarratasóir na seirbhísí a thagann faoi Airteagail 5, 6, 7 agus faoin Iarscríbhinn agus nach soláthraíonn an t-iarratasóir féin go díreach i gcomhréir leis na ceanglais a bhfuil feidhm acu maidir leis.

- 2b. I gcás ina léiríonn iarratasóirí nó tríú páirtí óna bhfaigheann an t-iarratasóir na seirbhísí iontaoibhe cáilithe ábhartha cheana féin go bhfuil na ceanglais maidir le seirbhísí iontaoibhe cáilithe arna mbunú de bhun Rialachán (AE) Uimh. 910/2014 a chomhfhreagraíonn dóibh siúd a liostaítear in Airteagail 5, 6, 7 agus san Iarscríbhinn a ghabhann leis an Rialachán seo á gcomhlíonadh acu, agus i gcás ina bhfuil tuarascáil bhailí ar mheasúnú comhréireachta nó deimhniú bailí acu ó chomhlacht measúnaithe comhréireachta de bhun Rialachán (AE) Uimh. 910/2014, cuirfidh iarratasóirí na tuarascálacha nó na deimhnithe sin ar mheasúnú comhréireachta isteach mar chuid den tuarascáil féinmheasúnaithe. Maidir leis na ceanglais chomhfhreagracha sin, ní cheanglófar ar iarratasóirí féinmheasúnú breise a dhéanamh a mbeidh an éifeacht chéanna aige.
- 2c. Déanfaidh an Coimisiún faoin [Oifig na bhFoilseachán, cuir isteach an dáta bliain amháin ó dháta chur i bhfeidhm an Rialacháin seo], trí bhíthin gníomhartha cur chun feidhme, na nósanna imeachta, na critéir mheasúnaithe agus clár rioscaí don mheasúnú riosca agus don tuarascáil féinmheasúnaithe dá dtagraítear i mír 2 a shonrú, lena n-áirítear conas difríochtaí i gcásanna úsáide nó in earnálacha úsáide, sonraíochtaí tástála le haghaidh comhéadan, agus ceanglais maidir le hinfhaighteacht seirbhíse a chur san áireamh. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.
3. *scriosta*
4. Tar éis iarratas ar údarú a fháil, beidh 60 lá ag an gcomhlacht maoirseachta chun athbhreithniú a dhéanamh ar an bhfaisnéis a cuireadh isteach.

I gcás ina dtiocfaidh an comhlacht maoirseachta ar an gconclúid san iarratas ar údarú sin go bhfuil an fhaisnéis iomlán agus go gcomhlíontar ceanglais an Rialacháin seo, cuirfidh sé an Coimisiún ar an eolas laistigh de 2 lá oibre d'fhonn an soláthraí sin a chur leis an liosta dá dtagraítear in Airteagal 12(3).

5. I gcás ina dtiocfaidh an comhlacht maoirseachta ar an gconclúid san iarratas ar údarú sin nach bhfuil an fhaisnéis iomlán nó nach gcomhlíontar ceanglais an Rialacháin seo, iarrfaidh sé faisnéis bhreise nó mínithe breise ar an iarratasóir agus socróidh sé sprioc-am réasúnach, nach faide ná 15 lá féilire, chun freagra a thabhairt. Má chuireann an fhaisnéis nó na mínithe sin ar chumas an chomhlachta maoirseachta a chinneadh go bhfuil an fhaisnéis iomlán agus go gcomhlíontar ceanglais an Rialacháin seo, cuirfidh sé an Coimisiún ar an eolas faoi cheann 10 lá oibre d'fhonn an soláthraí sin a chur leis an liosta dá dtagraítear in Airteagal 12(3). Mura gcuireann, nó mura bhfaighfear aon fhreagra, cuirfidh an comhlacht maoirseachta in iúl don iarratasóir nach gcuirfear leis an liosta dá dtagraítear in Airteagal 12(3) é.
6. I gcás nach raibh freagra substainteach tugtha ag an gcomhlacht maoirseachta don iarratasóir ar thoradh an iarratais ar údarú dá dtagraítear i mír 4 laistigh de 60 lá féilire ón iarratas ar údarú a fháil, cuirfidh an comhlacht maoirseachta, gan moill mhíchuí, an t-iarratasóir ar an eolas faoi na cúiseanna leis an moill agus faoin tréimhse ina mbeidh an t-athbhreithniú le tabhairt i gcrích, ar tréimhse í nach faide ná 20 lá féilire. Tar éis na tréimhse sin, tiocfaidh an comhlacht maoirseachta ar chonclúid maidir leis an iarratas agus cuirfidh sé an t-iarratasóir ar an eolas chuige sin gan moill mhíchuí.
7. Áiritheoidh na Ballstáit go mbeidh sé de cheart ag na hiarratasóirí leigheas breithiúnach éifeachtach a fháil in aghaidh cinneadh ón údarás maoirseachta, nó muna bhfuil cinneadh déanta aige, gan dochar d'aon leigheas riaracháin nó neamhbhreithiúnach eile, i gcásanna ina ndiúltaíonn an t-údarás maoirseachta iad a liostú mar sholáthraí Tiachóg le haghaidh Ghnó na hEorpa nó nach ndéanann sé aon chinneadh laistigh de thréimhse ama réasúnta.

Liosta de sholáthraithe údaraithe Tiachóg le haghaidh Ghnó na hEorpa

1. Cuirfidh comhlachtaí maoirseachta an Coimisiún ar an eolas faoi aon athrú ar an bhfaisnéis a sholáthraítear de bhun Airteagal 11, laistigh de 3 lá oibre tar éis dóibh bheith ar an eolas faoi aon athrú.
2. Áireofar an méid seo a leanas san fhaisnéis a sholáthróidh na comhlachtaí maoirseachta dá dtagraítear in Airteagal 11 agus in Airteagal 12(1):
 - (a) cuspóir an taiscthe, a d'fhéadfadh a bheith ar cheann díobh seo a leanas:
 - clárú soláthraí údaraithe Tiachóg le haghaidh Ghnó na hEorpa nach raibh ar an liosta dá dtagraítear i mír 3 roimhe seo;
 - athrú ar fhaisnéis a cuireadh isteach cheana maidir le soláthraithe Tiachóg le haghaidh Ghnó na hEorpa atá ar an liosta dá dtagraítear i mír 3 faoi láthair;
 - iarraidh ar sholáthraí Tiachóg le haghaidh Ghnó na hEorpa a bhaint den liosta dá dtagraítear i mír 3;
 - (b) ainm agus, i gcás inarb infheidhme, ainm tráchtála an tsoláthraí Tiachóg le haghaidh Ghnó na hEorpa;
 - (c) an Ballstát ina bhfuil a phríomháit bhunaíochta ag an soláthraí Tiachóg le haghaidh Ghnó na hEorpa;
 - (d) ainm an chomhlachta maoirseachta;
 - (e) léiriú i dtaobh an soláthraí seirbhísí iontaoibhe cáilithe é an soláthraí Tiachóg le haghaidh Ghnó na hEorpa.

3. Ar bhonn na faisnéise a gheofar de bhun an Airteagail seo, bunóidh an Coimisiún liosta de sholáthraithe Tiachóg le haghaidh Ghnó na hEorpa agus coinneoidh sé ar bun é ar shuíomh gréasáin an Choimisiúin, i bhformáid mheaisín-inléite. Ar an bhfaisnéis a fháil ó na comhlachtaí maoirseachta de bhun Airteagal 11(4)(5)(6) d'fhonn soláthraí a chur leis an liosta, cuirfidh an Coimisiún an soláthraí ar an liosta faoi cheann 2 lá oibre. Sa bhreis ar an bhfógra faoi Airteagal 13(5)(k), déanfaidh an Coimisiún áireamh an tsoláthraí neamhchomhlíontach ar an liosta a chúlghairm faoi cheann 2 lá oibre.

Airteagal 13

Maoirseacht agus pionóis

1. Ainmneoidh gach Ballstát údarás inniúil chun gníomhú mar chomhlacht maoirseachta chun an Rialachán seo a chur i bhfeidhm agus a fhorfheidhmiú. Féadfaidh na Ballstáit údaráis nua a bhunú nó brath ar údaráis atá ann cheana agus atá bunaithe ina gcríoch nó, trí chomhaontú frithpháirteach le Ballstát eile, comhlacht maoirseachta atá bunaithe sa Bhallstát eile sin a ainmniú.
2. *scriosta*
3. Áiritheoidh na Ballstáit go mbeidh na cumhachtaí is gá agus acmhainní leordhóthanacha ag na comhlachtaí maoirseachta dá dtagraítear i mír 1 chun a gcúraimí a fheidhmiú ar bhealach éifeachtach, éifeachtúil agus neamhspleách.
4. Is é an ról a bheidh ag na comhlachtaí maoirseachta dá dtagraítear i mír 1 faireachán a dhéanamh ar chomhlíonadh na gceanglas a leagtar síos sa Rialachán seo agus gníomhaíocht a dhéanamh, más gá, i ndáil le soláthraithe Tiachóg le haghaidh Ghnó na hEorpa, seachas eintitis den Aontas i gcomhréir le mír (5);

5. Áireofar an méid seo a leanas i gcúraimí na gcomhlachtaí maoirseachta dá dtagraítear i mír 1 agus a ról de bhun mhír (4):
- (a) athbhreithniú agus measúnú a dhéanamh ar na hiarratais arna dtíolacadh i gcomhréir le hAirteagal 11;
 - (b) imscrúdú a dhéanamh ar mhaíomhanna cuí-réasúnaithe, go háirithe iad siúd a dhéanann úinéirí Tiachóg le haghaidh Ghnó na hEorpa, nach gcomhlíonann soláthraí Tiachóg le haghaidh Ghnó na hEorpa aon cheann dá oibleagáidí faoin Rialachán seo agus gníomhaíocht a dhéanamh más gá;
 - (c) a fhíorú gur ann do phleananna foirceanta agus go bhfuil siad á gcur i bhfeidhm i gceart i gcás ina gcuireann soláthraí Tiachóg le haghaidh Ghnó na hEorpa deireadh lena ghníomhaíochtaí, lena n-áirítear an chaoi a gcoimeádtar rochtain ar fhaisnéis;
 - (d) a áirithiú go ndéanann soláthraithe Tiachóg le haghaidh Ghnó na hEorpa an cas a leigheas i gcás nach gcomhlíonann siad na ceanglais a leagtar síos sa Rialachán;
 - (e) pionóis a fhorchur i gcomhréir le míreanna 6 go 9;
 - (f) na húdaráis inniúla ábhartha a ainmnítear nó a bhunaítear de bhun Airteagal 8(1) de Threoir (AE) 2022/2555 de chuid na mBallstát lena mbaineann a chur ar an eolas faoi aon eachtra suntasach a bhfaigheann siad amach fúthu agus a gcúraimí á gcomhlíonadh acu agus, i gcás eachtra suntasach a bhaineann le Ballstáit eile, an pointe teagmhála aonair a ainmnítear nó a bhunaítear de bhun Airteagal 8(3) de Threoir (AE) 2022/2555 de chuid an Bhallstáit lena mbaineann agus na pointí teagmhála aonair a ainmnítear de bhun Airteagal 46c(1) de Rialachán (AE) Uimh. 910/2014 sna Ballstáit eile lena mbaineann a chur ar an eolas, agus an pobal a chur ar an eolas nó a cheangal ar an soláthraí Tiachóg le haghaidh Ghnó na hEorpa é sin a dhéanamh i gcás ina gcinneann an comhlacht maoirseachta gur ar mhaithe le leas an phobail é an sárú slándála nó an cailteanas sláine a nochtadh;
 - (g) dul i gcomhar leis na húdaráis mhaoirseachta a bhunaítear de bhun Airteagal 51 de Rialachán (AE) 2016/679, go háirithe, trína gcur ar an eolas gan moill mhíchúí i gcás ina ndealraíonn sé gur sáraíodh rialacha maidir le cosaint sonraí pearsanta agus faoi shárúithe slándála a ndealraíonn sé gur sárúithe i ndáil le sonraí pearsanta iad;

- (h) oibriú i gcomhar, de réir mar is iomchuí, le comhlachtaí maoirseachta náisiúnta eile;
 - (i) sásra gearán a chur ar bun agus poiblíocht shoiléir air a áirithiú trínar féidir le soláthraithe Tiachóg le haghaidh Ghnó na hEorpa gearáin a dhéanamh i gcomhréir le hAirteagal 11(7);
 - (j) *scriosta*
 - (k) fógra a thabhairt don Choimisiún má chinneann an comhlacht maoirseachta nach gcomhlíonann soláthraí Tiachóg le haghaidh Ghnó na hEorpa na ceanglais a leagtar síos sa Rialachán seo a thuilleadh nó gur theip ar an soláthraí na hoibleagáidí a fhorchuirtear leis an Rialachán seo a chomhlíonadh;
 - (l) oibriú i gcomhar leis na húdaráis mhaoirseachta a ainmníonn na Ballstáit de bhun Airteagal 46b de Rialachán (AE) Uimh. 910/2014, go háirithe, chun a áirithiú nach n-eiseofar ach tacar amháin sonraí aitheantais úinéara Tiachóige le haghaidh Ghnó na hEorpa agus aitheantóir uathúil Tiachóige le haghaidh Ghnó na hEorpa d'oibreoírí eacnamaíocha atá bunaithe lasmuigh den Aontas.
6. Leagfaidh na Ballstáit síos na rialacha lena gceadófar don chomhlacht maoirseachta dá dtagraítear i mír 1 pionóis a fhorchur a bheidh infheidhme maidir le sáruithe ar an Rialachán seo agus déanfaidh siad gach beart is gá chun a áirithiú go gcuirfear chun feidhme iad. Beidh na pionóis sin éifeachtach, comhréireach agus athchomhairleach. Ní dhéanfaidh na rialacha sin difear d'Airteagal 31 de Threoir (AE) 2022/2555 ná d'Airteagal 83 de Rialachán (AE) 2016/679.
7. Faoin [Oifig na bhFoilseachán, cuir isteach an dáta 24 mhí tar éis theacht i bhfeidhm an Rialacháin seo], tabharfaidh na Ballstáit fógra don Choimisiún faoi na rialacha a leag na Ballstáit síos i gcomhréir le mír 6 agus tabharfaidh siad fógra don Choimisiún gan mhoill faoi aon leasú a dhéanfar ina dhiaidh sin ar na rialacha. Tabharfaidh an Coimisiún an clár poiblí de na rialacha sin, a mbeidh rochtain éasca air, cothrom le dáta go tráthrialta agus coinneoidh sé ar bun é.

8. Cuirfidh na Ballstáit san áireamh na critéir neamh-uileghabhálacha tháscacha seo a leanas agus pionóis á bhforchur acu i gcomhréir le mír 6:
- (a) nádúr, tromchúis, scála agus fad an tsáraithe;
 - (b) aon ghníomhaíocht a rinne an páirtí sáraitheach chun an damáiste a rinne an sárú a mhaolú nó a leigheas;
 - (c) aon sárú a rinne an páirtí sáraitheach roimhe sin;
 - (d) na sochair airgeadais a ghnóthaigh an páirtí sáraitheach, nó na cailteanais a sheachain sé de bharr an tsáraithe, a mhéid is féidir na sochair nó na cailteanais sin a shuí go hiontaofa;
 - (e) aon toisc ghéaraitheach nó mhaolaitheach eile is infheidhme maidir le himthosca an cháis;
 - (f) láimhdeachas bliantúil iomlán an pháirtí sháraithe sa bhliain airgeadais roimhe sin san Aontas.

Áiríteoidh na Ballstáit go mbeidh sárúithe ar an Rialachán seo a dhéanann soláthraithe Tiachóg le haghaidh Ghnó na hEorpa faoi réir fineálacha riaracháin nach mó ná 2 % den láimhdeachas bliantúil domhanda iomlán sa bhliain airgeadais roimhe sin. Féadfaidh na Ballstáit na rialacha a leagan síos faoi cibé an bhféadfar, agus a mhéid a fhéadfar, fineálacha riaracháin a ghearradh ar údaráis agus ar chomhlachtaí poiblí náisiúnta a bunaíodh sna Ballstáit sin.

9. I gcás nach ndéantar foráil i gcóras dlí Ballstáit maidir le húdaráis riaracháin fineálacha riaracháin a fhorchur, fineálacha a thionscnaíonn an comhlacht maoirseachta agus a fhorchuireann cúirteanna náisiúnta inniúla, a bhfuil éifeacht choibhéiseach acu leis na fineálacha riaracháin a fhorchuireann comhlachtaí maoirseachta, measfar na fineálacha sin a bheith i gcomhréir leis na ceanglais a leagtar síos i mír 6. In aon chás, beidh na fineálacha a ghearrtar éifeachtach, comhréireach agus athchomhairleach. Tabharfaidh an Ballstát sin fógra don Choimisiún faoi fhorálacha na ndlíthe a ghlacann sé de bhun na míre seo faoin [Oifig na bhFoilseachán, cuir isteach an dáta 24 mhí tar éis theacht i bhfeidhm an Rialacháin seo] agus, gan mhoill, faoi aon dlí leasaitheach nó aon leasú ina dhiaidh sin a dhéanfaidh difear dóibh.

10. I gcás nach gcomhlíonann soláthraí Tiachóg le haghaidh Ghnó na hEorpa, seachas eintitis de chuid an Aontais, ceanglais an Rialacháin seo go córasach agus nach bhfuil aon bheart éifeachtach déanta ag na comhlachtaí maoirseachta, agus go dtugann na himthosca sin údar le hidirghabháil láithreach chun feidhmiú cuí an mhargaidh inmheánaigh a chaomhnú, déanfaidh an Coimisiún meastóireacht ar chomhlíonadh i gcomhar leis an gcomhlacht maoirseachta. Cuirfidh an Coimisiún an soláthraí ar an eolas dá réir sin agus oibreoidh an soláthraí i gcomhar de réir mar is gá.
11. Bunaithe ar an meastóireacht, agus cineál agus déine an neamhchomhlíonta á gcur san áireamh, chomh maith leis an tionchar a d'fhéadfadh a bheith aige ar an margadh inmheánach agus ar chearta úinéirí Tiachóg le haghaidh Ghnó na hEorpa lena mbaineann, féadfaidh an Coimisiún, trí bhíthin cinneadh ón gCoimisiún, tar éis dó dul i gcomhairle leis na Ballstáit lena mbaineann agus leis an soláthraí, an soláthraí a chur ar fionraí go sealadach ón liosta dá dtagraítear in Airteagal 12. Sula nglacfaidh sé an cinneadh, rachaidh an Coimisiún i gcomhairle leis na Ballstáit lena mbaineann agus leis an soláthraí, agus tabharfaidh sé deis don soláthraí an neamhchomhlíonadh a leigheas.
- 11a. Bunaithe ar an gcinneadh sin, déanfaidh an comhlacht maoirseachta lena mbaineann bearta chun a áirithiú go gcomhlíonfaidh an soláthraí an Rialachán agus tuairisceoidh sé don Choimisiún i ndáil leis na bearta sin. I gcás ina gcruthófar go bhfuil gníomhaíochtaí feabhais éifeachtach, cuirfidh an Coimisiún deireadh le fionraí an tsoláthraí ón liosta laistigh de 2 lá oibre ón gcruthúnas ar chomhlíonadh a fháil.
12. *scriosta*
13. *scriosta*

Airteagal 14

Grúpa Comhair maidir le Céannacht Dhigiteach Eorpach

Beidh an Grúpa Comhair maidir le Céannacht Dhigiteach Eorpach a bunaíodh de bhun Airteagal 46e de Rialachán (AE) Uimh. 910/2014 freagrach as comhar agus comhroinnt faisnéise a éascú i measc na mBallstát agus an Choimisiúin maidir le hábhair a bhaineann le Tiachóga le haghaidh Ghnó na hEorpa. Áireofar leis sin dea-chleachtais a chomhroinnt, saincheisteanna teicniúla agus oibríochtúla a phlé, agus iarrachtaí a chomhordú chun cur chun feidhme agus feidhmiú cuí Tiachóg le haghaidh Ghnó na hEorpa a áirithiú.

Rialachas agus maoirseacht ar eintitis de chuid an Aontais ar soláthraithe Tiachóg le haghaidh Ghnó na hEorpa iad

1. I gcás inar soláthraí Tiachóg le haghaidh Ghnó na hEorpa é eintiteas de chuid an Aontais, comhlíonfaidh sé na ceanglais a leagtar síos sa Rialachán seo.
 - 1a. Is é an Coimisiún a bheidh ina chomhlacht maoirseachta le haghaidh eintitis de chuid an Aontais nach institiúidí de chuid an Aontais iad. Agus a chúraimí á gcomhlíonadh aige i gcomhréir leis an Rialachán seo, gníomhóidh sé ar shlí a bheidh go hiomlán neamhspleách.
2. Is é an ról a bheidh ag an gCoimisiún, ag gníomhú dó mar chomhlacht maoirseachta i gcomhréir le mír 1a, faireachán a dhéanamh ar chomhlíonadh na gceanglas a leagtar síos sa Rialachán seo agus gníomhaíocht a dhéanamh, más gá, i ndáil le soláthraithe Tiachóg le haghaidh Ghnó na hEorpa, trí bhíthin gníomhaíochtaí maoirseachta ex post.
3. Agus é ag gníomhú mar chomhlacht maoirseachta i gcomhréir le mír 1a, déanfaidh an Coimisiún na cúraimí dá dtagraítear in Airteagal 13(5), pointí a, b, c, d, h.

Ullmhóidh an Coimisiún tuarascáil maidir lena phríomhghníomhaíochtaí i ndáil leis sin.

Caibidil III – Glacadh le Tiachóga le haghaidh Ghnó na hEorpa

Airteagal 16

Oibleagáidí ar chomhlachtaí earnála poiblí

1. Cuirfidh comhlachtaí earnála poiblí ar chumas oibreoírí eacnamaíocha na gníomhaíochtaí seo a leanas a dhéanamh trí phríomhfheidhmiúlachtaí Thiachóga le haghaidh Ghnó na hEorpa a úsáid mar a leagtar amach in Airteagal 5(1):

- (a) sainathint agus fiordheimhniú
- (b) síniú nó séalú
- (c) doiciméid a chur isteach
- (d) fógraí a sheoladh nó a fháil

Déanfar na gníomhaíochtaí a liostaítear i bpointí (a) go (d) den chéad fhomhír chun oibleagáid tuairiscithe a chomhlíonadh nó chun nós imeachta riaracháin a chomhlíonadh.

- 1a. Chun críoch mhír 1, déanfaidh na Ballstáit bearta eagraíochtúla agus teicniúla iomchuí lena gcumasófar úsáid phríomhfheidhmiúlachtaí na dTiachóg le haghaidh Ghnó na hEorpa.
- 2. *scriosta*
- 3. *scriosta*

Caibidil IV – Gnéithe idirnáisiúnta

Airteagal 17

Tiachóga gnó agus ionstraimí agus creataí comhchosúla eile a thairgtear i dtríú tíortha

1. Maidir le réitigh a thairgeann leibhéal coibhéiseach slándála agus feidhmeanna comhchosúla le Tiachóga le haghaidh Ghnó na hEorpa, féadfaidh an Coimisiún gníomhartha cur chun feidhme a ghlacadh lena suífead go meastar go dtugann na réitigh sin dearbhuithe atá coibhéiseach le Tiachóga le haghaidh Ghnó na hEorpa arna n-eisiúint i gcomhréir leis an Rialachán seo, ar choinníoll go bhfuil na réitigh sin idir-inoibritheach leis an gcreat iontaoibhe a leagtar síos i Rialachán (AE) Uimh. 910/2014 agus gur féidir leo tacú le feidhmiúlacht sainaitheantais agus fíordheimhnithe agus le malartú ríomhdhearbhuithe tréithe ar a laghad. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.
2. Féadfaidh an Coimisiún gníomhartha cur chun feidhme a ghlacadh lena suitear go meastar go dtugann creataí tríú tír le haghaidh córais a thairgeann leibhéal coibhéiseach slándála agus feidhmeanna comhchosúla leis na Tiachóga le haghaidh Ghnó na hEorpa dearbhuithe atá coibhéiseach le Tiachóga le haghaidh Ghnó na hEorpa a eisítear i gcomhréir leis an Rialachán seo, ar choinníoll go bhfuil na córais a sholáthraítear faoin gcreat sin idir-inoibritheach leis an gcreat iontaoibhe a leagtar síos i Rialachán (AE) 910/2014 agus gur féidir leo tacú le feidhmiúlacht sainaitheantais agus fíordheimhnithe agus le malartú ríomhdhearbhuithe tréithe ar a laghad. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 19.
3. Sula nglacfar na gníomhartha cur chun feidhme dá dtagraítear i míreanna 1 agus 2, déanfaidh an Coimisiún measúnú ar réiteach, córas nó creat an tríú tír, agus aird á tabhairt, ar a laghad, ar chaighdeáin cosanta sonraí, ar chomhlíonadh na gceanglas cibearshlándála agus ar neamhspleáchas an chórais tríú tír agus a sholáthraithe ar rialú rialtas ardriosca. Úsáidfear an measúnú sin chun a chinneadh an féidir a mheas go bhfuil na dearbhuithe coibhéiseach leis na ceanglais faoin Rialachán seo.

4. I gcás ina léireoidh an fhaisnéis atá ar fáil nach féidir a mheas a thuilleadh go bhfuil na dearbhuithe sin coibhéiseach leis na ceanglais faoin Rialachán seo, déanfaidh an Coimisiún an gníomh dá dtagraítear i míreanna 1 agus 2 a aisghairm, a leasú nó a chur ar fionraí a mhéid is gá trí bhíthin gníomh cur chun feidhme.
5. Foilseoidh an Coimisiún ar a shuíomh gréasáin liosta de chreataí, de thiachóga gnó nó de chórais lena dtairgtear feidhmeanna comhchosúla arna n-eisiúint ag soláthraithe atá bunaithe i dtríú tíortha a bhfuil gníomh cur chun feidhme glactha ag an gCoimisiún ina leith de bhun an Airteagail seo.

Airteagal 18

Tiachóga le haghaidh Ghnó na hEorpa a sholáthar d'oibreoirí eacnamaíocha atá bunaithe lasmuigh den Aontas

1. Féadfaidh soláthraithe Tiachóg le haghaidh Ghnó na hEorpa Tiachóga le haghaidh Ghnó na hEorpa a sholáthar d'oibreoirí eacnamaíocha atá bunaithe i dtríú tír ar choinníoll gur eisíodh sonraí aitheantais úinéara Tiachóige le haghaidh Ghnó na hEorpa agus aitheantóir uathúil do na hoibreoirí eacnamaíocha sin i gcomhréir leis an Airteagal seo.
2. Chun críocha an Airteagail seo, ní iarrfaidh oibreoirí eacnamaíocha ach tacar amháin de shonraí aitheantais úinéara Tiachóige le haghaidh Ghnó na hEorpa ó sholáthraí amháin sonraí aitheantais úinéara Tiachóige le haghaidh Ghnó na hEorpa.
3. I gcás ina n-iarrfaidh oibreoir eacnamaíoch atá bunaithe lasmuigh den Aontas Tiachóg le haghaidh Ghnó na hEorpa ar sholáthraí Tiachóg le haghaidh Ghnó na hEorpa, tabharfaidh an soláthraí sin fógra faoin iarraidh sin do chomhlacht maoirseachta an Bhallstáit ina bhfuil sé údaraithe.
4. Iarrfaidh soláthraithe Tiachóg le haghaidh Ghnó na hEorpa sonraí aitheantais úinéara Tiachóige le haghaidh Ghnó na hEorpa ó sholáthraí sonraí aitheantais úinéara Tiachóige le haghaidh Ghnó na hEorpa thar ceann an oibreora eacnamaíoch atá bunaithe i dtríú tír.

5. Féadfaidh soláthraithe sonraí aitheantais úinéara Tiachóige le haghaidh Ghnó na hEorpa sonraí aitheantais úinéara Tiachóige le haghaidh Ghnó na hEorpa agus aitheantóirí uathúla de bhun Airteagail 8 agus 9 a eisiúint d'oibreoirí eacnamaíocha atá bunaithe lasmuigh den Aontas, ar choinníoll:
- (a) go gcomhlíonann cruthú agus fíorú céannachta na n-oibreoirí eacnamaíocha sin agus a n-ionadaí a bhfuil sé de chumhacht acu an próiseas ionduchtaithe a chur i gcrích ceann amháin nó, i gcás inar gá, meascán de na modhanna chun céannacht a fhíorú a leagtar amach in Airteagal 24 (1a) de Rialachán (AE) Uimh. 910/2014;
 - (b) nár eisíodh tacar eile sonraí aitheantais úinéara Tiachóige le haghaidh Ghnó na hEorpa don oibreoir eacnamaíoch.
6. Oibreoidh comhlachtaí náisiúnta maoirseachta i gcomhar le chéile chun a áirithiú gur féidir le soláthraithe sonraí aitheantais úinéara Tiachóige le haghaidh Ghnó na hEorpa a fhíorú nár eisíodh sonraí aitheantais úinéara Tiachóige le haghaidh Ghnó na hEorpa go fóill d'oibreoir eacnamaíoch atá bunaithe lasmuigh den Aontas. Féadfaidh comhlachtaí maoirseachta náisiúnta úsáid a bhaint as an Eolaire Digiteach Eorpach chun na críche sin.
- 6a. Bunóidh an Coimisiún caighdeáin agus sonraíochtaí teicniúla chun sonraí aitheantais úinéara Tiachóige le haghaidh Ghnó na hEorpa, lena n-áirítear aitheantóirí uathúla, a eisiúint d'oibreoirí eacnamaíocha atá bunaithe lasmuigh den Aontas mar chuid de na gníomhartha cur chun feidhme dá dtagraítear in Airteagail 8(9) agus 9(4).

Caibidil V – Forálacha críochnaitheacha

Airteagal 19

Nós imeachta coiste

Tabharfaidh an Coiste a bunaíodh le hAirteagal 48 de Rialachán (AE) Uimh. 910/2014 cúnaimh don Choimisiún. Beidh an coiste sin ina choiste de réir bhrí Rialachán (AE) Uimh. 182/2011. I gcás ina ndéantar tagairt don mhír seo, beidh feidhm ag Airteagal 5 de Rialachán (AE) Uimh. 182/2011.

Leasú ar Rialachán (AE) Uimh. 910/2014

I Rialachán (AE) Uimh. 910/2014, leasaítear Airteagal 5a mar a leanas:

(1) cuirtear an méid seo a leanas in ionad mhír 1:

‘1. Chun a áirithiú go mbeidh rochtain trasteorann shlán, iontaofa agus rianúil ag gach duine nádúrtha san Aontas ar sheirbhísí poiblí agus príobháideacha, agus smacht iomlán acu ar a gcuid sonraí, déanfaidh gach Ballstát ar a laghad Tiachóg Eorpach Céannachta Digití amháin a sholáthar laistigh de 24 mhí tar éis theacht i bhfeidhm na ngníomhartha cur chun feidhme dá dtagraítear i mír 23 den Airteagal seo agus in Airteagal 5c(6).’

(2) i mír 5 cuirtear an méid seo a leanas in ionad phointe (f):

‘(f) áiritheofar go ndéanfar, le sonraí sainaitheantais duine, atá ar fáil ón scéim ríomh-shainaitheantais faoina soláthraítear Tiachóg Eorpach Céannachta Digití á soláthar, léiriú uathúil ar an duine nádúrtha nó ar an duine nádúrtha a dhéanann ionadaíocht ar an duine nádúrtha nó dlítheanach, agus go mbeidh baint ag na sonraí leis an Tiachóg Eorpach Céannachta Digití sin;’;

(3) i mír 9 cuirtear an méid seo a leanas in ionad phointe (c):

‘(c) ar bhás an úsáideora.’;

(4) cuirtear an méid seo a leanas in ionad mhír 15:

‘15. Is go deonach a úsáidfear Tiachóga Eorpacha Céannachta Digití. Maidir le rochtain ar sheirbhísí poiblí agus príobháideacha, rochtain ar mhargadh an tsaothair agus an tsaoirse chun gnó a dhéanamh, ní dhéanfar iad a shrianadh ar aon bhealach ná ní dhéanfar míbhuntáisteach iad i gcás daoine nádúrtha nach n-úsáideann Tiachóga Eorpacha Céannachta Digití. Beifear fós in ann rochtain a fháil ar sheirbhísí poiblí agus príobháideacha trí mhodhanna sainaitheantais agus fíordheimhnithe eile atá ann cheana.’.

Meastóireacht agus athbhreithniú

1. Déanfaidh an Coimisiún athbhreithniú ar chur i bhfeidhm an Rialacháin seo agus, faoin [Oifig na bhFoilseachán, cuir isteach an dáta – 5 bliana tar éis theacht i bhfeidhm an Rialacháin seo], cuirfidh sé tuarascáil faoi bhráid Pharlaimint na hEorpa agus na Comhairle. Déanfar meastóireacht sa tuarascáil ar éifeachtacht fhorálacha an Rialacháin seo maidir le taisceadh doiciméad leictreonach agus ríomhdhearbhuithe a éascú do chomhlachtaí earnála poiblí, trí Thiachóga le haghaidh Ghnó na hEorpa a úsáid, chomh maith le forbairtí teicneolaíoch, margaidh agus dlíthiúla lena n-áirítear, i gcás ina mbeidh fáil uirthi, faisnéis maidir le coigilteas ama agus costais, chomh maith le glacadh ag na gníomhaithe eacnamaíoch uile, lena n-áirítear measúnú sonracha ar thionchar an Rialacháin seo ar mhicrifhiontair agus ar fhiontair bheaga agus mheánmhéide. Déanfar measúnú sa tuarascáil freisin an gá raon feidhme an Rialacháin seo nó a fhorálacha sonracha a mhodhnú chun oibleagáid a leagan amach maidir le húsáid Tiachóg le haghaidh Ghnó na hEorpa chun aghaidh a thabhairt ar na rioscaí a bhaineann le hilroinnt dhlíthiúil.
2. Beidh na gnéithe seo a leanas san áireamh sa tuarascáil dá dtagraítear i mír 1:
 - (a) croifheidhmiúlachtaí íosta Tiachóg le haghaidh Ghnó na hEorpa;
 - (b) leibhéal comhlíontachta soláthraithe Tiachóg le haghaidh Ghnó na hEorpa agus an nós imeachta um údarú a thabhairt agus na critéir maidir le fógra a thabhairt a leagtar síos in Airteagal 11;
 - (c) cur i bhfeidhm agus feidhmiú na rialacha maidir le pionóis a leagann na Ballstáit síos de bhun Airteagal 13;
 - (d) na ceanglais mhionsonraithe agus na sonraíochtaí teicniúla maidir leis an ríomhsheirbhís seachadta chláráithe cháilithe dá dtagraítear in Airteagal 5(1), pointe i;

Tráth nach déanaí ná bliain amháin sula mbeidh an tuarascáil dá dtagraítear i mír 1 dlite, soláthróidh na Ballstáit don Choimisiún an fhaisnéis is gá chun na tuarascálacha a ullmhú.

Teacht i bhfeidhm agus cur i bhfeidhm

1. Tiocfaidh an Rialachán seo i bhfeidhm an fichiú lá tar éis lá a fhoilsithe in Iris Oifigiúil an Aontais Eorpaigh.
 - 1a. Beidh feidhm ag Airteagail 5(5), 6(5), 7(6c), 8(7), 9(4), 10(6), 11(2c), 13, 19, 20 agus 21 ón [Oifig na bhFoilseachán, cuir isteach dáta an teacht i bhfeidhm].
 - 1b. Beidh feidhm ag Caibidil I, II, III, IV agus V, cé is moite d’Airteagail 5(5), 6(5), 7(6c) 8(7), 9(4), 10(3b), 10(6), 11(2c), 13, 16, 19 agus 20 , ón [Oifig na bhFoilseachán, cuir isteach an dáta – bliain amháin tar éis dháta chur i bhfeidhm an ghnímh cur chun feidhme dheireanaigh dá dtagraítear in Airteagail 5(5), 6(5), 7(6c), 8(7), 9(4), 10(6), 11(2c)].
 - 1c. Beidh feidhm ag Airteagail 10(3b) agus 16 ón [Oifig na bhFoilseachán, cuir isteach an dáta – 2 bhliain tar éis dháta chur i bhfeidhm na ngníomhartha cur chun feidhme dheireanacha dá dtagraítear in Airteagail 5(5), 6(5), 7(6c), 8(7), 9(4), 10(6) agus 11(2c)].

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann Pharlaimint na hEorpa
An tUachtarán

Thar ceann na Comhairle
An tUachtarán

Ceanglais maidir le chroífheidhmiúlachtaí agus ceanglais theicniúla Tiachóg le haghaidh Ghnó na hEorpa**1. FÍORDHEIMHNIÚ AONAD TIACHÓG LE HAGHAIDH GHNÓ NA hEORPA**

Ní dheonófar rochtain ar Aonad Tiachóg le haghaidh Ghnó na hEorpa go dtí go mbeidh úsáideoir Tiachóg le haghaidh Ghnó na hEorpa fíordheimhnithe go rathúil trí bhíthin ceachtar de na modhanna seo a leanas:

- (1) modh ríomh-shainaitheantais faoina dtugtar fógra i gcomhréir le hAirteagal 6 de Rialachán (AE) Uimh. 910/2014, lena gcomhlíontar ar a laghad na ceanglais le haghaidh leibhéal suntasach dearbhaithe mar a shainmhínítear in Airteagal 8 den Rialachán sin agus mar a shonraítear a thuilleadh i Rialachán Cur Chun Feidhme (AE) 2015/1502 ón gCoimisiún; nó
- (2) sásra fíordheimhnithe malartach a aithnítear a bheith coibhéiseach agus a chomhlíonann ar a laghad na ceanglais le haghaidh leibhéal suntasach dearbhaithe mar a shainmhínítear in Airteagal 8 de Rialachán (AE) Uimh. 910/2014 agus mar a shonraítear a thuilleadh i Rialachán Cur Chun Feidhme (AE) 2015/1502 ón gCoimisiún.

Go dtí go mbeidh an fíordheimhniú sin curtha i gcrích, ní chuirfear aon fheidhmiúlacht de chuid Aonad Tiachóg le haghaidh Ghnó na hEorpa ná aon fheidhmiúlacht eile ar fáil d'úsáideoir na **Tiachóige le haghaidh Ghnó na hEorpa**.

2. SLÁINE AONAD TIACHÓG LE HAGHAIDH GHNÓ NA hEORPA

Déanfaidh soláthraithe Tiachóg le haghaidh Ghnó na hEorpa, i gcás gach aonaid Tiachóige le haghaidh Ghnó na hEorpa, fianú aonaid Tiachóige le haghaidh Ghnó na hEorpa a ghiniúint agus a shíniú i gcomhréir leis na ceanglais a leagtar síos i bpointe 5. Eiseofar an deimhniú a úsáidfear chun an fianú aonaid Tiachóige le haghaidh Ghnó na hEorpa a shíniú nó a shéalú faoi dheimhniú a liostaítear sa liosta iontaofa dá dtagraítear i Rialachán Cur Chun Feidhme (AE) 2024/2980 ón gCoimisiún.

3. CUMARSÁID SHLÁN AGUS BAINISTIÚ SÓCMHAINNÍ CRITICIÚLA I dTIACHÓGA LE HAGHAIDH GHNÓ NA hEORPA

- (1) Úsáidfídh cúl Tiachóige le haghaidh Ghnó na hEorpa feidhmchlár cripteagrafach slán Tiachóige agus gaireas cripteagrafach slán Tiachóige amháin ar a laghad chun sócmhainní criticiúla a bhainistiú.
- (2) Áiritheoidh soláthraithe Tiachóg le haghaidh Ghnó na hEorpa sláine, barántúlacht agus rúndacht na cumarsáide idir feidhmchláir chripteagrafacha agus gaireas cripteagrafach cúil, tosaigh agus slán na Tiachóige Gnó.
- (3) *scriosta*

4. FEIDHMCHLÁIR CHRIPTEAGRAFACHA SHLÁNA TIACHÓG

- (1) Áiritheoidh soláthraithe Tiachóg le haghaidh Ghnó na hEorpa go ndéanfaidh feidhmchláir agus gléasanna cripteagrafacha slána Tiachóg le haghaidh Ghnó na hEorpa an méid seo a leanas:
 - (a) go ndéanfaidh siad oibríochtaí cripteagrafacha na Tiachóige le haghaidh Ghnó na hEorpa lena mbaineann sócmhainní criticiúla seachas na sócmhainní sin a bhfuil gá leo chun gur féidir leis an aonad Tiachóige le haghaidh Ghnó na hEorpa úinéir na Tiachóige le haghaidh Ghnó na hEorpa a fhíordheimhniú i gcásanna ina bhfuil úsáideoirí Tiachóige le haghaidh Ghnó na hEorpa fíordheimhnithe go rathúil ag na feidhmchláir sin, agus sna cásanna sin amháin;
 - (b) *scriosta*
 - (c) go mbeidh siad in ann eochracha cripteagrafacha nua a ghiniúint go slán;
 - (d) go mbeidh siad in ann sócmhainní criticiúla a léirscriosadh go slán;
 - (e) go mbeidh siad in ann cruthúnas a ghiniúint go bhfuil eochracha príobháideacha ina seilbh acu;
 - (f) go gcosnóidh siad na heochracha príobháideacha a ghintear leis na feidhmchláir agus gléasanna cripteagrafacha slána Tiachóg sin le linn na heochracha a bheith ann;
 - (g) *scriosta*

5. BARÁNTÚLACHT AGUS BAILÍOCHT AONAIÐ TIACHÓG

- (1) Áiritheoidh soláthraithe Tiachóg le haghaidh Ghnó na hEorpa go mbeidh eochracha poiblí i bhfianuithe aonaid Tiachóg le haghaidh Ghnó na hEorpa dá dtagraítear i bpointe 1 agus go gcosnófar na heochracha príobháideacha comhfhreagracha le gaireas cripteagrafach slán Tiachóg.
- (2) Soláthróidh soláthraithe Tiachóg le haghaidh Ghnó na hEorpa sásraí, neamhspleách ar aonaid Tiachóg, chun úsáideoirí Tiachóg le haghaidh Ghnó na hEorpa a shainaitint agus a fhíordheimhniú ar bhealach slán.

6. CÚLGHAIRM FIANUITHE AONAIÐ TIACHÓG

- (1) Bunóidh soláthraithe Tiachóg le haghaidh Ghnó na hEorpa beartas a bheidh ar fáil go poiblí ina sonrúfar na coinníollacha agus an tréimhse ama chun fianuithe aonaid Tiachóg a chúlghairm.
- (2) I gcomhréir le hAirteagal 6, i gcás ina gcúlghairfidh soláthraithe Tiachóg le haghaidh Ghnó na hEorpa fianuithe aonaid Tiachóg le haghaidh Ghnó na hEorpa, cuirfidh siad na húsáideoirí Tiachóg le haghaidh Ghnó na hEorpa lena mbaineann ar an eolas gan moill mhíchúí agus tráth nach déanaí ná 24 uair an chloig ó chúlghairm a n-aonad Tiachóg le haghaidh Ghnó na hEorpa, lena n-áirítear an chúis leis an gcúlghairm agus na hiarmhairtí d'úsáideoir na Tiachóige le haghaidh Ghnó na hEorpa. Soláthrófar an fhaisnéis sin ar bhealach atá gonta, inrochtana go héasca agus i dteanga shoiléir shimplí.
- (3) I gcás ina mbeidh fianú aonaid Tiachóige le haghaidh Ghnó na hEorpa cúlghairthe ag soláthraithe Tiachóg le haghaidh Ghnó na hEorpa, cuirfidh siad stádas bailíochta an fhianaithe aonaid Tiachóige le haghaidh Ghnó na hEorpa ar fáil go poiblí agus tabharfaidh siad tuairisc ar shuíomh na faisnéise sin i bhfianú aonaid na Tiachóige Gnó.

7. LOGAÍ BEARTAÍOCHTA

- (1) Soláthróidh soláthraithe Tiachóg le haghaidh Ghnó na hEorpa beartas logála iomchuí lena n-áireofar, ar a laghad, ríomhshíniú, ríomhshéalú, agus fógraí maidir le gach idirbheart le páirtithe is úsáideoirí Tiachóige le haghaidh Ghnó na hEorpa, aonaid eile Tiachóg le haghaidh Ghnó na hEorpa, agus aonaid Tiachóg Eorpach Céannachta Digití, gan beann ar cibé acu a chuirtear an t-idirbheart i gcrích go rathúil nó nach gcuirtear.

- (2) Beidh an méid seo a leanas ar a laghad san fhaisnéis arna logáil:
 - (a) am agus dáta an idirbhirt;
 - (b) ainm, sonraí teagmhála, agus aitheantóir uathúil an pháirtí is úsáideoir Tiachóige chomhfhreagraigh le haghaidh Ghnó na hEorpa agus an Bhallstáit ina bhfuil an páirtí is úsáideoir Tiachóige sin le haghaidh Ghnó na hEorpa bunaithe, nó i gcás aonaid Tiachóg eile, faisnéis ábhartha ón bhfianú aonaid Tiachóg le haghaidh Ghnó na hEorpa;
 - (c) cineál nó cineálacha na sonraí a iarradh agus a cuireadh i láthair san idirbheart;
 - (d) i gcás idirbhearta nár cuireadh i gcrích, an chúis nár cuireadh i gcrích iad.
- (3) Áiritheoidh soláthraithe Tiachóg le haghaidh Ghnó na hEorpa sláine, barántúlacht, infhaighteacht agus rúndacht na faisnéise logáilte.
- (4) Le bogearra cúil Tiachóige le haghaidh Ghnó na hEorpa logálfar tuarascálacha ó úsáideoir na dTiachóg le haghaidh Ghnó na hEorpa chuig na húdaráis inniúla tríd an aonad Tiachóg le haghaidh Ghnó na hEorpa, lena n-áirítear idirghníomhaíochtaí a bhaineann le fógraí, comhlíonadh rialála, comhroinnt sonraí, nó iarrataí ar iniúchadh.
- (5) Beidh rochtain ag an soláthraí Tiachóg le haghaidh Ghnó na hEorpa ar na logaí dá dtagraítear i bhfophointí 1 agus 2, i gcás inar gá sin chun seirbhísí Tiachóg le haghaidh Ghnó na hEorpa a sholáthar.
- (6) Beidh rochtain ar na logaí dá dtagraítear i bhfophointí 1 agus 2 a fhad a cheanglaítear iad a bheith inrochtana le dlí an Aontais nó leis an dlí náisiúnta.

8. RÍOMHSHÍNITHE AGUS RÍOMHSHÉALAÍ CÁILITHE

- (1) I gcomhréir le hAirteagal 6, áiritheoidh soláthraithe Tiachóg le haghaidh Ghnó na hEorpa go mbeidh úsáideoirí Tiachóige le haghaidh Ghnó na hEorpa in ann deimhnithe cáilithe a fháil le haghaidh ríomhshínithe cáilithe nó ríomhshéalaí cáilithe atá nasctha le gléasanna cruthaithe sínithe nó séala cáilithe atá áitiúil, seachtrach nó cianda i ndáil leis an aonad Tiachóige le haghaidh Ghnó na hEorpa.

- (2) Áiritheoidh soláthraithe Tiachóige le haghaidh Ghnó na hEorpa gur féidir le réitigh Tiachóg le haghaidh Ghnó na hEorpa comhéadan slán a dhéanamh le ceann de na cineálacha gléasanna cruthaithe sínithe nó séala cáilithe seo a leanas: gléasanna cruthaithe sínithe nó séala logánta, seachtracha nó a bhainistítear ó chian chun na deimhnithe cáilithe dá dtagraítear i bhfophointe 1 a úsáid.

9. FEIDHMCHLÁIR CRUTHAITHE SÍNITHE

- (1) Maidir leis na feidhmchláir cruthaithe sínithe a úsáideann aonaid Tiachóg le haghaidh Ghnó na hEorpa, féadfaidh soláthraithe Tiachóg le haghaidh Ghnó na hEorpa, soláthraithe seirbhísí iontaoibhe nó páirtithe is úsáideoirí Tiachóige le haghaidh Ghnó na hEorpa iad a sholáthar.
- (2) Beidh na feidhmeanna seo a leanas ag feidhmchláir cruthaithe sínithe:
- (a) sonraí a shíniú nó a shéalú a chuireann úsáideoirí Tiachóg le haghaidh Ghnó na hEorpa ar fáil;
 - (b) sonraí a shíniú nó a shéalú a chuireann na páirtithe is úsáideoirí ar fáil;
 - (c) sínithe nó séalaí a chruthú i gcomhréir leis an bhformáid éigeantach ar a laghad;
 - sínithe nó séalaí a chruthú i gcomhréir leis an bhformáid roghnach;
 - úsáideoirí Tiachóige le haghaidh Ghnó na hEorpa a chur ar an eolas faoi thoradh an phróisis cruthaithe sínithe nó séala.

Chun coinníollacha aonfhoirmeacha a áirithiú maidir leis an Rialachán seo a chur chun feidhme, tugtar de chumhacht don Choimisiún gníomhartha cur chun feidhme a ghlacadh i gcomhréir le hAirteagal 6 lena sonraítear na caighdeáin theicniúla dá dtagraítear i bhfophointe 2, litreacha (c) agus (c)(ii).

- (3) Féadfar na feidhmchláir cruthaithe sínithe a chomhtháthú i gcúl Tiachóg le haghaidh Ghnó na hEorpa nó a bheith lasmuigh díobh. I gcás ina mbraitheann feidhmchláir cruthaithe sínithe ar ghléasanna cruthaithe sínithe cianda cáilithe agus i gcás ina gcomhtháthaítear iad i gcúl Tiachóg le haghaidh Ghnó na hEorpa, tacóidh siad leis an gcomhéadan feidhmchláir a leagtar amach sna gníomhartha cur chun feidhme, ar comhéadan é a dtugtar de chumhacht don Choimisiún é a ghlacadh i gcomhréir le hAirteagal 5 chun coinníollacha aonfhoirmeacha a áirithiú maidir le cur chun feidhme an Rialacháin seo.

10. ALLMHAIRIÚ, ONNMHAIRIÚ AGUS INIOMPARTHACHT SONRAÍ

Tacóidh Tiachóga le haghaidh Ghnó na hEorpa le honnmhairiú, allmhairiú agus iniomparthacht shlán sonraí Tiachóige le haghaidh Ghnó na hEorpa de chuid úinéara i bhformáid oscailte ar a laghad, agus áiritheoidh siad ag an am céanna go ndearnadh úsáideoirí Tiachóg le haghaidh Ghnó na hEorpa a fhíordheimhniú go rathúil de réir phointe 1 den Iarscríbhinn seo. Cuirfidh sé sin ar chumas an úinéara a shonraí a aistriú chuig réiteach Tiachóg le haghaidh Ghnó na hEorpa eile.

11. BEALACH CUMARSÁIDE DLÍTHIÚIL SLÁN DON TIACHÓG LE HAGHAIDH GHNÓ NA HEORPA

- (1) I gcomhréir le hAirteagal 5 den Rialachán seo, comhtháthóidh Tiachóga le haghaidh Ghnó na hEorpa úsáid ríomhsheirbhíse seachadta cláraithe cáilithe sonraí agus tacóidh siad leis an úsáid sin i gcomhréir le hAirteagail 43 agus 44 de Rialachán (AE) Uimh. 910/2014.
- (2) Déanfaidh an Coimisiún, trí bhíthin gníomhartha cur chun feidhme, an méid seo a leanas:
 - (a) an prótacal a ainmniú agus caighdeáin agus sonraíochtaí a leagan amach maidir le cur chun feidhme comhlíontach na ríomhsheirbhíse seachadta cláraithe cáilithe a bheidh ina bealach cumarsáide dlíthiúil slán éigeantach do Thiachóga le haghaidh Ghnó na hEorpa;
 - (b) sainiú a dhéanamh ar na híoscheanglais theicniúla agus idir-inoibritheachta nach mór don ríomhsheirbhís seachadta chláráithe cháilithe sin a chomhlíonadh, lena n-áirítear ailíniú leis na caighdeáin tagartha, sonraíochtaí agus nósanna imeachta a bhunaítear faoi Airteagail 43 agus 44 de Rialachán (AE) Uimh. 910/2014;
 - (c) a áirithiú go bhfuil an ríomhsheirbhís seachadta chláráithe cháilithe roghnaithe bunaithe ar chaighdeáin oscailte, atá ar fáil go poiblí agus saor ó ríchíosanna chun idir-inoibritheacht a ráthú agus chun gaibhniú díoltóirí a chosc;
 - (d) a áirithiú go soláthróidh an ríomhsheirbhís seachadta chláráithe cháilithe roghnaithe criptiú ó cheann go ceann chun rúndacht a ráthú;
 - (e) nósanna imeachta a bhunú chun infhaighteacht leanúnach, iomarcaíocht agus sásraí cultaca a áirithiú i gcás ina dteipfeadh ar sheirbhís.

- (3) Beidh idir-inoibritheacht idir Tiachóga le haghaidh Ghnó na hEorpa agus an ríomhsheirbhís seachadta chláraithe cháilithe ainmnithe éigeantach. Áiritheoidh soláthraithe Tiachóg le haghaidh Ghnó na hEorpa comhtháthú teicniúil i gcomhréir leis na gníomhartha cur chun feidhme dá dtagraítear i bhfophointe 2.

12. AN SÁSRA UM RIALÚ ROCHTANA I dTIACHÓGA LE hAGHAIDH GHNÓ NA hEORPA

- (1) Áiritheoidh soláthraithe Tiachóg le haghaidh Ghnó na hEorpa go mbeidh cinntí údarúcháin faoin sásra um rialú rochtana bunaithe ar cheann amháin nó níos mó de na critéir seo a leanas, de réir mar is iomchuí maidir leis an iarraidh shonrach ar rochtain:
- (a) ríomhdhearbhú tréithe an ábhair ghníomhaigh;
 - (b) ról foirmiúil na n-ábhar gníomhach laistigh de struchtúr eagraíochtúil aitheanta nó d'oibreoir eacnamaíoch aitheanta;
 - (c) raon feidhme, bailíocht agus srianta aon sainordaithe, tarmligin, nó cumhachta aturnae;
 - (d) faisnéis chomhthéacsúil nó beartais agus rialacha arna nglacadh ar leibhéal an Aontais nó ar an leibhéal náisiúnta maidir le comhlíonadh earnáilsonrach.
- (2) Áiritheoidh soláthraithe Tiachóg le haghaidh Ghnó na hEorpa go gcumasófar leis an sásra rialaithe rochtana torthaí údaraithe mionsonraithe agus in-iniúchta, lena n-áiríteofar an méid seo a leanas:
- (a) go mbeidh infheictheacht na ndintiúr agus na bhfianuithe roghnaitheach agus coinníollach ar chearta rochtana;
 - (b) go rialófar rochtain ar phróisis ghnó, ar nósanna imeachta digiteacha nó ar chomhéadain tíolactha le bailíochtú fíor-ama ar ról agus ar shainorduithe;
 - (c) go ndéantar gach imeacht rochtana agus forghníomhaithe a logáil, a stampáil ó thaobh ama de, agus go mbeidh siad ceangailte le cruthúnais údaraithe atá infhíoraithe go cripteagrafach, atá oiriúnach d'imeachtaí iniúchóireachta agus dlíthiúla.

- (3) Áiritheoidh soláthraithe Tiachóg le haghaidh Ghnó na hEorpa an méid seo a leanas:
- (a) go mbeidh mapálacha idir ról agus tréithe infhíoraithe, in-iniúchta, in-chúlghairthe agus inrianaithe chuig a n-eisitheoirí dlisteanacha;
 - (b) go ndéanfar coinbhleachtaí ról, ró-tharmligean, nó údaruithe atá imithe in éag a bhrath agus a chosc go huathoibríoch i bhfíor-am;
 - (c) tá an loighic údaraithe uile idir-inoibritheach idir Tiachóga le haghaidh Ghnó na hEorpa.
- (4) Saineofar an liosta caighdeán tagartha, sonraíochtaí teicniúla agus nósanna imeachta atá le cur i bhfeidhm chun an sásra um rialú rochtana a chur chun feidhme sna gníomhartha cur chun feidhme, a dtugtar de chumhacht don Choimisiún iad a ghlacadh i gcomhréir le hAirteagal 5 chun coinníollacha aonfhoirmeacha a áirithiú maidir le cur chun feidhme an Rialacháin seo. Cumhdófar an méid seo a leanas go háirithe leo sin:
- (a) na formáidí chun ról agus tréithe a léiriú;
 - (b) sásraí idir-inoibritheachta le haghaidh sainorduithe agus tarmligin ar fud na dtiachóg;
 - (c) prótacail, teanga bheartais agus forfheidhmiú srianta;
 - (d) ceanglais maidir le logáil shlán, stampáil ama agus in-iniúcháireacht imeachtaí údarúcháin.
- (5) Toimhdeofar go bhfuil na ceanglais a leagtar síos san Airteagal seo á gcomhlíonadh i gcás ina gcomhlíontar na caighdeáin, sonraíochtaí agus nósanna imeachta dá dtagraítear i bhfophointe 1.

13. FORÁLACHA GINEARÁLTA MAIDIR LE PRÓTACAIL AGUS COMHÉADAIN

I gcomhréir le hAirteagal 6 den Rialachán seo, áiritheoidh soláthraithe Tiachóg le haghaidh Ghnó na hEorpa go ndéanfaidh aonaid Tiachóg le haghaidh Ghnó na hEorpa an méid seo a leanas:

- (1) iarrataí a údarú agus, i gcás inarb infheidhme, na hiarrataí sin a fhíordheimhniú a dhéantar trí dheimhnithe rochtana páirtí is úsáideoir Thiachóga na Céannachta Digití Eorpaí nó trí fhianuithe aonaid Thiachóga na Céannachta Digití Eorpaí. Beidh fíordheimhniú an pháirtí is úsáideoir ag teastáil i gcás ina bhfuil fianuithe beartaithe do lucht féachana srianta; i ngach cás eile, féadfaidh aon pháirtí iarrthach fianuithe a thíolacadh;

- (2) an fhaisnéis atá i ndeimhnithe rochtana páirtí is úsáideoir na dTiachóg Eorpach Céannachta Digití nó i bhfianuithe aonaid na dTiachóg Eorpach Céannachta Digití a thaispeáint d'úsáideoirí Tiachóige le haghaidh Ghnó na hEorpa i gcás inarb infheidhme;
- (3) na tréithe a iarrtar ar úsáideoirí Tiachóige le haghaidh Ghnó na hEorpa a chur i láthair a thaispeáint d'úsáideoirí Tiachóige le haghaidh Ghnó na hEorpa, i gcás inarb infheidhme;
- (4) fianuithe aonaid Tiachóige le haghaidh Ghnó na hEorpa an aonaid Tiachóige le haghaidh Ghnó na hEorpa a chur faoi bhráid páirtithe is úsáideoirí Tiachóige le haghaidh Ghnó na hEorpa nó faoi bhráid aonaid Tiachóige le haghaidh Ghnó na hEorpa a iarrann é.

14. EISIÚINT RÍOMHDHEARBHUITHE TRÉITHE D'AONAD TIACHÓIGE LE HAGHAIDH GHNÓ NA hEORPA

- (1) I gcomhréir le hAirteagal 5 den Rialachán seo, áiritheoidh soláthraithe Tiachóg le haghaidh Ghnó na hEorpa go mbeidh aonaid Tiachóige le haghaidh Ghnó na hEorpa a iarrann go n-eiseofar ríomhdhearbhuithe tréithe in ann páirtithe is úsáideoirí a fhíordheimhniú.
- (2) I ndáil le ríomhdhearbhuithe tréithe a eisiúint d'aonad Tiachóige le haghaidh Ghnó na hEorpa, áiritheoidh soláthraithe Tiachóg le haghaidh Ghnó na hEorpa go gcomhlíonfar na ceanglais seo a leanas:
 - (a) i gcás ina n-iarrfaidh úinéirí Tiachóg le haghaidh Ghnó na hEorpa, trína n-aonad Tiachóige le haghaidh Ghnó na hEorpa, ar sholáthraí na Tiachóige le haghaidh Ghnó na hEorpa sonraí aitheantais úinéara Tiachóg le haghaidh Ghnó na hEorpa nó ríomhdhearbhuithe tréithe a eisiúint ó sholáthraithe sonraí aitheantais úinéara Tiachóg le haghaidh Ghnó na hEorpa nó ó sholáthraithe ríomhdhearbhuithe tréithe lena gcumasaítear sonraí aitheantais nó ríomhdhearbhuithe tréithe úinéara Tiachóg le haghaidh Ghnó na hEorpa a eisiúint i níos mó ná formáid amháin, iarrfaidh an t-aonad Tiachóg le haghaidh Ghnó na hEorpa iad i ngach formáid dá dtagraítear in Airteagal 8 den Rialachán seo lena leagtar síos rialacha maidir le cur i bhfeidhm an Rialacháin maidir le Tiachóga le haghaidh Ghnó na hEorpa a mhéid a bhaineann le sláine agus croífheidhmiúlachtaí na dTiachóg Ghnó le haghaidh Ghnó na hEorpa;

- (b) i gcás ina n-úsáideann úinéirí Tiachóige le haghaidh Ghnó a n-aonad Tiachóg le haghaidh Ghnó na hEorpa chun idirghníomhú le húdaráis náisiúnta inniúla agus le soláthraithe ríomhdhearbhuithe tréithe, cumasóidh aonaid Tiachóige le haghaidh Ghnó na hEorpa fíordheimhniú agus bailíochtú chomhpháirteanna aonaid Tiachóige le haghaidh Ghnó na hEorpa trí na fianuithe aonaid Tiachóige a chur isteach chuig na húdaráis agus chuig na soláthraithe náisiúnta inniúla sin arna iarraidh sin dóibh;
- (c) Tacóidh réitigh Tiachóige le haghaidh Ghnó na hEorpa le sásraí lena gcuirfear ar chumas soláthraithe Sonraí Aitheantais Úinéara Tiachóg le haghaidh Ghnó na hEorpa eisiúint, seachadadh agus gníomhachtú a fhíorú i gcomhréir le ceanglais an leibhéil dearbhaithe ‘ard’ a leagtar amach i Rialachán Cur Chun Feidhme (AE) 2015/1502 ón gCoimisiún (2.2);
- (d) Fíoróidh Aonaid Tiachóige le haghaidh Ghnó na hEorpa barántúlacht agus bailíocht sonraí aitheantais úinéara Tiachóige le haghaidh Ghnó na hEorpa agus ríomhdhearbhuithe tréithe.

15. TRÉITHE A CHUR I LÁTHAIR NA bPÁIRTITHE IS ÚSÁIDEOIRÍ TIACHÓIGE LE hAGHAIDH GHNÓ NA hEORPA

I gcomhréir le hAirteagal 5, mír 1, pointe (d) agus pointe (k), áiritheoidh soláthraithe Tiachóige le haghaidh Ghnó na hEorpa an méid seo a leanas:

- (1) go dtacaíonn réitigh Tiachóige le haghaidh Ghnó na hEorpa le prótacail agus comhéadain chun tréithe a chur i láthair páirtithe is úsáideoirí Tiachóige le haghaidh Ghnó na hEorpa i gcomhréir leis na caighdeáin a shainítear sna gníomhartha cur chun feidhme;
- (2) Arna iarraidh sin d’úsáideoirí Tiachóige le haghaidh Ghnó na hEorpa, go bhfreagraíonn aonaid Tiachóige le haghaidh Ghnó na hEorpa d’iarrataí arna bhfíordheimhniú agus arna mbailíochtú go rathúil ó pháirtithe is úsáideoirí Tiachóige le haghaidh Ghnó na hEorpa i gcomhréir leis na caighdeáin a shainítear sna gníomhartha cur chun feidhme;
- (3) go dtacóidh aonaid Tiachóige le haghaidh Ghnó na hEorpa lena chruthú go bhfuil eochracha príobháideacha acu a chomhfhreagraíonn d’eochracha poiblí a úsáidtear i gceangaltáin chripteagrafacha.

16. SONRAÍ AITHEANTAIS ÚINÉARA TIACHÓIGE LE HAGHAIDH GHNÓ NA hEORPA A EISIÚINT D'AONAIÐ TIACHÓG LE HAGHAIDH GHNÓ NA hEORPA

- (1) Áiritheoidh soláthraithe Tiachóige le haghaidh Ghnó na hEorpa go gcomhlíonfaidh sonraí aitheantais úinéara Tiachóg Gnó a eisítear d'aonaid Tiachóg Gnó na sonraíochtaí teicniúla a leagtar amach sna gníomhartha cur chun feidhme, i gcomhréir le hAirteagal 8 den Rialachán seo.
- (2) Áiritheoidh soláthraithe Tiachóg le haghaidh Ghnó na hEorpa go mbeidh sonraí aitheantais úinéara Tiachóige le haghaidh Ghnó na hEorpa a eisiúint siad ceangailte go cripteagrafach leis an aonaid Tiachóige le haghaidh Ghnó na hEorpa dá n-eisítear iad.

17. EISIÚINT RÍOMHDHEARBHUITHE TRÉITHE D'AONAIÐ TIACHÓG LE HAGHAIDH GHNÓ NA hEORPA

- (1) Comhlíonfaidh ríomhdhearbhuithe tréithe a eisítear d'aonaid Tiachóg le haghaidh Ghnó na hEorpa ceann amháin ar a laghad de na caighdeáin sa liosta a leagtar amach sna gníomhartha cur chun feidhme, i gcomhréir le hAirteagal 5 den Rialachán seo.
- (2) Déanfaidh soláthraithe ríomhdhearbhuithe tréithe iad féin a shainiú d'aonaid Tiachóg le haghaidh Ghnó na hEorpa.
- (3) Áiritheoidh soláthraithe ríomhdhearbhuithe tréithe go mbeidh an fhaisnéis is gá chun na ríomhdhearbhuithe tréithe sin a fhíordheimhniú agus a bhailíochtú i ríomhdhearbhuithe tréithe a eisítear d'aonaid Tiachóg le haghaidh Ghnó na hEorpa.